

# Yuehal Sul

## 1

### Ddar Ddei Ca Loxr A

<sup>1</sup> Azo lei nr zza seir halleix dder Ddar zza dae ho a.

Ddar eil ddei mel Arbosobo dax hher dax dae.

Ddar eil ddei mel dder Arbosobo ddei nga a.<sup>a</sup>

<sup>2</sup> Yar mel azo lei nr zza seir halleix dder Arbosobo dax hher dax dae  
a.<sup>b</sup>

<sup>3</sup> Hazza-hamaer lei Arbosobo yar<sup>c</sup> bei dae mel leil ngol dae a coxl teixl  
lei.

Ha coxl teixl lei cirza-hanga lei yar bei dae mel leil nr ngol dae ar  
yoxr nr zza.<sup>d</sup>

<sup>4</sup> Yar dax mel olga hher ji dae.<sup>e</sup>

Olga eil ddei mel dder ca mel bbelele labox ddei nga a.

<sup>5</sup> Bbelele ddei mel neixmar ggie bbo doxr dae a;  
neixmarmar ddei mel bbelele ddei leil bei leixl nr xie,<sup>f</sup>

---

<sup>a</sup>**1:1** Ddar eil ddei mel dder Yisu nga a. Xiboxrlaexr Sul 1:1-3 leil nei  
Geloxrxi Sul 1:15-16 leil Yisu arseir a biar dae.

<sup>b</sup>**1:2** Yar leil mel coxl teixl lei nr nga.

<sup>c</sup>**1:3** *yar* Yar mel dder Yisu nga a.

<sup>d</sup>**1:3** Cuaxlsixljil Sul 1:3-31 leil Arbosobo arsae merlo-milo coxl biar  
dae.

<sup>e</sup>**1:4** *Yar dax mel olga hher ji dae.* Yisu mel dder ca mel leil olga zza lol  
su ddei nga a. Yuehal Sul 5:19-27 leil biar dae.

<sup>f</sup>**1:5** Bbelele eil ddei mel Yisu a. Neixmarmar eil ddei mel Arbosobo leil

<sup>6</sup> Arbosobo ca ar ddei miardal si lei a. Yar leil mel Yuehal mi. <sup>7</sup> Yar lei a mel bbelele ddei arseir a ca mel leil biar gger, yel ca maelmaerjgia leil yar biar dae bbelele ddei mel yarzi a saexl lol niazzer; bbelele ddei leil ddarzzi lol. <sup>8</sup> Yar mel bbelele ddei nr nga. Yar bbelele ddei ca mel leil biar gger arnar a. <sup>9</sup> Bbelele yarzi eil ddei mel middurbbor lei a cassor-worssor maelmaerjgia leil bbele lol, hherdder yaa leil Arbosobo arseir a saexl lol.

<sup>10</sup> Arbosobo yar leil ngol dae a middurbbor ddei leil coxl a bbeixarnar, yar middurbbor hher dae car a, middurbbor ca mel zzael yar leil nr saexl.

<sup>11</sup> Yar armael mermi lei ci a, armael mermi su ca mel zzael yar leil nr li.

<sup>12</sup> Nael ha yar leil li su hherdder yar leil ddarzzi su mel, yar dder yaa leil Arbosobo ddei ssormine loxr quexrlixl zza lol. <sup>13</sup> Yaa Arbosobo ddei ssormine loxr a mel, ca mel sael a xiu teixl lei nr nga, middurbbor capor xiar dae mel dax zox dae a xiu teixl lei a loxr nr nga a nei, Arbosobo yaa leil loxr lol arddeir a.

<sup>14</sup> Ddar ddei mel ca loxr a. Yar niul dax hher dax dae. Yar niul ca mel leil cirza-hanga seirseir meixl gger, halae niul leil Arbosobo ddei ddarzi saexl lol. Niul lei yar murgurgurmo ddoddomo bei dae hal mel leil mia goxr a. Yar mel dder Merhhexr Arbbor ddei Ssorzil-ssorya ddei nga a.

<sup>15</sup> Sexlsir<sup>9</sup> gger su Yuehal mel yar arseir a ca mel leil biar gger a, bbialil-bbialor ae dae a bbeix: “Ca eil ddei mel ngo halleix dder bbeix

---

dir su a.

<sup>9</sup>**1:15** *Sex/sir* Ca mel sexlsir a mel, yaa armael zuixl zza cexrssexl a, Arbosobo yaa leil ssoxrsuxl lol. Ca mel halae Yisu leil ddarzzi cexrssexl, yar dax bei mae dae. Ca mel sexlsir a mel, ajjix sser a sexlsir. Cirmelmel a nael leixrhher ddei ajjix dex du lei a oldde leil dox deix gger. Cirmelmel a nael ajjix gga niuxl gger.

goxr a bbeix: ‘Ngo leil halae xiu nr teixl lei seir, yar dder zza dae ho a. Yel yar mel dder ngo giedae leil sael Arbosobo ddei miar bei lei, nael bir ngo leil vaer leixl ca hal ddei nga a,’ ” eine bbeix a. <sup>16</sup> Yar cirleixr nr nor ca maelmaerjia leil cirza-hanga seirseir meixl gger dae. <sup>17</sup> Lixlfaxr ddei mel Arbosobo Moxrxix leil cassor-worssor mel leil gger lol arddeir a. Arbosobo ca mel leil cirza-hanga seirseir meixl gger dae mel nei ddarzi mel nael, Yisu Zidu bei dae mel leil ngol dae a, ca leil gger arddeir a. <sup>18</sup> Arseir lei Arbosobo leil malma mia nr seix. Yar ddei Ssorzil larnai yar leil mia seix. Yar mel dder Merhhexr Arbbor perniar zzir ddei nga a. Yar Arbosobo arsae ar ddei a ca mel leil saexl lol a.

### **Sexlsir Gger Su Yuehal Ca Mel Leil Yar Arseir A Biar Gger**

<sup>19</sup> Eilcar sexlsir gger su Yuehal mel yar arseir a Yisu arseir a ca mel leil biar gger du a. Halcar a, Yiluxlsaler zzi gga hher dae Yoxrtaexl su vaervaerpor mel, Arbosobo leil zi su mel leil nei Lixlweixl giedae su ca mel leil miardal teixl a, Yuehal leil i ssi lol, yar leil biex lol a bbeix: “Ni arseir a leir?” <sup>20</sup> Yar daxmeix cexrssexl a bbeix: “Ngo mel Zidu<sup>h</sup> nr nga.”

<sup>21</sup> Yaa yoxl biex a bbeix: “Halmel, ni Yirlixlyal a ngo?” Yar ddarkoxl a bbeix: “Nr nga.” Yaa zeixleixr biex a bbeix: “Ni Moxrxix bbeix dae Xiezi<sup>i</sup> hal ddei nga a ngo?” Yar ddarkoxl a bbeix: “Nr nga.”

<sup>22</sup> Yaa dder yar leil bbeix: “Halmel, ni arseir a? Ngua leil bbeix gger la, yel ngua ngua leil miardal si lei ca mel leil bbeix gger jjixr cexr. Ni bbeix ddo a; ni arseir a.”

<sup>23</sup> Yuehal dder xiezi Yirsaexlyal bbeix goxr ddar mel sser dae a, yaa leil

---

<sup>h</sup>**1:20** *Zidu* “Zidu” mel dder Arbosobo tiur teixl lei a, ca leil jiuxlsu ddei nga a. Yar halae Yirsaexllixl su ddei zzirmar a.

<sup>i</sup>**1:21** *Xiezi* Xiezi mel ca lar nga. Yaa Arbosobo ddei ddar mel ca leil biar gger. Halae arddolcar a arsae lerler nga var ca leil bbeix gger zaxr.

ddarkoxl a bbeix:

“Ngo mel dder mipaerbbae gga ae dae ca hal ddei nga a; bbeix:  
‘Seirpor ssilabox jjiumo zex ggu zzar zaxr ssi nia.’ ”<sup>j</sup>

eine bbeix a.

<sup>24</sup> Farlixlsaexl su ca<sup>k</sup> mel miardal si lei ca hal mel, <sup>25</sup> Yuehal leil biex a bbeix: “Ni Zidu nr nga, Yirlixlyal lei nr nga, Xiezi hal ddei lei nr nga arddeirnga a, halmel, ni arsaenga a ca mel leil sexlsir gger leir?”

<sup>26</sup> Yuehal yaa leil ddarkoxl a bbeix: “Ngo mel ajjix sser a ca mel leil sexlsir gger, nael nia agala gga mel nia nr saexl ca ar ddei ngier dax dae.

<sup>27</sup> Yar mel ngo giedae leil lei bbeixarnar, ngo yar leil qixnexsael lei pe gger nr piar.”

<sup>28</sup> Eil mel hherdder Yuehal sexlsir gger car a, arsae lerler nga goxr mel, ca leil biar gger dae mel nga a. Yar ca leil sexlsir gger car a, Yuedaxl lazzarmo deixrgoxr Boxrdaxlnixr kax gga hher dae.

### Arbosobo Ddei Yassor

---

<sup>j</sup>**1:23** Yirsaexlyal Sul 40:3 leil vaexr goxr. Halcar zzirmar mel kebal mermi ssi a mel cassor-worssor mel yar leil i du a, jjiumo bei zaxr nia, ggu zzar zaxr nia. Arbosobo ca mel ddei zzirmar bei lei niazzir dae a. Yel cassor-worssor mel nixmox zzar bei har zaxr dae a Arbosobo dax bei mae nia.

<sup>k</sup>**1:24** *Farlixlsaexl su ca* Farlixlsaexl ca mel Yoxrtaexl su ddei vaervaerpor a. Yaa mel dder Yoxrtaexl su mel leil Arbosobo leil arsae zi nia mulggersu mel nga a. Farlixlsaexl ca mel zabbar seirseir a Arbosobo Ddei Sul ber zza, nael yaa cirmelmel a hal mel sael a nr bei ssi. Yaa Yoxrtaexl su mel leil Arbosobo Ddei Sul ber mul gger nr nga a nei, yaa armael ddei leiddur mul gger.

<sup>29</sup> Giedae cir ni, Yuehal Yisu yar dax ssi gel lei ggie mia a dder, bbeix: “I ddo a. Arbosobo leil zilabox Yassor<sup>1</sup> ddei lei a. Yar mel middurbbor ca mel ddei zuixl mel bei pixl gger.” <sup>30</sup> Ca eil ddei mel dder ngo bbeix goxr a bbeix: “Ngo leil halae xiu nr teixl lei seir, yar dder zza dae ho a. Yel yar mel dder ngo giedae leil sael Arbosobo ddei miar bei lei, nael bir ngo leil vaer leixl,” bbeix dae ca hal ddei nga a. <sup>31</sup> Halcar a ngo yar Arbosobo ddei miar bei lei su hal ddei nga a nr saexl, nael eilcar ngo ajjix sser a, ca mel leil sexlsir gger a mel, Yirsaexllixl su ca mel leil yar arseir a saexl lol niazzir a nga arddeir a.

<sup>32</sup> Yuehal yoxl yar mia goxr mel ca mel leil biar gger a bbeix: “Arbosobo ddei Xiu ddei dderbel sael a merlabbor zei lei a, yar leil nor deix dae a ngo mia a. <sup>33</sup> Halcar a ngo yar Arbosobo miardal si lei hal ddei nga nr saexl, nael ngo leil miardal a, ajjix sser a ca leil sexlsir gger lol su Arbosobo ddei mel ngo leil bbeix: ‘Ngo ddei Xiu ddei zei lei a, arseir leil nor deix dae mel, arseir dder Ngo ddei Xiu ddei sser a, ca leil sexlsir gger nia,’ eine bbeix a. <sup>34</sup> Ngo eil mel leil mia ho a, ngo mia goxr mel ca leil biar gger ho a. Yar mel dder Arbosobo ddei Ssor ddei nga a.”

### Yisu Yar Dax Mae Dae Su Ca Tiur

<sup>35</sup> Giedae cir ni, Yuehal nei yar dax mae dae ca nnel a mel yoxl Yuedaxl lazzarmo dax halmaex hher dae. <sup>36</sup> Yuehal mel Yisu ssi gel ggie mia a dder bbeix: “I ddo a, Arbosobo ddei Yassor ddei lei a!”

<sup>37</sup> Yuehal dax mae dae ca hal nnel yar bbeix dae mel leil bbejjiur a dder Yisu dax mae ssi a. <sup>38</sup> Yisu mel za xixl lei a, yaa yar dax mae dae ggie mia a dder bbeix: “Nia azo li niazzir dae?” Yaa ddarkoxl a bbeix:

---

<sup>1</sup>**1:29** *Arbosobo leil zilabox Yassor* Arbosobo leil zilabox Yassor eil ddei mel Yisu a. Xiboxrlaexr Sul 9 leil Yisu arsaе middurbbor ddei ca ddei zuixl mel bei pixl gger biar dae.

“Labir, ni arddolmaex hher dae?” “Labir” ddei yilsi mel dder sulmulsu.

<sup>39</sup> Yisu bbeix: “Nia i lei ddo a!” Yel yaa dder Yisu dax mae dae a, yar hher ggie mia a. Halcar mel eilnirrgu 4:00 sael ci a; yel yaa hal cir ni dder Yisu dax hher dax dae a.

<sup>40</sup> Yisu dax mae ssi ca hal nnel leil cir ddei a mel Adaexrlixl mi. Yar Ximexr Birdaexr ddei nimar a. Yar Yuehal biar dae mel leil bbejjiur goxr a. <sup>41</sup> Yar hoba yargo Ximexr leil zo ssi a, yar dax bbeix: “Ngua Mirsaexlyal dax zzi ho a,” eine bbeix a. Mirsaexlyal mel dder Zidu nga a.<sup>m</sup> <sup>42</sup> Yar dder Ximexr leil hier dae a, Yisu leil i ssi.

Yisu Ximexr leil i dae a bbeix: “Ni mel Yuehal ddei ssor Ximexr a; ni leil Jifar ae nia,” eine bbeix a. “Jifar” leil Xilaxl ddar nael “Birdaexr” ae.<sup>n</sup>

<sup>43</sup> Giedae cir ni, Yisu mel Jialixllixl mermi ssi xiar har a. Yar Feilixl leil zo wo a dder yar leil bbeix: “Ngo dax mae lei ddo a.”

<sup>44</sup> Feilixl mel Boxrsaexldaxl zzi gga su ca a; hherdder Adaexrlixl nei Birdaexr yaa nr hieni dax cir mermi su a. <sup>45</sup> Feilixl mel Naxrdaxlyixl leil zo ssi a, yar leil bbeix: “Ngua Arbosobo Ddei Sul ber gga Moxrxi Lixlfaxr leil nei xiezi sul<sup>o</sup> leil vaexr goxr ca hal ddei leil zo wo a. Yar mel dder Yuesaexl ddei ssor, Naxrsalexl kax gga su ca Yisu ddei nga a.”

<sup>46</sup> Naxrdaxlyixl dder bbeix: “Naxrsalexl kax gga mel azo ca seirseir

---

<sup>m</sup>**1:41** *Mirsaexlyal mel dder Zidu nga a* “Mirsaexlyal” nei “Zidu” ddei yilsi ciryoxr a nga. Mirsaexlyal nael Xiboxrlaexr ddar; Zidu nael Xilaxl ddar.

<sup>n</sup>**1:42** *“Jifar” leil Xilaxl ddar nael “Birdaexr” ae.* “Jifar” nael Yallaxr ddar; “Birdaexr” nael Xilaxl ddar. Mi eil nnel ddei yilsi mel dder legelbbe vaervaer gextaextaexmo.

<sup>o</sup>**1:45** *Arbosobo Ddei Sul ber gga Moxrxi Lixlfaxr leil nei xiezi sul* Halcar a Moxrxi ddei Lixlfaxr nei xiezi ddei sul ber mel dder Yoxrtaexl su ca mel sser dae Arbosobo Ddei Sul ber leil bbeix.

ddux lei var bbeixleir?” Feilixl bbeix: “Ni i lei ddo a,” bbaexl bbeix a.

<sup>47</sup> Yisu mel Naxrdaxlyixl yar dax ssi gel lei ggie mia a dder bbeix: “I dae la ddo a. Naxrdaxlyixl mel yarzi Yirsaexllixl su ca a; yar ca leil nr fur lei.”

<sup>48</sup> Naxrdaxlyixl bbeix: “Ni ngo leil arsae saexl?” Yisu bbeix: “Feilixl ni leil nr ae seir, ni vuxrhuagol zzei zzei woxrke hher dae halcar a dder ngo ni leil mia ho a,” bbaexl eine bbeix a.<sup>p</sup>

<sup>49</sup> Naxrdaxlyixl dder bbeix: “Labir, ni mel Arbosobo ddei Ssor a; Yirsaexllixl su ddei zzirmar a!”

<sup>50</sup> Yisu bbeix: “Ngo bbeix ni vuxrhuagol zzei zzei woxrke hher dae halcar a dder ngo ni leil mia ho a; eine bbeix a ni dder ngo leil ddarzzi a ngo? Ni halae bir eil mel leil vaer leixl hal mel mia nia! <sup>51</sup> Ngo nia leil yarzi bbeix gger, nia mel merlabbor ddei ggapu ggie mia nia, Arbosobo ddei tisir<sup>q</sup> mel leil mia nia. Yaa mel Ca Ddei Ssor<sup>s</sup> ddei dax merlabbor ddeix jjixr nael yoxl ze lei, ze lei nael yoxl ddeix jjixr,” eine bbeix a.

## 2

### Jianaxr Zzi Gga Ggie Baxl

<sup>1</sup> So ni cir ni ci a, Jialixllixl mermi Jianaxr zzi gga mel ggie baxl su ar

---

<sup>p</sup>**1:48** Yaa nrmel cirgo a nr hher dae bbeixarnar, Yisu halae yar leil mia xie. Eil ddei mel Arbosobo yar leil mia lol arddeir a.

<sup>q</sup>**1:51** *tisir* Tisir mel ca nr nga; yaa Arbosobo coxl teixl lei xiu ar mel a. Yaa merlabbor ze lei a Arbosobo ddei ddar ca leil bbeix gger su. Yaa Arbosobo leil lei zi, visser. Halleix yaa maelmaerjjia lei seir, giedae cirmelmel a nael nr seir loxr a.

<sup>s</sup>**1:51** *Ca Ddei Ssor* “Ca Ddei Ssor” mel dder Yisu nga a. Cirdaedae a yar mel armael leil “Ca Ddei Ssor” eine bbeix.

hhexr zza. Yisu yarma halmaex hher dae.<sup>2</sup> Yisu leil nei yar dax mae dae ca mel leil lei qie a, yaa lei seivi mu dae.<sup>3</sup> Yaa hhexr mel puxrto zzubbaer dda jgia a. Yisu yarma dder yar leil bbeix: “Yaa hhexr puxrto zzubbaer nr zza a.”

<sup>4</sup> Yisu ddarkoxl a bbeix: “Ama, ni ngo dax bbeix a azo bei bbeixleir? Ngo ddei nixixl ddei mel halae nr ci seir.”<sup>t</sup>

<sup>5</sup> Yisu yarma dder ca leil visser su mel leil bbeix: “Yar nia leil azo miardal mel nia dder azo bei,” eine bbeix a.

<sup>6</sup> Halmaex mel loxga vaervaer qiuxl taex dol dae. Loxga cir taex gga mel ajjix qiuxlsir tur ji ddei. Loxga eil mel mel Yoxrtaexl su ca mel ggecir seibeix lol leiddur mel dax zox dae a, sserlabox a.<sup>u</sup>

<sup>7</sup> Yisu ca leil visser su mel leil bbeix: “Nia loxga gga ajjix bbilbbi dox ji ssi.” Yel yaa dder ajjix bbilbbi dox ji gger a; loxga qier dax lei ddeix ci a.

<sup>8</sup> Yisu yoxl yaa leil bbeix: “Eilcar nia kexl teixl la a, yaa leil ggie guaxr gger su ddei leil arleixr dda sixr i lol.” Yel yaa dder ca hal ddei leil ho mal gger a.

<sup>9</sup> Yar dda sixr i ho a, puxrto zzubbaer eil mel arddol lei nr saexl. Nael ajjix kexl su mel puxrto zzubbaer eil mel ajjix bixl teixl lei arddeir a saexl. Ggie guaxr gger su ddei dder mixlyixrsixl ddei leil ae si lei a,<sup>10</sup> yar leil bbeix: “Arseir lei puxrto zzubbaer naxrcixl mel hoba vei teixl lei a, seivi mel dda bbox ho a saelnei puxrto zzubbaer ggiexrtaex mel vei teixl lei,

---

<sup>t</sup>**2:4** *Ngo ddei nixixl ddei mel halae nr ci seir.* Ca cirmelmel a zzir dae a ddar eil qier ddei yilsi mel dder Yisu halae ca mel leil yar mel Zidu a nr saexl lol seir.

<sup>u</sup>**2:6** *Loxga eil mel mel Yoxrtaexl su ca mel ggecir seibeix lol leiddur mel dax zox dae a, sserlabox a.* Yoxrtaexl su ca mel Arbosobo leil zi niazir a mel, yaa hoba leiddur ddei dax zox dae a ggecir cir nia. Yaa leiddur cirke zza.



nael ni puxрто zziбbaer naxrcixl mel eilcar sael vei teixl lei leir,” eine bbeix a.

<sup>11</sup> Yisu ddoddomo eine bei a, ca mel leil yar Arbosobo ddei quexrlixl zza saexl lol beil a. Yar Jialixllixl mermi Jianaxr zzi gga hher dae a bei, yel yar yarzi ddo ca mel leil saexl lol a; yar dax mae dae su ca mel yar leil ddarzzi a. <sup>12</sup> Giedae yar dder yarma, yar ddei nimar mel, nei yar dax mae dae ca mel dax cirgo a Jiabaernoхr kax gga ssi ci a, halmaex nr ni sael hher a.

### **Yisu Arbosobo Ddei Xi Zzaexggu Gga Ca Mel Leil Ggaxr Teixl Gger**

<sup>13</sup> Yoxртаexl su ddei Yuelyuel jiax<sup>v</sup> ddei mel ci ddo jiu r a; yel Yisu dder Yiluxlsaler zzi gga ssi deix ci a. <sup>14</sup> Yar Arbosobo ddei xi zzaexggu gga ddir a, niur vur su, acixl ya vur su, dderbel vur su mel leil mia, halae zzirbae bo su mel lei halbbaer cux dae ggie mia a. <sup>15</sup> Yel yar dder baezo sser a, lorddu ar zex bei a, niur nei acixl ya mel maelmaerjia ggaxr teixl gger a; halae zzirbae bo su mel ddei zzirbae zzu dder pixl gger a; zaezir mel bbax pox gger a. <sup>16</sup> Yar yoxl dderbel vur su mel leil bbeix: “Nia nia ddei zzaegu mel vei dae a ddux hor! Nia Ngabbor ddei xi zzir leil zeixleixr vaexleixr bei ggie tor bei mal gger hor!”

<sup>17</sup> Yar dax mae dae ca mel dder Arbosobo Ddei Sul ber leil bbeix dae ddar mel leil holcir du lei a. Arbosobo Ddei Sul ber leil bbeix: “Ngo ca mel leil ni ddei xi zzir leil yarzi sael i du lol niazzir a, ca mel ngo leil bei zil gger nia, ”<sup>w</sup> eine bbeix a.

---

<sup>v</sup>**2:13** *Yuelyuel jiax* Cu'aezixr Sul 12 leil Yirsaexllixl su ca mel arsaenga a Yuelyuel jiax goxr biar dae.

<sup>w</sup>**2:17** *Ngo ca mel leil ni ddei xi zzir leil yarzi sael i du lol niazzir a, ca mel ngo leil bei zil gger nia* Ca cirmelmel a zzir dae a ddar eil qier ddei yilsi mel dder “Ngo ni ddei xi zzir leil weixr a, nixmox no zildu a.”

<sup>18</sup> Yoxrtaexl su ca mel dder Yisu leil biex a bbeix: “Ni Arbosobo lar bei var ddoddomo bei a ngua leil i lol, yel ni eil mel bei a Arbosobo ddei quexrlixl zza ngua dder saexl a?”

<sup>19</sup> Yisu yaa leil ddarkoxl a bbeix: “Nia Arbosobo ddei xi zzir caexr pixl gger a, ngo so ni dder zi du xixl box lei nia.”

<sup>20</sup> Yel Yoxrtaexl su ca mel yar leil bbeix: “Arbosobo ddei xi eil zzir mel liceiqiuxl koxl zi a sael zi du lei. Holbbaexl ni so ni dder zi du lei xie a ngo?” <sup>21</sup> Nael Yisu eine bbeix a mel Arbosobo ddei xi zzir leil bbeix nr nga, yar armael ggecir ddei leil bbeix arddeir a. <sup>22</sup> Giedae Yisu si ho a gol du xixl lei a, yar dax mae dae ca mel dder ddar eil mel leil holcir du lei a; yel Arbosobo Ddei Sul ber leil nei Yisu bbeix dae ddar mel leil ddarzzi a.

### **Ca Mel Nixmox Zzar Xiar Dae Mel Yisu Saexl**

<sup>23</sup> Yisu Yiluxlsaler zzi gga Yuelyuel jiax goxr dae car a, ca cirke a yar ddoddomo bei dae mel leil mia a dder yar leil ddarzzi a. <sup>24-25</sup> Nael Yisu mel ca mel nixmox taex leil lei mox dae xie, yel ca mel arsae nga mel arseir lei yar leil bbeix gger nr ssa. Yel yar ca mel leil ddar-nr-zzi.

## **3**

### **Yisu Nei Nixrgedirmur Olga Zza Box Lol Ddei Leil Biar**

<sup>1</sup> Farlixlsaexl su ca ar ddei zza, yar leil Nixrgedirmur mi. Yar mel Yoxrtaexl su ca ddei vaervaerpor mel gga ar ddei a. <sup>2</sup> Yar eilmerxixl Yisu dax lei a bbeix: “Labir, ngua saexl ni ddoddomo bei dae eil mel, Arbosobo ni dax hher nr dax dae arddeirnga a mel, ni dder bei nr var. Ni mel Arbosobo dax halmaex zeil lei a sulmulsu bei lei arddeir a.” <sup>3</sup> Yisu yar leil bbeix: “Ngo ni leil yarzi bbeix gger, ca mel zeixleixr ar boxl xiu teixl nr box lei arddeirnga a mel dder Arbosobo ddei goxr<sup>x</sup> ddei leil mia nr

---

<sup>x</sup>**3:3** *Arbosobo ddei goxr* Arbosobo ddei goxr mel hherdder Arbosobo ca

ddo.”<sup>4</sup> Nixrgedirmur ddarkoxl a bbeix: “Ca mel mar ho a arsae zeixleixr ar boxl xiu teixl box lei cexr? Holbbaexl zeixleixr yarma xilbe gga ddir jjixr a xiu teixl box lei cexr a ngo?”

<sup>5</sup> Yisu bbeix: “Ngo ni leil yarzi bbeix gger, ca mel ajjix sser nei Arbosobo ddei Xiu ddei leil koxl dae a xiu teixl box lei a saelnei Arbosobo ddei goxr gga ddir wo ddo, hherdder Arbosobo ddei cassor-worssor bei cexr.”<sup>6</sup> Ca ggecir gga xiu teixl lei mel ca lar nga, nael Arbosobo ddei Xiu ddei xiu teixl lei mel xiu a.<sup>7</sup> Ngo bbeix ‘ni zeixleixr ar boxl xiu teixl box lei nia,’ eine bbeix a, ni murgur nr ssa.<sup>8</sup> Mersi ddei eine jia dae a, ni bbejjiur a lei, nael arddol jia si lei, arddol jia mal, ni nr saexl. Arbosobo ddei Xiu ddei xiu teixl lei ca hal mel lei eine nga.”<sup>z</sup>

<sup>9</sup> Nixrgedirmur biex a bbeix: “Eine mel arsae nga var?”

<sup>10</sup> Yisu bbeix: “Ni mel Yirsaexllixl su ddei sulmulu a lei holbbaexl ni nr saexl a ngo?”<sup>11</sup> Ngo ni leil yarzi bbeix gger, ngua mel ngua saexl dae mel nei mia goxr mel nia leil biar gger, nael nia zzael ddar-nr-zzi.<sup>12</sup> Ngo nia leil middurbbor ddei mel biar gger a lei nia ddar-nr-zzi mel, ngo nia leil Merhhexr Arbbor ddei mel biar gger arddeirnga a giel, nia arsae ddarzzi var bbeixleir?<sup>13</sup> Merlabbor zei lei Ca Ddei Ssor ddei leil cuxrteixl a mel

---

leil guaxr ggie nga a.

<sup>y</sup>**3:5** *Ngo ni leil yarzi bbeix gger, ca mel ajjix sser nei Arbosobo ddei Xiu ddei leil koxl dae a xiu teixl box lei a saelnei Arbosobo ddei goxr gga ddir wo ddo, hherdder Arbosobo ddei cassor-worssor bei cexr. Ca cirmemel a zzir dae a ddar eil qier ddei ylsi mel dder ca mel sexlsir nia halae Arbosobo ddei Xiu ddei leil yaa dax hher ji dae lol nia saelnei Arbosobo ddei goxr gga ddir cexr.*

<sup>z</sup>**3:8** *Arbosobo ddei Xiu ddei xiu teixl lei ca hal mel lei eine nga Ddar eil qier ddei ylsi mel dder Arbosobo ddei xiu ddei yar dax hher ji dae ca hal mel lei eine nga.*

arseir lei merlabbor ddeix nr goxr. <sup>14</sup> Moxrxi mipaerbbae gga hher dae a, sae ddei leil arsae bil du lei mel, Ca Ddei Ssor ddei leil lei arsae bil du lei nia. <sup>a</sup> <sup>15</sup> Yel ngo leil ddarzzi su hazza leil dder cirse-cirsil olga zza lol.

<sup>16</sup> Arbosobo mel middurbbor ca mel leil yarzi sael perniar a, yar, yar ddei Ssorzil ddei leil ca mel ddei zuixl mel leil dir gger lei lol, yel yar Ssorzil ddei leil ddarzzi su ca mel leil mel dixlyuxl gga nr ssi lol, cirse-cirsil lei olga zza lol. <sup>17</sup> Arbosobo yar ddei Ssorzil ddei leil middurbbor zei lei lol a mel, ca mel leil zuixl dixl gger lei lol nr nga a nei, ca mel leil yar Ssor ddei leil koxl dae a jiuxl wo lol arddeir a. <sup>18</sup> Ssor ddei leil ddarzzi su mel leil dder zuixl dixl nr gger, nael ddar-nr-zzi su mel mel Arbosobo ddei Ssorzil ddei leil ddar-nr-zzi a, yaa leil mel zuixl dixl gger ho a. <sup>19</sup> Middurbbor ca mel mel nr seir bei meixr, yel Bbelele ddei<sup>b</sup> yaa dax lei a lei, yaa bbelele ddei leil lizoxr nr nga a nei, neixmarmar ddei leil lizoxr. Eine nga a dder yaa leil zuixl dixl gger. <sup>20</sup> Nr seir bei su maelmaerjia lei bbelele ddei leil vuxryixr. Yaa mel yaa nr seir bei dae mel ca mel saexl leilei a gexr a, yaa bbelele ddei dax naer lei nr bel. <sup>21</sup> Nael Arbosobo ddei ddarzi mel dax bei mae dae su mel nael bbelele ddei dax naer lei meixr. Yaa mel bbelele ddei yaa leil zoxl gex dae lol. Eine nga a ca mel dder Arbosobo yaa leil bei lol arddeir a saexl.”

---

<sup>a</sup>**3:14** Halleix Yirsaexllixl su ca mel mipaerbbae gga hher dae car a Arbosobo leil dir a, Arbosobo yaa leil faxr. Yel Arbosobo mel sae yarzi duxr hal mel leil yaa hher ggie ddir lol, yaa leil kexl lol. Ha kexl dae ca mel mel dder si niazzir dae a. Arbosobo Moxrxi leil bbeix: “Ni zzir bei teixl lei sae ar ddei bei, yel sae ddei zzargger caex leil neixl gex dae a, bil du la. Ha arseir leil sae kexl dae a mel yar zzir bei teixl lei sae ddei leil mia a dder kor a.” Mixrsuxljil Sul 21:4-9 leil biar dae.

<sup>b</sup>**3:19** *Bbelele ddei* Bbelele ddei mel dder Yisu nga a.

## Yisu Nei Sexlsir Gger Su Yuehal

<sup>22</sup> Eine goxr ho a, Yisu nei yar dax mae dae ca mel lei Yoxrtaexl mermi mipaerbbae gga ssi a, halmaex gga argielggur hher a; halae ca mel leil sexlsir gger dae. <sup>23</sup> Saler kax dax naer ggie, Aeneixl halmaex gga mel ajjix be, yel Yuehal halmaex gga lei a ca mel leil sexlsir gger dae.

<sup>24</sup> Halleix Yuehal leil mel ssu ge nr du lei seir. <sup>25</sup> Yuehal dax mae dae ca nnel sael nei kebal Yoxrtaexl su ca ar ddei a mel, ggecir nei zzaegu arsae seibeix lol ddei leiddur mel leil zex dae. <sup>26</sup> Yuehal dax mae dae ca hal nnel sael dder Yuehal dax lei a bbeix: “Labir, halleix Yuedaxl lazzarmo deixrgoxr ni dax lei a hherdder yar arseir a ni ca leil biar gger goxr ca hal ddei mel ca mel leil sexlsir gger dae. Ca maelmaerjjia lei yar dax ssi a.”

<sup>27</sup> Yuehal ddarkoxl a bbeix: “Arbosobo ca mel leil azo nr bei lol a mel, yar dder azo lei bei nr ddo. <sup>28</sup> Ngo doxl halleix dder bbeix: ‘Ngo mel Zidu nr nga. Ngo leil mel miardal si lei a, yar xilmeir lei lol a ca leil biar gger zaxr lei lol arnar a. Eil mel nia lei saexl.’ <sup>29</sup> Bir dae a bbeix, cirmusixl leil bbeix su ddei mel mixlyixrsixl ddei a. Mixlyixrsixl gaxggor carbeix ddei mel halbbaer ngier dae a yar qiurte ddei leil noni wo a dder ggese a. Ngo lei ciryoxr a nga, Zidu qiurte ddei leil bbejjiur a ngo ggese zildu. <sup>30</sup> Yar mel ho bei ho zoxlyoxl du lei a; ngo nael ho bei ho zoxl-nr-yoxl a.

<sup>31</sup> Middurbbor lei hal ddei mel middurbbor ddei lar nga, yel yar ddar bbeix dae mel lei middurbbor ddei mel bbeix lalnga. Nael Merlabbor lei hal ddei mel cirza-hanga leil lei vaer leixl. <sup>32</sup> Yar mel Arbosobo yar leil mia lol nei bbejjiur lol mel ca leil biar gger a; nael arseir lei yar biar dae mel leil ddarzzi su nr zza. <sup>33</sup> Ha arseir yar biar dae mel leil noni dil a mel, yar dder Arbosobo ddei ddar mel yarzi a ssexl. <sup>34</sup> Arbosobo yar ddei Xiu ddei yar miardal si lei hal ddei leil gger a, nixmox zzar bbilbbi hher ji dae lol a. Yel yar mel Arbosobo ddei ddar mel ca leil biar gger. <sup>35</sup> Merhhexr

Arbbor yar ssor ddei leil perniar, cirza-hanga lei yar leil gger ho a.

<sup>36</sup> Ssor ddei leil ddarzzi su mel dder cirse-cirsil olga zza; ssor ddei leil no-nr-ni su mel cirse-cirsil olga nr zza, halae Arbosobo yaa leil sirzzi doxr dae a, yaa leil faxr.”

## 4

### Yisu Nei Sarmarlixlyal Su Ssormaer

<sup>1</sup> Yisu dax mae lei su ca mel bir Yuehal dax mae lei su ca mel leil miur, halae yar sexlsir gger ca mel bir Yuehal sexlsir gger ca mel leil miur, Farlixlsaexl su ca mel bbejjiur a. <sup>2</sup> Nael nga zzael Yisu yaa leil sexlsir gger nr nga, yar dax mae dae ca mel yaa leil sexlsir gger arddeir a.

<sup>3</sup> Yisu mel Farlixlsaexl su ca mel eil mel bbejjiur a saexl a dder yar nei yar dax mae dae su ca mel Yoxrtaexl mermi nr hher Jialixllixl mermi jjixr;

<sup>4</sup> nael yar Sarmarlixlyal mermi ssi gel nia. <sup>5</sup> Yel yar dder Sarmarlixlyal mermi Xuljia kax dax lei ci a. Halmaex mel Yargel yar ssor Yuesaexl leil gger mi bbae dax giex vi-nr-mir dae a.<sup>c</sup> <sup>6</sup> Mi bbae dax Yargel giexl teixl lei lurddur ar bbe zza. Yisu mel ssi le a, lurddur bbe dax cux dae a. Halcar a mel merni lexl zzir car a nga a.

<sup>7</sup> Yel Sarmarlixlyal mermi su ssormaer ar ddei a mel ajjix tir lei a. Yisu dder yar leil bbeix: “Ngo leil ajjix ardoxr dda lol la!” <sup>8</sup> Halcar a mel yar dax mae dae ca mel kax gga ssi a zzorddu vae ssi jixr a.

<sup>9</sup> Yoxrtaexl su ca mel nei Sarmarlixlyal su ca mel zzicarzzi dax nr ssi lei, yel ssormaer hal ddei ddarkoxl a bbeix: “Ni Yoxrtaexl su ca ar ddei a mel, arsaе ngo Sarmarlixlyal su ssormaer eil ddei dax ajjix ho dda leir?”<sup>d</sup>

---

<sup>c</sup>4:5 Cuaxlsixljil Sul 33:19 leil vaexr dae.

<sup>d</sup>4:9 Yoxrtaexl su ca mel nei Sarmarlixlyal su ca mel zzicarzzi leil vuxryixr.

<sup>10</sup> Yisu yar leil bbeix: “Arbosobo ni leil arddolyox seirseir gger var ni saexl nei ni dax ajjix ho dda su ca ddei arseir a ni saexl arddeirnga a, ni dder yar leil qiuxr ho a; yar ni leil olga vi<sup>e</sup> da ho a.”

<sup>11</sup> Ssormaer ddei ddarkoxl a bbeix: “Seirpor, ni ajjix tirlabox nr zza, lurddur eil bbe lei yarzi neixl, ni arsae olga vi li wo ddo bbeixleir? <sup>12</sup> Niul ddei porpor Yargel ddei mel ngua leil lurddur eil bbe dol gger dae, yar nei yar ddei ssormine, halae yar ddei zzeir mel lei lurddur eil bbe dda. Holbbaexl ni zzir dae a ni bir yar leil lei sexr a ngo?”

<sup>13</sup> Yisu yar leil bbeix: “Ajjix eil bbe dda su mel mel halae zeixleixr sixl var, <sup>14</sup> nael arseir ngo yar leil da ajjix mel dda a mel, yar dder zeixleixr lei sixl nr var. Halae yar ggecir ddei gga lur loxr a, cirleixr lei nr nor olga vi zer teixl lei nia, cirse-cirsil lei zer teixl lei, hherdder ni leil cirse-cirsil olga zza lol.”

<sup>15</sup> Yar bbeix: “Seirpor, ni ajjix eil mel ngo leil da la. Yel ngo zeixleixr lei ajjix sixl nr var a; zeixleixr lei eilmaex ajjix tir lei nr ssa a.”

<sup>16</sup> Yisu yar leil bbeix: “Ni ni capor ddei leil ae si la a, eilmaex lei.”

<sup>17</sup> Yar ddarkoxl a bbeix: “Ngo capor nr zza.” Yisu bbeix: “Nga a; ni eine bbeix a bbeix hoxr, <sup>18</sup> nael ni halleix capor ngorler zza goxr a. Halae eilleix ni dax cirgo a hher dae eil ddei lei ni capor nr nga, yel ni bbeix hoxr.”

<sup>19</sup> Yar bbeix: “Seirpor, ngo i teixl lei a; ni mel xiezi ar ddei a. <sup>20</sup> Halleix ngua Sarmarlixlyal su ca ddei porpor mel worga eil ga leil Arbosobo leil zi, nael nia Yoxrtaexl su ca mel bbeix: ‘Arbosobo leil zi ggie mel Yiluxlsaler zzi gga a,’ eine bbeix.”

<sup>21</sup> Yisu yar leil bbeix: “Ni ngo leil ddarzzi nia, nixixl hal ddei ci a mel ca mel worga eil ga leil bbeixsael Yiluxlsaler zzi gga Arbosobo leil zi nr nga. Nixixl hal ddei ci du a. <sup>22</sup> Nia Sarmarlixlyal su ca mel nia zi dae ddei

---

<sup>e</sup>4:10 *olga vi* Olga vi mel dder ca leil cirse-cirsil olga zza lol var.

arseir a nr saexl, nael Arbosobo Yoxrtaexl su leil sser dae a ca mel leil jiuxl,<sup>f</sup> yel ngua zi dae ddei arseir a mel ngua saexl. <sup>23</sup> Yarzi Arbosobo leil zi nixixl ddei mel ci ddo jiur a; hherdder eilleix nga a. Yel yarzi Arbosobo leil zi su mel Arbosobo ddei Xiu ddei nixmox zzar hher ji dae a yarzi yar leil zi nia. Arbosobo mel dder yar leil eine zi su mel leil zo. <sup>24</sup> Arbosobo mel xiu ar ddei a. Yel yar leil zi su mel Arbosobo ddei Xiu ddei nixmox zzar hher ji dae a yarzi yar leil zi nia.”

<sup>25</sup> Yar ddarkoxl a bbeix: “Ngo saexl, Mirsaexlyal hherdder Zidu ddei mel lei var, yel cirza-hanga mel ngua leil bbeix gger lei.”

<sup>26</sup> Yisu yar leil ddarkoxl a bbeix: “Ni dax ddar biar dae ddei mel dder yar nga a.”

<sup>27</sup> Halcar a malmal Yisu dax mae dae ca mel jjixr lei a. Yaa Yisu ssormaer ar ddei dax ddar biar ggie mia a dder yarzi murgur, nael arseir lei Yisu leil “Ni azo li?” bbeixsael “Ni arsaenga a yar dax ddar biar?” nr biex. <sup>28</sup> Ssormaer ddei dder ajjix tirlabox olbbexr taex dol dae a, kax gga jjixr a, ca mel leil bbeix: <sup>29</sup> “Nia arleixr i lei, ca ar ddei a, ngo ca mul eil se azo lerler bei goxr lei maelmaerjjia bbeix teixl gger lei a. Holbbaexl yar dder Zidu nga a zzar?” <sup>30</sup> Yel ca mel dder kax gga ddux a, Yisu dax ssi.

<sup>31</sup> Ssormaer ddei kax gga jjixr halcar a, Yisu dax mae dae ca mel yar leil quex a bbeix: “Labir, ni zzorladox ardoxr zzor.”

<sup>32</sup> Yar yaa leil ddarkoxl a bbeix: “Ngo zzorddu zza, nia nr saexl arnar a.”

<sup>33</sup> Yar dax mae dae ca mel dder zzicarzzi dax bbeix: “Arseir yar leil zzorladox gger su zza a zzar?”

<sup>34</sup> Yisu yaa leil bbeix: “Ngo mel ngo leil miardal si lei hal ddei xiar dae

---

<sup>f</sup>**4:22** Ca leil jiuxlsu hal ddei mel Yoxrtaexl su ca mel gga ddux lei. Yar mel dder Yisu a.



mel dax bei mae dae, halae yar ngo leil miar gger mel bei jjia nia. Eil mel mel hherdder ngo ddei zzorddu sael a nga. <sup>35</sup> Nia bbeix ‘zeixleixr li xiubbo goxr a saelnei loxlmoxr se zi ci seir’, eine bbeix. Nael ngo nia leil bbeix gger, nia i ddo a; loxlmoxr mel mo dae ho a; se ssi cexr a.

<sup>36</sup> Loxlmoxr se su mel yaa worper li wo dae a. Yaa se dae loxlmoxr mel hherdder cirse-cirsil olga zza su ca hal mel nga a. Yel dae su nei se su lei ciryoxr a ggese. <sup>37</sup> ‘Ca eil ddei nael dae ji, ca hal ddei nael se ssi’, bbeix dae ddar eil qier bbeix hoxr. <sup>38</sup> Ngo nia leil miardal teixl a nia dae nr nga loxlmoxr mel se ssi lol, kebal ca mel nael dae sulku. Nia nael yaa sulku teixl lei mel se wo.”<sup>9</sup>

<sup>39</sup> Ssormaer hal ddei ca mel leil bbeix: “Yar ngo azo lerler bei goxr lei bbeix teixl lei a,” eine bbeix a. Yel halmaex gga Sarmarlixlyal su ca cirke a lei Yisu leil ddarzzi a. <sup>40</sup> Sarmarlixlyal su ca mel yoxl Yisu dax lei a yar leil qiuxr a, yaa dax hher dae lol. Yisu dder yaa dax nr ni hher a. <sup>41</sup> Ca seirseil ar ke a yoxl Yisu bbeix dae ddar mel leil bbejjiur a ddarzzi a.

<sup>42</sup> Yaa ssormaer hal ddei leil bbeix: “Ngua yar leil ddarzzi a mel, ni ddar bbeix dae mel leil bbejjiur a ddarzzi lar nr nga, ngua armael yar bbeix ggie bbejjiur a nga arddeir a. Yel ngua dder yar mel yarzi middurbbor cassor-worssor leil jiuxlsu ddei nga a saexl a.”

### Yisu Vaervaerpor Ddei Ssor Ddox Leil Ggukor Gger

<sup>43</sup> Yisu halmaex nr ni hher a dder Jialixllixl mermi jjixr a. <sup>44</sup> Yar bbeix goxr a bbeix: “Xiezi leil mel armael mermi su ca mel yar leil i nr du.”

<sup>45</sup> Yar halae Sarmarlixlyal mermi nei Jialixllixl mermi nr ssi seir, yar Yiluxlsaler zzi gga Yuelyuel jiax goxr ssi car a, Jialixllixl mermi su ca

---

<sup>9</sup>**4:38** Yilsi mel dder kebal su ca mel yarzi sulku ca mel leil arsae Arbosobo dax bei mae nia biar gger zaxr ho a. Yisu dax mae dae su ca mel yaa bei gier gex dae mel bei jjia a dder ddo a.

cirmelmel a lei halmaex gga jiax goxr ssi. Yaa Yisu Yiluxlsaler zzi gga cirza-hanga bei dae mel mia goxr a, yel Yisu Jialixllixl mermi ssi ci a halmaex gga ca mel dder yar leil hexl lei a.

<sup>46-47</sup> Yisu Jialixllixl mermi Jianaxr zzi halmaex jjixr ci a; hherdder halleix yar ajjix mel leil puxrto zzubbaer loxr lol ggie nga a. Halmaex mel vaervaerpor ar ddei zza. Yar ssor ddei mel Jiabaernoxxr kax gga hher dae a no lir dae. Yarbbor mel Yisu Yoxrtaexl mermi cirdae a Jialixllixl mermi lei ci a bbejjiur a dder, Yisu leil qiuxr ssi a, Jiabaernoxxr kax gga yar ssor ddox leil ggukor gger ssi lol.

<sup>48</sup> Yel Yisu yar leil ddarkoxl a bbeix: “Nia ca eil mel mel ddoddomo murgurgurmo bei ggie nr mia a mel, nia dder ddar-nr-zzi.”

<sup>49</sup> Yar Yisu leil ddarkoxl a bbeix: “Seirpor, ni leil qiuxr, eilcar ngo ssor ddox halae nr si seir dder ni ngo dax cirgo a ssi a ni yar leil kor lol.”

<sup>50</sup> Yisu yar leil ddarkoxl a bbeix: “Ni jjixr ddo a; ni ssor ddox kor ho a.” Yar Yisu ddei ddar mel leil ddarzzi a dder jjixr a.

<sup>51</sup> Yar jjiumo car gga ssi dae car, yar leil visser su mel yar dax lei a bbeix: “Ni ddei ssor ddox kor ho a,” eine bbeix a. <sup>52</sup> Yar yaa leil biex a bbeix: “Ngo ssor ddox arddolcar kor du lei a?” Yaa ddarkoxl a bbeix: “Arni 1:00 ci a, sa ddei dder nr faex dae a.” <sup>53</sup> Yel yar dder holcir du lei a; halcar malmal Yisu yar leil bbeix ni ssor ddox kor ho a eine bbeix a. Yel yaa cirhhexr-lorbba dder Yisu leil ddarzzi a. <sup>54</sup> Eilboxl mel Yisu Yoxrtaexl mermi cirdae a Jialixllixl mermi jjixr ci a, Arbosobo lar bei var ddoddomo nr boxl ddei bei dae a.

## 5

### Yisu Bixsixldaxl Ajjix Bbeddur Dax Ca Leil No Ggukor Gger

<sup>1</sup> Eine goxr ho a, Yisu mel Yiluxlsaler zzi gga ssi a, Yoxrtaexl mermi su ca mel ddei jiax ar ddei goxr ssi. <sup>2</sup> Yiluxlsaler zzi gga alddur ar peixl leil

mel Ya alddur eine ae. Halmaex mel ajjix bbeddur ar bbe zza. Xiboxrlaexr ddar bbeix a mel Bixlsixldaxl bbeddur bbeix. Bbeddur qier leil mel gieyi sael a ngor zex zza. <sup>3</sup> Halmaex mel mia nr xie su ca, pirdael su ca, taba su ca, cirza-hanga no su ca cirke guir dae. <sup>4</sup> [Yaa tisir mel ajjix bbe leil ggiex lei car a leil xia dae a, ajjix bbe lo dae car a arseir hoba ajjix bbe gga ddir a mel arddolyox no lei kor var.]<sup>h</sup> <sup>5</sup> Capor ar ddei a mel soceiheixl koxl no ho a. <sup>6</sup> Yisu yar halmaex guir dae ggie mia a dder yar hormo nixixl no ho a saexl a, yar leil biex a bbeix: “Ni kor niazzirzzir?”

<sup>7</sup> Yar ddarkoxl a bbeix: “Seirpor, ajjix bbe ha dae car a zzae arseir lei ngo leil ajjix bbe gga dol ji gger su nr zza; ngo ze niazzir loci a zzae si ngo xilmeir leil ze jixr ho a.”

<sup>8</sup> Yisu yar leil miardal a bbeix: “Ha du la! Ni ddei goxrzeix ddei vei dae a ssi ddo a!” bbeix a.

<sup>9</sup> Yar halcar dder kor a, yel yar ddei goxrzeix ddei vei dae a ssi a. Jiajia hal cir ni malmal mel wornol nixixl<sup>i</sup> ggur. <sup>10</sup> Yel Yoxrtaexl su ca ddei vaervaerpor mel no ggukor ho ca hal ddei leil bbeix: “Eilni mel wornol nixixl a; ni goxrzeix ddei vei dae a mel niul ddei Lixlfaxr dax bbeix ci a mel nr cexr mar!”

<sup>11</sup> Yar ddarkoxl a bbeix: “Ngo leil no ggukor gger su ddei ngo leil bbeix: ‘Ni ddei goxrzeix ddei vei dae a, ssi ddo a,’ bbeix a naer!”

<sup>12</sup> Yaa yar leil bbeix: “Ni leil ‘Ni ddei goxrzeix ddei vei dae a, ssi ddo a,’ bbeix su ddei arseir a?”

---

<sup>h</sup>**5:4** *Yaa tisir mel ajjix bbe leil ggiex lei car a leil xia dae a, ajjix bbe lo dae car a arseir hoba ajjix bbe gga ddir a mel arddolyox no lei kor var.* Arbosobo Ddei Sul vaexr beil hal ber mel ddar eil qier nr zza.

<sup>i</sup>**5:9** *wornol nixixl/Yoxrtaexl su ca mel qiuxl ni cir ni malmal wornol nixixl goxr.*

<sup>13</sup> Halmaex mel ca yarzi sael miur, Yisu ajjix bbeddur dax nr hher dae ho a; ca cili gga hher ji dae a i teixl lei nr ddo, yel yar lei yar leil ggukor gger su ddei arseir a nr saexl a. <sup>14</sup> Giedae Yisu Arbosobo ddei xi zzaexggu gga, yar dax zzi a, yel yar leil bbeix: “Ni no ddei kor ho a. Ni zeixleixr zuixl bei nr ddo a. Nr nga a ni bir halleix leil lei larhor pex dae var.” <sup>15</sup> Ca hal ddei dder Yoxrtaexl su ca ddei vaervaerpor mel leil yar leil no ggukor gger su ddei mel Yisu a bbeix gger a.

### Yisu Mel Arbosobo Ddei Ssor A

<sup>16</sup> Yisu mel wornol nixixl cir ni ca leil no ggu gger a. Yel Yoxrtaexl su vaervaerpor mel dder Yisu leil kexiex. <sup>17</sup> Nael Yisu bbeix: “Ngabbor mel eilleix lei miar bei doxr dae, yel ngo lei miar bei doxr.” <sup>18</sup> Yar eine bbeix a Yoxrtaexl su ca ddei vaervaerpor mel gielgiel yar leil bei zil gger niazzir. Yar mel wornol nixixl ddei leiddur ddei dax bei nr mae lar nr nga a nei, halae Arbosobo mel Yarbbor a bbeix a. Yilsi mel dder yar mel Arbosobo dax ciryoxr a nga a.

<sup>19</sup> Yel Yisu yoxl yaa leil bbeix: “Ngo nia leil yarzi bbeix gger: Ssor ddei armael leil koxl dae a mel, yar dder azo lei bei nr cexr. Ssor ddei Arbbor leil bei ggie mia a mel, yar lei hal mel sael a bei. Arbbor azo bei mel Ssor ddei lei azo bei. <sup>20</sup> Arbbor mel Ssor ddei leil perniar a, yar bei dae cirza-hanga lei Ssor ddei leil i lol. Yar halae bir eil mel leil zoxlyoxl hal mel Ssor ddei leil i lol, yel nia leil murgur lol. <sup>21</sup> Bir dae a bbeix, Arbbor arsae si ho ca mel leil gol du xixl lei lol, yaa leil olga gger mel, ciryoxr a nga, Ssor ddei lei yar arseir leil olga gger niazzir mel dder arseir leil olga gger. <sup>22</sup> Arbbor mel arseir leil lei nr ser, ca leil ser quexrlixl ddei mel Ssor ddei leil gger ho a. <sup>23</sup> Yel ca maelmaerjjia leil Ssor ddei leil i du lol, hherdder Arbbor leil i du mel sael a nga. Ssor ddei leil i nr du su ca mel hherdder yar leil miardal si lei Arbbor ddei leil i nr du a.

<sup>24</sup> Ngo nia leil yarzi bbeix gger, ngo ddei ddar no su nei ngo leil miardal

si lei Arbosobo leil ddarzzi su ca mel, cirse-cirsil lei olga zza ho a; yaa leil mel zuixl dixl gger nr var. Yaa si a yoxl gol du xixl lei ho a.

<sup>25</sup> Ngo nia leil yarzi bbeix gger, nixixl ddei mel ci ddo jiur a; eilcar dder ci ho a; yel ca si ho mel Arbosobo ddei Ssor ddei qiurte ddei leil bbejjiur nia; bbejjiur su hazza dder gol du xixl lei var. <sup>26</sup> Arbosobo mel ca leil olga zza lol var, yar Ssor ddei lei ca leil olga zza lol var. Eil ddei mel Arbosobo yar leil bei lol arddeir a. <sup>27</sup> Arbosobo ddei Ssor mel dder Ca Ddei Ssor ddei nga a.<sup>j</sup> Yel yar yoxl yar Ssor ddei leil ca leil ser quexrlixl ddei gger ho a. <sup>28-29</sup> Nixixl ddei ci a mel, lixrbbaex gga hher ji dae ca maelmaerjjia lei yar qiurte ddei leil bbejjiur nia, halae lixrbbaex ddei gga ddux lei nia. Seirseir bei su mel nael gol du xixl lei a olga zza, nr seir bei su mel leil nael gol du xixl lei ho a zuixl dixl gger. Yel nia eil mel leil murgur nr ssa.<sup>k</sup> <sup>30</sup> Ngo armael dax zox dae arddeirnga a mel, ngo dder azo lei bei nr cexr. Ngo mel Arbosobo ngo leil arsae bbeix gger ngo dder arsae ser. Ngo armael xiar dae mel dax zox dae nr nga a nei, Arbosobo xiar dae mel dax zox dae a ser, yel ngo ca leil ser dae mel mel bbaehhex.

### Yisu Yar Arseir A Biar

<sup>31</sup> Ngo armael ddei armael, ngo arseir a ca leil biar gger ssi arddeirnga a mel, nia arsae ddarzzi var bbeixleir? <sup>32</sup> Nael ngo leil mel, ngo arseir a ca leil biar gger su ar ddei zza.<sup>l</sup> Ngo lei saexl, yar biar dae mel ngazi a.

<sup>33</sup> Halleix nia ca leil miardal a Yuehal dax ssi lol a, ngo leil biar dae ddarzi mel yar nia leil biar gger goxr a. <sup>34</sup> Ngo mel ngo arseir a ca leil biar gger su li nr nga. Nael ngo Yuehal leil biar a mel, nia leil jiuxl wo lol

---

<sup>j</sup>5:27 Arbosobo ddei Ssor nei Ca Ddei Ssor mel dder Yisu nga a.

<sup>k</sup>5:28-29 Martaexl Sul 25:31-46 nei Qirsixlluxl Sul 20:11-15 leil biar dae.

<sup>l</sup>5:32 Ca mel zzir dae a ca leil biar gger su mel dder Arbosobo nga a.

niazzir a nga arddeir a. <sup>35</sup> Yuehal mel hherdder de bbelelemo doxl dae hal zar sael a nga. Nia mel Yuehal dax ssi a yar ddei bbelele mel nia armael leil arleixr bbele lol, arleixr ggese lol a.

<sup>36</sup> Ngo bei dae miar mel mel ca mel leil ngo arseir a saexl lol a. Eil mel mel bir Yuehal ca leil biar gger dae mel leil lei zoxlyoxl. Ngo bei dae miar mel mel hherdder Ngabbor ngo leil bei jjia ssi lol mel nga a. Yel nia miar eil mel leil i dae a mel dder Ngabbor ngo leil miardal si lei arddeir a saexl ddo. <sup>37</sup> Ngo leil miardal si lei su Arbbor ddei lei ngo arseir a ca leil saexl lol a.<sup>m</sup> Nael nia mel zeixleixr lei yar ddei qiurte ddei leil bbejjiur nr seix, yar arsae arddeir a lei mia nr seix. <sup>38</sup> Nia mel yar miardal si lei hal ddei leil ddar-nr-zzi, yel yar ddei ddar mel lei nixmox zzar nr ji dae.

<sup>39</sup> Nia zzir dae a, nia zabbar seilseir a Arbosobo Ddei Sul ber zza dae a dder cirse-cirsil lei olga zza var, yel nia dder zabbar seilseir a Arbosobo Ddei Sul ber zza doxr. Arbosobo Ddei Sul ber mel dder ngo arseir a biar dae. <sup>40</sup> Nael nia zzael ngo dax eilmaex lei a olga li lei nr yuex.”

<sup>41</sup> “Ngo mel ca mel ngo leil kuar gger lol nr meixr. <sup>42</sup> Ngo nia nixmox zzar arsae xiar dae lei i teixl lei xie. Nia nixmox zzar mel Arbosobo leil per-nr-niar. <sup>43</sup> Ngo Ngabbor leil koxl dae a lei a zzael nia ngo leil nr li; nael ca mel armael leil koxl dae a lei arddeirnga a zzael, nia yaa leil li.

<sup>44</sup> Nia mel zzicarzzi leil kuar gger niazzir laInga; Arbosobo leil nia leil kuar gger lol nia-nr-zzir. Eine nga a mel, nia ngo leil arsae ddarzzi var bbeixleir?”

<sup>45</sup> “Nia, ngo Ngabbor meixsaer qier leil nia leil goxl var zzir nr ssa. Nia zzir dae a Moxrxi leil koxl dae a Arbosobo nia leil jiuxl var. Nael nia leil goxl su ddei mel Moxrxi malmal nga a. <sup>46</sup> Moxrxi sul leil vaexr dae mel mel ngo leil lei vaexr dae, yel nia yarzi Moxrxi leil ddarzzi arddeirnga a

---

<sup>m</sup>**5:37** Arbosobo mel ca mel bei nr var ddoddomo hal mel bei nei yar ddei sul ber sser dae a ca leil Yisu arseir a saexl lol.

mel, nia dder ngo leil lei ddarzzi var. <sup>47</sup> Nael nia yar vaexr dae mel leil lei ddar-nr-zzi a mel, ngo ddei ddar mel leil arsae ddarzzi var bbeixleir?”

## 6

### Yisu Ca Mel Leil Zzor Bbox Lol

<sup>1</sup> Eine goxr ho a, Yisu Yiluxlsaler zzi gga nr hher a. Yar Jialixllixl neixvi bbe dax lei ci a, cuaxr leil ddeix a neixvi bbe leil gger a. Neixvi eil bbe leil yoxl Tixrbirliryal neixvi lei bbeix. <sup>2</sup> Ca seirseil ar ke a mel, yar ddoddomo bei a no su ca mel leil ggukor gger ggie mia a dder yar dax mae dae.

<sup>3</sup> Yisu dder worga leil ddeix a, yar dax mae dae ca mel dax cirgo a cux dae a. <sup>4</sup> Halcar a mel Yoxrtaexl su ca ddei Yuelyuel jiax ddei ci ddo jiuur a.

<sup>5</sup> Yisu mel yar dax ca seirseil ar ke mae dae mia a; yar dder Feilixl dax bbeix: “Niul arddolmaex aba vae ssi a, ca eil ke leil zzor bbox lol bbeixleir?” <sup>6</sup> Yar ddar eil mel bbeix a mel Feilixl leil sixr i niazzir a bbeixarnar, arsae bei nia mel yar saexl ho a.

<sup>7</sup> Feilixl ddarkoxl a bbeix: “Piu nrxiu pir, hherdder nrxiu ni ddei worper sser a, aba vae ssi a, ca cir ddei leil ardoxr zzor lol zzorbbexlei loxr nr ddo.”

<sup>8</sup> Kebal Yisu dax mae dae ca, hherdder Ximexr Birdaexr ddei nimar Adaexrlixl Yisu leil bbeix: <sup>9</sup> “Eilmaex caporssor ar ddox a doxl ssu aba ngor pir nei ngol nnel vei dae, nael ca eine ar ke leil bbe zol a mel arsae loxr ddo bbeixleir?”

<sup>10</sup> Yisu dder yaa leil bbeix: “Nia ca mel leil cux dae lol,” eine bbeix a. Halmaex gga mel silbbar yarzi miur, yel ca mel dder cux dae a. Capor lillil dder ngordu sael zza. <sup>11</sup> Yisu dder aba mel vei du lei a, Arbosobo leil nawo ho a dder ngaxl kae a, yar dax mae dae su ca mel leil halmaex cux dae ca mel leil bbe gger lol a. Ngol mel lei eil mel sael a ca mel leil bbe gger a. Ca mel dder arsae zzor dil ddo arsae zzor a. <sup>12</sup> Yaa zzor bbox ho

a, Yisu dder yar dax mae dae ca mel leil bbeix: “Nia zzor nirzzei dae mel se du la, bei holpixl lol nr ddo.”<sup>13</sup> Yel yar dax mae dae ca mel dder ssu aba hal ngor pir zzor ho a nirzzei dae mel se du lei a; maelmaerjia a mel bellerzzi ceinir taex gga se ji bbi a.

<sup>14</sup>Ca mel Yisu ddoddomo bei ggie mia a dder bbeix: “Ca eil ddei mel dder Moxrxi bbeix middurbbor lei nia Xiezi hal ddei nga a mar,” eine bbeix a.<sup>15</sup> Yisu mel ca mel ddoddo-nrddo yar leil gga gex dae a, yar leil zzirmar bei lol du a saexl a, yar dder cirmuzil a ssi du si a, worga leil ssi a.

### Yisu Ajjix Teixlleil Ssi

<sup>16</sup>Mercixl halcar, Yisu dax mae dae ca mel neixvi qier leil ssi a,<sup>17</sup> cuaxr leil ddeix a yoxl neixvi bbe leil gger a Jiabaernoxxr kax gga ssi. Neixmar ho a lei, nael Yisu halae yaa dax halmaex nr lei seir.<sup>18</sup> Yaa ssi dae a, mersi daxlgaxl jia du lei a; bolaxl lei ddaexr du lei a.<sup>19</sup> Yar dax mae dae ca mel cuaxr jiaxl leil huaxr dae a seirseil a ar zixl huaxr teixl ho a.<sup>n</sup> Yaa mel Yisu neixvi teixlleil ssi dae a, yaa dax ssi gel lei ggie mia a, yel dder gexr zildu a.<sup>20</sup> Yisu yaa leil bbeix: “Ngo a nga; nia gexr nr ssa!”<sup>21</sup> Yaa dder ggesesemo Yisu leil cuaxr jiaxl leil deix lei lol a, yel cirleixr dder yaa ssi ggie halmaex ssi ci a.

### Yisu Mel Olga Zza Lol Var Loxlmoxxr Ddei A

<sup>22</sup>Giedae cir ni ci a, ca cirke a neixvi deixrgoxr Yisu ca leil aba bbe zol ggie halmaex hher dae seir. Yaa halmaex nor dae cuaxr hal jiaxl nr nor dae ho a mia a; yaa dder Yisu yar dax mae dae ca mel dax cirgo a cuaxr jiaxl leil nr ddeix, yaa ddei yaa ssi lalnga saexl a.<sup>23</sup> Tixrbirliryal zzi dax ddux lei cuaxr nr jiaxl sael a mel neixvi qier leil nor dae, hherdder Seirpor Yisu aba vei dae a, Arbosobo leil nawo ho a ca mel leil bbe zol

---

<sup>n</sup>**6:19** Yaa 5–6 golir sael huaxr teixl ho a.



ggie halmaex dax naer dae a. <sup>24</sup> Ca cirke a Yisu nei yar dax mae dae ca mel lei halmaex nr hher dae saexl a; yel yaa dder cuaxr mel leil ddeix a, Jiabaernoxt kax gga ssi a Yisu leil zo ssi a. <sup>25</sup> Yaa neixvi deixrgoxr Yisu leil zo wo a, yar leil biex a bbeix: “Labir, ni arddolcar a eilmaex lei ci a leir?”

<sup>26</sup> Yisu ddarkoxl a bbeix: “Ngo nia leil yarzi bbeix gger, nia ngo leil zo a mel ddoddomo hal mel bei ggie mia a zo nr nga, nia ngo dax aba zzor bbox a zo arnar a. <sup>27</sup> Nia xiaxr var zzorlabox mel leil weix a sulku nr ddo, cirse-cirsil lei dol dae cexr zzorlabox<sup>o</sup> mel leil weix a sulku nia. Eil mel mel dder Ca Ddei Ssor ddei nia leil gger mel nga a. Yar eine bei cexr a mel Arbbor Arbosobo yar leil quexrlxl gger ca mel leil mia lol arddeir a.”

<sup>28</sup> Yaa biex a bbeix: “Nguaz azo bei a saelnei Arbosobo ddei miar bei suax?”

<sup>29</sup> Yisu yaa leil ddarkoxl a bbeix: “Nia Arbosobo miardal si lei hal ddei leil ddarzzi nia. Eil ddei mel dder Arbosobo nia leil miar bei lol ddei nga a.”

<sup>30</sup> Yaa yoxl bbeix: “Ni arddolyox ddoddomo bei a, ngua leil i lol, yel ni leil ddarzzi lol neil? Ni bei ddo a! <sup>31</sup> Niul porpor mel mel mipaerbbae gga *marnaxr* zzor a; hherdder Arbosobo Ddei Sul ber leil vaexr dae mel sael a bbeix: ‘Yar merlabbor zzorlabox zei lei lol a yaa leil zol a,’ ”<sup>p</sup> eine bbeix a.

<sup>32-33</sup> Yisu bbeix: “Ngo nia leil yarzi bbeix gger, Arbosobo nia leil

---

<sup>o</sup>**6:27** *cirse-cirsil lei dol dae cexr zzorlabox* Ca cirmemel a zzir dae a “cirse-cirsil lei dol dae cexr zzorlabox” mel dder Yisu leil bbeix. Yoxl ca cirmemel a zzir dae a “cirse-cirsil lei dol dae cexr zzor labox” mel dder Arbosobo ddei miar mel leil bbeix.

<sup>p</sup>**6:31** Cu'aezixr Sul 16:4 leil vaexr dae.

loxlmoxr<sup>9</sup> gger dae mel mel hherdder merlabbor zeil lei su hal ddei nga a. Yar middurbbor ca mel leil olga gger. Yel merlabbor zeil lei loxlmoxr yarzi mel mel Moxrxi nia leil gger nr nga a nei, Ngabbor nia leil gger arddeir a.”

<sup>34</sup> Yaa bbeix: “Seirpor, ni loxlmoxr eil mel cirleixr nr nor ngua leil gger la!”

<sup>35</sup> Yisu yaa leil bbeix: “Ngo mel dder ca leil cirse-cirsil lei olga zza lol var loxlmoxr ddei nga a. Ngo dax lei su mel cirse-cirsil lei meixr nr var, ngo leil ddarzzi su mel cirse-cirsil lei si nr var. <sup>36</sup> Nael ngo nia leil bbeix gger goxr a: nia ngo leil mia goxr ho a lei, halae ngo leil ddar-nr-zzi.

<sup>37-38</sup> Ngo merlabbor cirdae a middurbbor zeil lei a mel, arsae bei niazzir arsae bei nr nga a nei, ngo leil miardal si lei su hal ddei xiar dae mel sael a bei dae arddeir a. Yel ha Ngabbor ngo leil gger ca mel dder ngo dax lei var; ngo dax eilmaex lei su mel, ngo dder cirse-cirsil piar pixl gger nr var.

<sup>39-40</sup> Ngabbor xiar dae ddei mel dder, ngo yar ddei ssor nga saexl nei ngo leil ddarzzi su maelmaerjjia leil cirse-cirsil lei olga zza lol, halae nixixl ddei maelele ci a ngo yaa leil gol du xixl lei lol. Yel ngo leil miardal si lei su hal ddei xiar dae ddei mel dder, yar ngo leil gger ca hal mel ngo cir ddei lei nr pixl lol, halae nixixl ddei maelele ci<sup>5</sup> a, yaa leil gol du xixl lei lol.”

<sup>41</sup> Yisu bbeix: “Ngo mel dder merlabbor zeil lei loxlmoxr ddei nga a,” eine bbeix a. Yel Yoxrtaexl su ca mel bbejjiur a dder yar leil kerbiar dae

---

<sup>9</sup>6:32-33 *loxlmoxr* Xilaxl ddar mel aba eine bbeix.

<sup>5</sup>6:39-40 *nixixl ddei maelele ci* Arddolcar a Yisu jjixr lei a yar leil ddarzzi su ca mel leil jiuxl, yar leil ddar-nr-zzi su ca mel leil nael faxr. Hane ci a mel yar zzirmar vaer zzir ddei bei nia. Yar Yiluxlsaler zzi gga cirdae a middurbbor ca maelmaerjjia leil guaxr. Qirsixlluxl Sul leil biar dae.

a bbeix: <sup>42</sup> “Ca eil ddei doxl nr nga Yuesaexl ddei ssor Yisu ar nga zzarmar? Yarbbor yarma leil lei niul saexl zzarmar? Yar eilcar arsaenga a bbeix: ‘Ngo mel dder merlabbor zei lei ddei nga a,’ eine bbeix leir?”

<sup>43</sup> Yisu bbeix: “Nia zzicarzzi dax kerbiar nr ddo. <sup>44</sup> Ngo leil miardal si lei su ddei mel dder Ngabbor nga a. Yar ca mel leil ngo dax eilmaex nr lei lol arddeirnga a, ca mel dder arseir lei ngo dax eilmaex lei nr var. Ngo dax eilmaex lei su ca ha nga mel, nixixl ddei maelele ci a, ngo dder yaa leil gol du xixl lei lol nia. <sup>45</sup> Arbosobo Ddei Sul ber gga xiezi vaexr dae a bbeix: ‘Yaa maelmaerjjia leil Arbosobo mul gger nia.’<sup>t</sup> Arbosobo mul gger dae mel leil noni dil su mel dder ngo dax eilmaex lei var. <sup>46</sup> Arseir lei Arbbor Arbosobo leil mia nr goxr, Arbosobo dax halmaex ddux lei su hal ddei larnei yar leil mia goxr.

<sup>47</sup> Ngo nia leil yarzi bbeix gger, ngo leil ddarzzi su mel dder cirse-cirsil lei olga zza. <sup>48</sup> Ngo mel dder olga zza lol var loxlmoxr ddei nga a. <sup>49</sup> Nia porpor mel mipaerbbae gga *marnaxr* zzor wo a lei, yaa halae si a. <sup>50</sup> Nael ca mel merlabbor zei lei loxlmoxr eil ddei zzor a mel, yaa dder si nr var. <sup>51</sup> Ngo mel dder merlabbor zei lei a ca leil olga zza lol var loxlmoxr eil ddei nga a. Loxlmoxr eil ddei zzor su ca mel dder cirse-cirsil lei olga zza. Ngo ca leil loxlmoxr zollabox mel mel hherdder ngo ddei hoxrneixr mel nga a. Ngo mel middurbbor ca mel leil olga zza lol a ngo ddei ggecir ddei yaa leil gger nia.”<sup>u</sup>

<sup>52</sup> Yel Yoxrtaexl su ca mel dder daxlgaxl zex du lei a bbeix: “Ca eil ddei, yar armael ddei hoxrneixr mel niul leil arsae zol cexr bbeixleir?”

<sup>53</sup> Yisu bbeix: “Ngo nia leil yarzi bbeix gger, nia Ca Ddei Ssor ddei

---

<sup>t</sup>**6:45** Yirsaexlyal Sul 54:13 leil vaexr dae.

<sup>u</sup>**6:51** Yisu ddei hoxrneixr zzor yilsi mel dder Yisu leil ddarzzi. Yisu leil ddarzzi nia, eine saelnei jiuxl wo ddo. Yisu armael ggecir ddei ca leil gger yilsi mel dder yar ca mel leil weix a si nia.

hoxrneixr nr zzor nei yar ddei sirnilni nr dda arddeirnga a, nia dder cirse-cirsil olga zza nr var.<sup>54</sup> Ngo ddei hoxrneixr zzor su nei ngo ddei sirnilni dda su mel dder cirse-cirsil lei olga zza; nixixl ddei maelele ci a, ngo halae yar leil gol du xixl lei lol nia.<sup>55</sup> Nia ngo ddei hoxrneixr zzor, ngo ddei sirnilni dda a mel, yarzi gol dae cexr.<sup>56</sup> Ngo ddei hoxrneixr zzor su nei ngo ddei sirnilni dda su mel, ngo lei yar dax hher ji dae, yar lei ngo dax hher ji dae.<sup>57</sup> Cirse-cirsil lei gol dae Arbbor ddei mel ngo leil miardal si lei su ddei nga a. Ngo mel yar leil koxl dae a gol dae, ciryoxr a nga ngo ddei hoxrneixr zzor su mel lei ngo leil koxl dae a gol dae.<sup>58</sup> Ngo mel hherdder merlabbor zei lei loxlmoxr mel nga a. Ha zzor su mel dder cirse-cirsil lei olga zza. Loxlmoxr eil mel mel nia porpor mel mipaerbbae gga zzor dae *marnaxr* mel le-nr-sel. Yaa *marnaxr* mel zzor a lei halae si a,” eine bbeix a.

<sup>59</sup> Ddar eil mel mel Yisu Jiabaernoxxr kax gga Yoxrtaexl su mel Arbosobo ddei sulzzaggie ca leil mul gger car a bbeix ar mel a.

### Yisu Dax Mae Dae Su Cirke A Yar Dax Nr Mae

<sup>60</sup> Yar dax mae dae su ca cirke a ddar eil mel noni ho a dder bbeix: “Yar mul gger dae eil mel einezeixl noni wo sol mel, arseir noni dil xie bbeixleir?”

<sup>61</sup> Yisu mel yaa kerbiar dae saexl a dder yaa leil bbeix: “Ddar eil mel nia leil ngo leil zeixleixr ddar-nr-zzi lol a ngo? <sup>62</sup> Nia Ca Ddei Ssor ddei yar hher goxr ggie halmaex ddeix jjixr ci ggie mia arddeirnga a, nia arsae xiar var? <sup>63</sup> Arbosobo ddei Xiu ddei ca leil olga zza lol arnar. Ca mel lei azo lei bei nr cexr. Ngo nia leil biar gger ddar mel Arbosobo ddei Xiu ddei biar lol a. Ddar eil mel mel ca leil olga zza lol. <sup>64</sup> Nael nia ca mel gga cirmelmel a zzael ddar-nr-zzi,” eine bbeix. Yisu mel yar ca leil mul gger beil halcar dder ca arddol mel yar leil ddar-nr-zzi, arseir yar leil vur lel var saexl ho a. <sup>65</sup> Yar yoxl bbeix: “Eine nga a ngo dder halleix nia leil:

‘Ngabbor ca mel leil ngo dax nr lei lol arddeirnga a mel, arseir lei ngo dax eilmaex lei nr var,’ eine bbeix gger arddeir a.”

<sup>66</sup> Hane zzezze mel, yar dax mae dae ca cirke a mel ssi du si a, yar dax nr mae a. <sup>67</sup> Yel Yisu yar dax mae dae ca hal ceinirmo leil bbeix: “Nia ssi ssi?”

<sup>68</sup> Ximexr Birdaexr ddarkoxl a bbeix: “Seirpor, ni ddei ddar mel ca mel leil cirse-cirsil olga zza lol var mel, ngua ni dax nr mae a, halae arseir dax mae ssi bbeixleir? <sup>69</sup> Ngua ni leil ddarzzi, ngua halae saexl, ni mel Arbosobo dax lei a, seirceix-seirmaer zuixl nr zza hal ddei nga a.”

<sup>70</sup> Yisu bbeix: “Ngo doxl nia leil ceinirmo tiur a zzarmar? Nael nia ca mel gga neir zzirmar te ca dae.” <sup>71</sup> Yisu ddar eil mel bbeix a mel Jialuxl mermi su Ximexr ddei ssor Yoxrdaxl leil bbeix arddeir a. Yoxrdaxl mel Yisu miardal dae ca ceinirmo gga ar ddei a. Hherdder giedae ci a Yisu leil vurlelsu te nga a.

## 7

### Yisu Ddei Nimar Mel Yar Leil Ddar-nr-zzi

<sup>1</sup> Eine goxr ho a, Yoxrtaexl su ca ddei vaervaerpor mel Yisu leil seixl niazziir dae a, yel Yisu dder Yoxrtaexl mermi nr ssi, Jialixllixl mermi cirmaex-hanga ssi lalnga a. <sup>2</sup> Halcar a Yoxrtaexl su ca ddei Zaxlpoxr Jiax<sup>v</sup> ddei mel ci ddo jiur a. <sup>3-4</sup> Yisu ddei nimar mel dder yar leil bbeix:

---

<sup>v7:2</sup> *Zaxlpoxr Jiax* Halleix Yirsaexllixl su ca mel Aezixr goxrjia ddux lei ho a, yaa mipaerbbae gga licei koxl ssi za doxr a. Halcar a mel yaa zaxlpoxr gga hher. Zaxlpoxr mel mel mae bbeixsael zzi bei teixl lei. Nael giedae ci a Jianaxr mermi ssi ci a dder halmaex hher dae a. Yel yaa mipaerbbae gga ssi za goxr nixixl hal mel leil holcir dae a dder bbecir-bbekoxl lei “Zaxlpoxr jiax” goxr arddeir a. Yaa Zaxlpoxr jiax goxr

“Ca mel middux niazzir arddeirnga a mel dder, miar bei a arjjiuljjiu a bei nr cexr. Ni ddoddomo eil mel bei var a mel dder cassor-worssor meixsaer qier leil bei a yaa leil i lol nia. Ni eilmaex hher nr ssa a; Yoxrtaexl mermi ssi ddo a! Yel ni dax mae dae ca mel leil ni bei dae mel leil arleixr i lol.”<sup>5</sup> Yisu ddei nimar mel lei yar leil eine bbeix a mel, yaa yar leil ddar-nr-zzi a nga arddeir a.

<sup>6</sup> Yel Yisu yaa leil bbeix: “Ngo ssi nia nixixl ddei mel halae nr ci seir, nael nia mel arddolcar ssi niazzir dder ssi cexr.”<sup>7</sup> Middurbbor ca mel nia leil vuxryixr nr var, nael ngo mel yaa nr seir bei dae mel yaa leil bbeix teixl gger lei a, yel yaa ngo leil vuxryixr.<sup>8</sup> Nia ddei nia ssi a jiax goxr ssi ddo a! Ngo ssi nia nixixl ddei mel halae nr ci seir, yel ngo eilcar nr ssi seir.”<sup>9</sup> Yisu ddar eil mel bbeix ho a yar halae Jialixllixl mermi hher dae seir.

### Yisu Zaxlpoxr Jiax Goxr

<sup>10</sup> Yisu nimar mel ssi jixr ho a, giedae yar lei jiax goxr ssi a; nael yar daxmeix ssi nr nga, arjjiuljjiu a ssi.<sup>11</sup> Jiax ddei gga malmal Yoxrtaexl su ca ddei vaervaerpor mel lei Yisu leil zo dae a bbeix: “Yar arddolmaex hher dae?”<sup>12</sup> Ca mel lei Yisu leil daxlgaxl-daxllixl biar dae a. Ca cirmelmel a nael bbeix: “Yar mel ca seir ar ddei a.” Ca cirmelmel a nael bbeix: “Nr nga, yar mel ca mel leil fur dae.”<sup>13</sup> Nael ca mel Yoxrtaexl su ddei vaervaerpor mel leil gexr a, yaa biar dae a ca leil saexl lol nr bel.

<sup>14</sup> Jiax ddei cir peix goxr ho a, Yisu dder Arbosobo ddei xi zzaexggu gga ddir a ca leil mul gger dae.<sup>15</sup> Yoxrtaexl su ca ddei vaervaerpor mel lei murgur a bbeix: “Ca eil ddei mel sul lei hormo ardoxr zza nr goxr mar, yar arsaenga a cirza-hanga lei eine saexl leir?”

<sup>16</sup> Yisu ddarkoxl a bbeix: “Ngo mul gger dae mel mel ngo ddei ngo xiar

---

car, yaa zaxlpoxr gga hher.

teixl lei nr nga, ngo leil miardal si lei hal ddei ngo leil mul gger a. <sup>17</sup> Ca mel Arbosobo xiar dae mel dax bei mae dae a mel, yaa dder ngo mul gger dae mel Arbosobo ngo leil mul gger bbeixsael ngo ddei ngo xiar teixl lei saexl var. <sup>18</sup> Armael xiar teixl lei mel sael a mulggersu ca mel dder armael leil middux lol niazzir lalnga; nael Arbosobo leil middux lol niazzir su ca hal ddei mel ca nr fur lei; yar nixmox zzar nr seir lei nr zza. <sup>19</sup> Moxrxi doxl nia leil Lixlfaxr dixl gger a zzarmar? Nael nia Lixlfaxr dax bei mae su lei ar ddei nr zza. Nia arsaenga a ngo leil seixl niazzir leir?”

<sup>20</sup> Ca mel ddarkoxl a bbeix: “Ni leil neir xiex a boxllor? Arseir ni leil seixl var bbeixleir?”

<sup>21</sup> Yisu bbeix: “Ngo wornol nixixl cir ni ddoddomo ar ddei bei a, nia maelmaerjia dder yarzi murgur.<sup>w</sup> <sup>22</sup> Nael Moxrxi nia leil gelir<sup>x</sup> bei nia miardal a, nia dder wornol nixixl cir ni lei caporsor mel leil gelir bei gger. Gelir bei a mel nga zzael Moxrxi dax bei du lei beil nr nga, Moxrxi xilmeir leil niul ddei porpor mel bei du lei beil arddeir a. <sup>23</sup> Nia wornol nixixl cir ni gelir bei a, Moxrxi miardal dae Lixlfaxr ddei dax bei mae dae a bei arddeirnga a mel, halmel, ngo wornol nixixl cir ni ca ar ddei leil kor gaxzi lol a, nia arsaenga a ngo leil sirzzi leir? <sup>24</sup> Nia mel ca ddei leil i dae a dder arddol mel hoxr, arddol mel nr hoxr eine bbeix nr ddo; bbaehhexhhexmo bei nia.”

### Yisu Mel Zidu A Zzar?

---

<sup>w</sup>**7:21** Yoxrtaexl su ddei Lixlfaxr dax zox dae a mel wornol nixixl cir ni miar bei nr ddo. Yoxrtaexl su vaervaerpor ar mel zzir dae a Yisu ca leil no ggukor gger a mel dder miar bei a. Yel yaa Yisu leil sirzzi a, yar leil seixl niazzir.

<sup>x</sup>**7:22** *gelir* Gelir bei mel dder capor ddei sirbeixlddur olniuxniux zzi ddei caer teixl gger.

<sup>25</sup> Yiluxlsaler zzi gga su ca ar mel a bbeix: “Ca eil ddei doxl niul ddei vaervaerpor mel seixl niazzir dae hal ddei nga a zzarmar? <sup>26</sup> Nia ardae i, yar daxmeix Arbosobo ddei ddar biar dae lei, niul ddei vaervaerpor lei yar leil dir su nr zza. Holbbaexl yaa lei yar mel dder yarzi Zidu ddei nga a saexl ho a ngo? <sup>27</sup> Nael Zidu ddei lei car a doxl, yar arddolmaex lei arseir lei nr saexl; ca eil ddei arddolmaex lei doxl niul saexl arddeir a lo.”

<sup>28</sup> Yel Yisu mel Arbosobo ddei xi zzaexggu gga hher dae a ca leil mul gger dae a, worcixl-worni bbeix: “Nia mel ngo leil saexl, ngo arddolmaex lei nia lei saexl. Ngo lei a mel, armael dax zox dae a lei nr nga. Ngo leil miardal si lei su hal ddei mel yarzi ddei nga a ca nr fur lei. Nia mel yar leil nr saexl. <sup>29</sup> Nael ngo mel yar dax halmaex lei, yar ngo leil miardal si lei arddeir a; yel ngo mel yar leil saexl,” eine bbeix a. <sup>30</sup> Yaa dder yar leil ssu du lei niazzir, nael yar ddei nixixl ddei mel halae nr ci seir, yel yar leil ssu su nr zza.

<sup>31</sup> Ca mel gga ca cirke a lei yar mel Zidu a ddarzzi a, yaa bbeix: “Zidu ddei lei a ddoddomo bei a bir ca eil ddei bei dae mel leil miur leixl var a ngo?”

<sup>32</sup> Cassor-worssor mel Yisu leil daxlgaxl biar dae a Farlixlsaexl su ca mel bbejjiur a; yaa nei Arbosobo leil zi su vaervaerpor mel dder Arbosobo ddei xi zzir leil su su mel leil miardal a, Yisu leil ssu ssi lol.

<sup>33</sup> Yisu bbeix: “Ngo halae nia dax arleixr hher mael seir, nael cirleixr dder ngo mel ngo leil miardal si lei su hal ddei dax jjixr du a. <sup>34</sup> Nia ngo leil zo var, nael zo wo nr xie. Ngo ssi ggie halmaex mel nia ssi nr cexr.”

<sup>35</sup> Yoxrtaexl su ca mel dder zzicarzzi leil biex a bbeix: “Ca eil ddei arddolmaex ssi a, niul leil yar leil zo wo nr xie lol leir? Holbbaexl yar Xilaxl su ca mel dax cirgo a hher dae Yoxrtaexl su ca mel dax ssi a ngo? Yel Xilaxl su ca mel leil mul gger ssi zzar? <sup>36</sup> Halmel, yar bbeix: ‘Nia ngo



leil zo var, nael zo wo nr xie. Ngo ssi ggie halmaex mel nia ssi nr cexr,' bbaexl bbeix dae ddar eil mel azo yilsi a leir?"

### **Olga Vi**

<sup>37</sup> Jiax ddei maelele goxr ci hal cir ni mel dder worvaer zzir cir ni nga a. Hal cir ni Yisu ngier du lei a, worcixl-worni bbeix: "Ajjix sixl su mel dder ngo dax eilmaex dda lei nia. <sup>38</sup> Arbosobo Ddei Sul ber leil bbeix: 'Yaa nixmox zzar mel olga vi pe teixl lei nia,' eine bbeix a mel ngo leil ddarzzi su ca mel leil bbeix arddeir a." <sup>39</sup> Yisu ddar eil mel bbeix a mel, Arbosobo ddei Xiu ddei leil bbeix arddeir a. Arddolcar a Yisu yar leil ddarzzi su ca mel leil gger nia. Halcar a mel, Arbosobo mel ca mel leil Yisu einezeixl ddo, einezeixl quexrlixl zza nr mia lol seir, yel yar halae Arbosobo ddei Xiu ddei yaa leil nr gger seir.

### **Ca Mel Yisu Leil Weix A Zzidax Zex**

<sup>40</sup> Ca mel ddar eil mel bbejjiur a, cirmelmel a dder bbeix: "Yar mel yarzi Moxrxi bbeix dae Xiezi hal ddei a." <sup>41</sup> Cirmelmel a nael bbeix: "Yar mel Zidu a." Yoxl cirmelmel a bbeix: "Zidu mel arsae Jialixllixl mermi ddux lei var bbeixleir? <sup>42</sup> Nr nga Arbosobo Ddei Sul ber leil doxl vaexr dae a bbeix: 'Zidu mel Daxlweixl giedae ca a; yar leil mel Daxlweixl hher goxr mermi Boxrlxlhexr kax gga xiu teixl lei nia,' bbeix goxr a zzarmar?" <sup>43</sup> Yel ca mel dder Yisu leil weix a zzi dax zex du lei a. <sup>44</sup> Halae ca cirmelmel a nael yar leil ssu du lei niazzir, nael arseir lei yar leil nr ssu.

### **Yoxrtaexl Su Ca Ddei Vaervaerpor Mel Yisu Leil Ddar-nr-zzi**

<sup>45</sup> Arbosobo ddei xi zzir leil su su mel Arbosobo leil zi su vaervaerpor nei Farlixlsaexl su ca mel dax jjixr ci a, yaa ca hal mel leil biex a bbeix: "Nia arsaenga a Yisu leil ssu nr xixl lei?"

<sup>46</sup> Yaa ddarkoxl a bbeix: "Nguaz zeixleixr lei ddar biar a yar sael a eine biar su ar ddei mia nr seix."

<sup>47</sup> Farlixsaexl su ca mel bbeix: “Yar nia leil lei fur a ngo?”

<sup>48</sup> Vaervaerpor nei Farlixsaexl su ca mel arseir yar leil ddarzzi var bbeixleir? <sup>49</sup> Nael cassor-worssor eil mel mel Moxrxi ddei Lixlfixr nr saexl a yar leil ddarzzi; Arbosobo yaa leil sirzzi dae a, yaa zoxr a!”

<sup>50</sup> Halleix Yisu leil i ssi goxr Nixrgedirmur mi hherdder yaa dax ciryoxr a vaervaerpor hal ddei yaa leil bbeix: <sup>51</sup> “Ca ar ddei a si yar leil goxl, yel vaervaerpor mel yar leil ser lei nr ser dder zuixl dixl gger a; niul ddei Lixlfixr eine bei ddo a ngo?”

<sup>52</sup> Yaa ddarkoxl a bbeix: “Ni lei Jialixllixl su ca a zzar? Ni Arbosobo Ddei Sul ber leil i a dder saexl a; Jialixllixl mermi mel xiezi nr ddux lei.”<sup>y</sup>

*Arbosobo Ddei Sul vaexr beil mel gga 7:53–8:11 ddar eil mel nr zza.*

<sup>53</sup> Yel ca mel dder armael ddei armael ake jjixr a.

## 8

### Capor Dax Kerjiar Su Ssormaer

<sup>1</sup> Yisu nael Saercor worga ga leil ssi a. <sup>2</sup> Giedae cirnehe merteir a, yar yoxl Arbosobo ddei xi zzaexggu gga jjixr lei a. Yel ca mel yar dax lei a, yar dder cux dae a ca mel leil mul gger. <sup>3</sup> Arbosobo ddei sulsaxlsu ca mel nei Farlixsaexl su ca mel capor dax kerjiar dae ssormaer ar ddei ssu gex dae a. Yaa dder yar leil hier si lei a, ca mel agala gga ngier dae lol a, <sup>4</sup> Yisu leil bbeix: “Labir, ssormaer eil ddei capor dax kerjiar dae car a, yar leil ssu gex dae a. <sup>5</sup> Moxrxi Lixlfixr leil niul leil miardal goxr a; eil

---

<sup>y7:52</sup> *Jialixllixl mermi mel xiezi nr ddux lei.* Arbosobo Ddei Sul cirberber a bbeix: “Xiezi hal ddei mel Jialixllixl mermi ddux lei nr nga,” eine bbeix.

mel sael a ssormaer mel leil mel legelbbe sser a zax zil gger nia. Ni zzir dae a arsae bei nia?”

<sup>6</sup> Yaa ddar eil mel bbeix a Yisu leil sixr i niazzir, yel yar ddei nomaex ddei leil zo teixl lei a yar leil goxl niazzir. Nael Yisu mel golmer zei doxr dae a leixrni ddei sser a middur ddei leil sul vaexr. <sup>7</sup> Yaa cirleixr nr nor Yisu leil biex doxr a, Yisu dder ngier zzar du lei a yaa leil ddarkoxl a bbeix: “Nia ca mel gga arseir zuixl bei nr goxr arddeirnga a, arseir dder hoba legelbbe vei a yar leil zax ddo a.” <sup>8</sup> Yisu ddar eil mel bbeix teixl ho a, yoxl golmer zei xixl a middur ddei leil sul vaexr.

<sup>9</sup> Ca mel ddar eil mel noni ho a dder mar su cirdae a, cirddeir-cirddeir ssi du si a. Yel Yisu nei ssormaer ddei lar halmaex hher dae a. <sup>10</sup> Yisu dder ngier zzar du lei a ssormaer hal ddei leil biex a bbeix: “Yaa arddol ssi jixr a leir? Arseir lei ni leil zuixl dixl gger su nr zza a ngo?”

<sup>11</sup> Ssormaer ddei ddarkoxl a bbeix: “Seirpor, nr zza.”

Yisu bbeix: “Ngo lei ni leil zuixl dixl nr gger, ni ssi ddo a! Ni zeixleixr lei zuixl tor nr bei hor.”

### **Yisu Mel Middurbbor Cassor-worssor Ddei Bbelele Ddei Nga A**

<sup>12</sup> Yisu yoxl ca mel leil bbeix: “Ngo mel middurbbor cassor-worssor ddei bbelele ddei nga a. Ngo dax mae lei su mel mel dder cirse-cirsil neixmar ggie ssi dae nr nga, ngo yaa leil bbele lol a, cirse-cirsil lei olga li wo lol.”

<sup>13</sup> Yel Farlixsaexl su ca mel yar leil bbeix: “Ni mel armael ddei armael ni arseir a ca leil biar gger, yel ni biar dae mel mel nga-nr-zi, ngua ni leil ddar-nr-zzi.”

<sup>14</sup> Yisu bbeix: “Ngo arddolmaex gga lei nei ngo arddolmaex gga ssi nia ngo saexl, yel ngo armael ddei armael ca mel leil ngo arseir a biar gger zzorbbeixlei, ngo biar dae mel mel ngazi a. Nael nia zzael ngo arddolmaex gga lei, yoxl arddolmaex gga ssi nia, nr saexl. <sup>15</sup> Nia mel middurbbor ca mel xiar dae mel dax zox dae a, ca mel leil hoxr bbeixsael

nr hoxr bbeix, nael ngo mel ca mel leil hoxr bbeixsael nr hoxr nr bbeix.

<sup>16</sup> Ngo ca mel leil ser a mel, ngo cirmuzil lar ser dae nr nga, ngo leil miardal si lei su Ngabbor ddei ngo dax cirgo a ca mel leil ser. Yel ngo ca mel leil hoxr bbeixsael nr hoxr bbeix zzorbbeixlei, ngo bbeix dae mel mel yarzi a. <sup>17</sup> Nia ddei Lixlfaxr leil vaexr dae a bbeix ca nnel a, yaa si leil biar dae ddar mel ciryoxr a nga arddeirnga a mel, yaa bbeix dae mel dder ngazi a. <sup>18</sup> Ngo mel armael ddei armael ngo arseir a ca leil biar gger, halae ngo leil miardal si lei su Ngabbor ddei lei ngo arseir a ca leil biar gger, yel nia ngo leil ddarzzi nia.”

<sup>19</sup> Yaa biex a bbeix: “Niabbor arddolmaex hher dae?”

Yisu ddarkoxl a bbeix: “Nia mel ngo leil nr saexl, Ngabbor leil lei nr saexl. Nia ngo leil saexl arddeirnga a, nia dder Ngabbor leil lei saexl a.”

<sup>20</sup> Yisu ddar eil mel bbeix car mel, yar Arbosobo ddei xi zzaexggu gga zzirbae dol ji ggie halmaex ca leil mul gger dae car bbeix a. Nael yar ddei nixixl ddei mel nr ci seir, yel arseir lei yar leil ssu nr du lei.

### Yoxrtaexl Su Ca Cirke A Mel Yisu Arseir A Nr Saexl

<sup>21</sup> Yisu yoxl yaa leil bbeix: “Ngo ssi du a; nia ngo leil zo var, nael zo wo nr xie. Nia zuixl bei dae ddei Arbosobo nia leil ssoxr-nr-suxl a mel, nia dder si lalnga.<sup>z</sup> Yel ngo ssi ggie nia ssi nr cexr.”

<sup>22</sup> Yoxrtaexl su ca mel dder bbeix: “Yar bbeix ‘Ngo ssi ggie nia ssi nr cexr,’ eine bbeix a, holbbaexl yar armael leil bei zil gger niazzir dae a ngo?”

<sup>23</sup> Yisu yaa leil bbeix: “Nia mel mer woxrke lei, ngo mel merlabbor lei; nia mel middurbbor ddei ca a; nael ngo mel middurbbor ddei ca nr nga.

---

<sup>z</sup>**8:21** *Nia zuixl bei dae ddei Arbosobo nia leil ssoxr-nr-suxl a mel, nia dder si lalnga. Ca cirddeir-hanga zuixl bei dae ddei ssoxr-nr-suxl a mel, si ho a, dixlyuxl gga ssi nia.*

<sup>24</sup> Yel ngo dder bbeix nia zuixl bei dae ddei Arbosobo nia leil ssoxr-nr-suxl a mel, nia dder si lalnga eine bbeix arddeir a. Nia ngo mel Arbosobo miardal si lei hal ddei<sup>a</sup> ddar-nr-zzi arddeirnga a, nia leil dder zuixl dixl gger a si lalnga a.”

<sup>25</sup> Yaa biex a bbeix: “Ni arseir a leir?”

Yisu yaa leil ddarkoxl a bbeix: “Ngo hherdder ngo ca mel leil mul gger beil halcar cirdae a nia leil biar gger doxr dae hal ddei nga a. <sup>26</sup> Ngo nia bei dae mel cirke biar teixl lei a, nia leil zuixl dixl gger cexr. (Nael ngo eine nr bei.) Ngo leil miardal si lei su hal ddei mel ddarzziddo, ngo yar dax bbejjiur wo hal mel middurbbor ca leil biar gger.” <sup>27</sup> Yaa mel Yisu eil mel biar a Yarbbor leil biar dae arddeir a nr saexl.

<sup>28</sup> Yel Yisu yaa leil bbeix: “Nia Ca Ddei Ssor ddei leil jur du lei car a, nia dder ngo mel Arbosobo miardal si lei hal ddei nga a saexl a. Nia halae saexl var, ngo cirza-hanga bei dae eil mel mel ngo armael leil koxl dae a bei dae nr nga, ngo ddar bbeix dae mel mel Ngabbor ngo leil mul gger a bbeix arddeir a. <sup>29</sup> Ngo azo bei lei ngo leil miardal si lei su hal ddei mel yarzi ggese, yel yar ngo dax hher dax doxr dae, ngo leil piar dol dae a cirmuzil a hher dae lol nr var.” <sup>30</sup> Yisu ddar eil mel bbeix dae car a, ca seirseil ar ke a dder yar mel Zidu a ddarzzi a.

### Yalboxrlahar Ddei Ssor Nei Neir Zzirmar Ddei Ssor

<sup>31</sup> Yisu yar leil ddarzzi su Yoxrtaexl su ca mel leil bbeix: “Nia ngo nia

---

<sup>a</sup>**8:24** ngo mel Arbosobo miardal si lei hal ddei Yuehal Sul 8:24, 8:28, nei 8:58 Xilaxl ddar bbeix “Ngo mel dder ngo a,” eine bbeix. Halleix Moxrxi Arbosobo leil biex a bbeix: “Ngo ca mel leil ni leil arsae mi bbeix gger nia?” Arbosobo ddarkoxl a bbeix: “Ngo mel dder ngo a,” eine bbeix gger. Yisu “Ngo mel dder ngo a,” eine bbeix a mel yar mel dder Arbosobo ddei nga a bbeix arddeir a.

leil mul gger dae mel dax bei mae dae arddeirnga a mel, nia dder yarzi ngo dax mae dae su ca nga a. <sup>32</sup> Nia dder Arbosobo ddei ddarzi mel leil saexl var, yel ddarzi mel nia leil armael lozza lol var.”

<sup>33</sup> Yaa ddarkoxl a bbeix: “Nguua mel Yalboxrlahar<sup>b</sup> giedae ca a; nguua arseir ddei zebol mu nr seix. Ni arsaenga a: ‘Nguua armael lozza var’ eine bbeix leir?”

<sup>34</sup> Yisu ddarkoxl a bbeix: “Ngo nia leil yarzi bbeix gger, zuixl bei su ca hanga mel hherdder zuixl yaa leil guaxr dae a, yaa dder zuixl ddei zebol nga a. <sup>35</sup> Zebol mu su ddei mel cir se lei ake gga ddei ca suax nr cexr, nael ssor ddei mel cirse-cirsil lei ake gga ddei ca a. <sup>36</sup> Yel Arbosobo ddei Ssor ddei nia leil armael lozza lol arddeirnga a mel, zuixl mel nia leil nr guaxr, nia dder yarzi armael lozza a.<sup>c</sup> <sup>37</sup> Ngo saexl, nia mel Yalboxrlahar giedae ca a; nael ngo nia leil mul gger dae mel nia noni dil nr ddo a, nia dder ngo leil seixl niazzir. <sup>38</sup> Ngo biar dae mel mel Ngabbor dax halmaex mia wo hal mel a; nael nia bei dae mel mel niabbor dax halmaex bbejjiur wo hal mel a.”

<sup>39</sup> Yaa ddarkoxl a bbeix: “Nguua mel Yalboxrlahar giedae ca a.”

Yisu bbeix: “Nia yarzi Yalboxrlahar giedae ca nga arddeirnga a, nia dder Yalboxrlahar bei dae mel bei var. <sup>40</sup> Nael ngo nia leil ngo Arbosobo dax noni wo ddarzi mel biar gger lalnga lei, nia zzael ngo leil seixl niazzir. Yalboxrlahar mel zeixleixr lei eil ddei sael a bei nr goxr. <sup>41</sup> Nia bei dae mel hherdder niabbor bei dae mel nga a.”

Yaa ddarkoxl a bbeix: “Nguua leil mel kerjia su ca mel xiu teixl lei nr nga. Nguua mel arbbor cir ddei lar zza, hherdder Arbosobo nga a.”

<sup>42</sup> Yisu yaa leil bbeix: “Arbosobo yarzi niabbor nga arddeirnga a, nia

---

<sup>b</sup>**8:33** *Yalboxrlahar* Cuaxlsixljil Sul 12–25 Yalboxrlahar arseir a biar dae.

<sup>c</sup>**8:36** Loxrmar Sul 6:15–23 leil biar dae.

dder ngo leil perniar var. Ngo mel Arbosobo dax halmaex cirdae a nia dax eilmaex lei a; ngo armael leil koxl dae a lei nr nga, Arbosobo ngo leil miardal si lei arddeir a. <sup>43</sup> Nia arsaenga a ngo bbeix dae ddar mel azo yilsi a nr saexl neil? Hherdder nia noni dil nr ddo a nga arddeir a.

<sup>44</sup> Nia mel dder niabbor neir zzirmar te ddei ssormine a; yel nia dder yar xiar dae mel sael a bei ssi. Neir zzirmar te dax mel ddarzi lei nr zza, yel yar mel ddarzi mel dax bei nr mae a. Yar mel Arbosobo middurbbor coxl ho hormo arleixr nr nga dder caseixlsu te nga a. Yar mel dder ca furllelsu te nga a; ca fur su maelmaerjia ddei arbbor te nga a. Yel yar ca lar fur var.

<sup>45</sup> Yel ngo nia leil ddarzi mel biar gger a lei, nia ngo leil ddar-nr-zzi.

<sup>46</sup> Nia arseir ngo zuixl zza bbeix teixl lei xie bbeixleir? Bbeix teixl lei nr xie mel, ngo nia leil ddarzi biar gger a, nia yoxl arsaenga a ddar-nr-zzi leir? <sup>47</sup> Ha Arbosobo ddei ssormine nga a mel dder Arbosobo ddei ddar noni, nael nia mel Arbosobo ddei ssormine nr nga, yel nia no-nr-ni arddeir a.”<sup>d</sup>

### Yisu Nei Yalboxrlahar

<sup>48</sup> Yoxrtaexl su vaervaerpor mel Yisu leil ddarkoxl a bbeix: “Ngua bbeix ni mel yarzi vuxryixrddo Sarmarlixlyal su ca lesel halae ni leil mel neir xiex dae bbeix a, bbeix nr hoxr a ngo?”

<sup>49</sup> Yisu yaa leil ddarkoxl a bbeix: “Ngo leil neir nr xiex. Ngo mel ngabbor leil i du, nael nia zzael ngo leil i ze. <sup>50</sup> Ngo mel armael leil middux lol nia qiuxr nr nga, nael ngo leil middux lol su ar ddei zza. Yar mel halae bbaehhexhex a ca leil ser. <sup>51</sup> Ngo nia leil yarzi bbeix gger, arseir ngo ddei ddar mel dax bei mae dae arddeirnga a, yaa dder cirse-cirsil lei si

---

<sup>d</sup>**8:47** Yuehal Sul Vaexr Beil Ber 3:1-10 leil Arbosobo ddei ssormine nei neir zzirmar ddei ssormine leil biar dae.

nr var.”

<sup>52</sup> Yaa Yisu leil bbeix: “Eilcar a ngua yarzi ni leil mel neir xiex dae saexl ho a. Yalboxrlahar mel si a; xiezi mel lei si a. Ni halae bbeix: ‘Arseir ngo ddei ddar mel dax bei mae dae a dder cirse-cirsil lei si nr var’ eine bbeix.

<sup>53</sup> Holbbaexl ni bir ngua ddei porpor Yalboxrlahar leil vaer leixl bbeix bel a ngo? Yalboxrlahar mel si a; xiezi mel lei si a. Ni ni armael leil azo ca ar ddei i mal gger a leir?”

<sup>54</sup> Yisu ddarkoxl a bbeix: “Ngo armael leil middux lol arddeirnga a, ngo middux mel dder kuar ddu nr zza. Nael ngo leil middux lol su ddei mel Ngabbor a; hherdder nia bbeix nia ddei Arbosobo a bbeix dae hal ddei nga a. <sup>55</sup> Nia mel zeixleixr lei yar leil saexl nr seix, nael ngo mel yar leil saexl. Ngo yar leil nr saexl bbeix arddeirnga a, ngo dder nia sael a ca fur su loxr a. Nael ngo yar leil saexl halae yar ddei ddar mel dax bei mae dae. <sup>56</sup> Halleix nia ddei porpor Yalboxrlahar mel ggegge-sese a ngo lei nixixl hal ni leil xia dae. Yar mia a dder yarzi ggese.”

<sup>57</sup> Yaa Yisu leil bbeix: “Ni ngorcei koxl lei nr loxr seir mel, holbbaexl ni Yalboxrlahar leil mia goxr a ngo?”

<sup>58</sup> Yisu yaa leil bbeix: “Ngo nia leil yarzi bbeix gger, Yalboxrlahar leil xiu nr teixl lei seir dder ngo mel zza dae ho a.” <sup>59</sup> Yel yaa dder legelbbe vei du lei a Yisu leil zax niazzir, nael Yisu mel pahher du lei a,<sup>e</sup> Arbosobo ddei xi zzaexggu gga ssi teixl si a.

## 9

### Yisu Mia Nr Xie Su Ddei Leil Ggukor Gger

<sup>1</sup> Yisu jjiumo car gga ssi dae car a, capor ar ddei mia a. Ca eil ddei mel

---

<sup>e</sup>**8:59** Yisu pahher du lei a mel, nrbbba Arbosobo yar leil beijjiu a ca mel leil yar leil mia nr xie lol arddeir a.



xiu teixl lei a dder mia nr xie arddeir a. <sup>2</sup> Yisu dax mae dae ca mel dder yar leil biex a bbeix: “Labir, ca eil ddei xiu teixl lei a dder mia nr xie a, arseir zuixl bei a zzi a neil? Yar armael zuixl bei a zzi, bbeixsael yarbbor yarma zuixl bei a zzi a neil?”

<sup>3</sup> Yisu ddarkoxl a bbeix: “Ca eil ddei mia nr xie a mel, yar armael zuixl bei bbeixsael yarbbor yarma zuixl bei a zzi nr nga. Arbosobo mel yar ggecir leil ddoddomo bei a ca mel leil i lol niazzir a nga arddeir a. <sup>4</sup> Niul eilnirggu leil jiux dae a ngo leil miardal si lei su hal ddei ddei miar mel bei nia. Eilmerxixl ci a mel arseir lei miar bei nr cexr a. <sup>5</sup> Ngo middurbbor hher dae car, ngo mel dder middurbbor ddei bbelele ddei nga a.”

<sup>6</sup> Yisu ddar eil mel bbeix ho a dder, middur leil zixlvixrpir dol, yel nilnaexl ggiex a mia nr xie su ca hal ddei meixddur leil mei gger. <sup>7</sup> Halae yar leil bbeix: “Ni Xiloxryal ajjix bbeddur gga cir ssi.” Xiloxryal ddei yilsi mel dder bbeix “miardal teixl”. Ca hal ddei dder cir ssi a; yel yar mia xie a, ake jjixr a.

<sup>8</sup> Yar dax goxr naer dae ca mel nei zoxlzoxl a yar zzo meixl lel ggie mia su ca mel bbeix: “Ca eil ddei doxl zoxlzoxl a cux dae a zzo meixl lel su hal ddei a zzarmar?” <sup>9</sup> Ca cirmelmel a bbeix: “Hherdder yar nga a.” Yoxl cirmelmel a bbeix: “Yar nr nga, yar lesel arnar a.” Ca hal ddei armael bbeix: “Hherdder ngo nga a.”

<sup>10</sup> Yel yaa dder yar leil biex a bbeix: “Ni ddei meixddur ddei arsae mia xie a leir?”

<sup>11</sup> Yar ddarkoxl a bbeix: “Yisu mi ca ar ddei a nilnaexl ggiex a ngo meixddur ddei leil mei gger, halae ngo leil bbeix: ‘Ni Xiloxryal ajjix bbeddur gga cir ssi’ bbeix a, ngo cir ssi a qie dder mia xie a.”

<sup>12</sup> Yaa bbeix: “Ca eil ddei arddolmaex hher dae?”

Yar ddarkoxl a bbeix: “Ngo nr saexl.”

**Farlixsaexl Su Ca Mel Mia Nr Xie Su Ca Ddei Leil Ddar Biex**

<sup>13</sup> Yaa yar leil Farlixsaexl su ca mel dax hier mal. <sup>14</sup> Yisu mia nr xie ca hal ddei meixddur leil nilnaexl mei gger a, yar leil mia xie lol hal cir ni mel wornol nixixl ar ni a. <sup>15</sup> Yel Farlixsaexl su ca mel yar leil yar arsae mia xie a biex. Yar ddarkoxl a bbeix: “Ca hal ddei ngo meixddur leil nilnaexl mei gger a, ngo cir ssi a qie dder mia xie a.”

<sup>16</sup> Farlixsaexl su ca cirmemel a bbeix: “Ca eil ddei mel wornol nixixl miar bei nr ddo cir ni lei miar bei, yel yar mel Arbosobo dax halmaex lei nr nga.”<sup>f</sup> Yoxl cirmemel a bbeix: “Zuixl zza su ca ar ddei a mel, arsae ddoddomo eil mel bei var bbeixleir?”<sup>g</sup> Yel yaa dder zzicarzzi dax zex du lei a.

<sup>17</sup> Yaa yoxl ca hal ddei leil zeixleixr ar boxl biex a bbeix: “Yar ni leil mia xie lol a, ni bbeix, yar azo ca ar ddei a?”

Yar ddarkoxl a bbeix: “Yar xiezi ar ddei a.”

<sup>18</sup> Yoxrtaexl su ca mel ca eil ddei halleix mia nr xie, nael eilleix mia xie a ddar-nr-zzi a dder, yarbbor yarma leil zo si lei a, yaa leil biex a bbeix: <sup>19</sup> “Ca eil ddei nia ssor a ngo? Nia bbeix yar xiu teixl lei a qie dder mia nr xie bbeix. Halmel, eilcar a arsae yoxl mia xie a leir?”

<sup>20</sup> Yarbbor yarma ddarkoxl a bbeix: “Yar mel ngua ddei ssor, yar leil xiu teixl lei a qie mia nr xie lei ngazi a. Eil mel mel ngua saexl. <sup>21</sup> Nael yar arsae yoxl mia xie, arseir yar leil mia xie lol a mel ngua nr saexl. Yar ca vaer loxr ho a; nia yar leil biex a, yar nia leil ddarkoxl lol ddo a.”

<sup>22</sup> Yoxrtaexl su ca ddei vaervaerpor mel zzibbe har dae ho a; arseir Yisu mel Zidu a cexrssexl arddeirnga a, yaa dder arseir leil yaa ddei

---

<sup>f</sup>**9:16** Farlixsaexl su cirmemel a zzir dae a, Yisu wornol nixixl cir ni ca leil ggukor gger a mel, Lixlfaxr dax bei nr mae, yel Arbosobo yar leil miardal si lei nr nga.

<sup>g</sup>**9:16** Farlixsaexl su cirmemel a zzir dae a, Yisu ca leil ggukor gger var a mel, Arbosobo yar leil bei lol arddeir a. Yar ca seir ar ddei a.

Arbosobo ddei sulzzaggie gga ggaxr teixl gger. Yel mia nr xie su ca hal ddei yarbbor yarma eine ddarkoxl a mel Yoxrtaexl su ca ddei vaervaerpor mel leil gexr a nga arddeir a.<sup>23</sup> Yel ca hal ddei yarbbor yarma mel dder “Yar ca vaer loxr ho a; nia yar leil biex ddo a!” eine ddarkoxl arddeir a.

<sup>24</sup> Yel Farlixsaexl su ca mel xiu teixl lei a qie mia nr xie ca hal ddei leil zeixleixr ar boxl ae si lei a bbeix: “Ngua saexl, ca eil ddei mel zuixl zza ca ar ddei a. Ni ca eil ddei leil middux lol nr nga a nei Arbosobo leil middux lol nia.”

<sup>25</sup> Yar ddarkoxl a bbeix: “Yar zuixl zza bbeixsaexl zuixl nr zza ngo nr saexl, nael ngo saexl, halleix ngo mia nr xie, eilcar a ngo mia xie a.”

<sup>26</sup> Farlixsaexl su ca mel bbeix: “Yar ni leil azo bei gger a? Yar ni leil arsae mia xie lol a?”

<sup>27</sup> Yar ddarkoxl a bbeix: “Ngo nia leil bbeix gger goxr ho a lei nia no-nr-ni mel, nael arsaenga a yoxl ngo leil zeixleixr bbeix lol? Holbbaexl nia lei yar dax mae dae su ca bei niazzir dae a ngo?”

<sup>28</sup> Yaa dder yar leil hie a bbeix: “Ni saelnei yar dax mae dae su ca. Ngua mel Moxrxi dax mae dae su ca a.<sup>29</sup> Arbosobo Moxrxi dax ddar biar goxr a mel ngua saexl; nael ca eil ddei arddolmaex lei ngua nr saexl.”

<sup>30</sup> Yar ddarkoxl a bbeix: “Armor! Halmel, yarzi murgur a mar! Yar ngo leil mia xie lol a; nael nia zzael yar arddolmaex lei nr saexl.<sup>31</sup> Niul saexl, zuixl zza su mel Arbosobo dax qiuxr dae mel yar no-nr-ni. Yar leil i du su, yar xiar dae mel dax bei mae dae su ca mel qiuxr a lar yar noni.

<sup>32</sup> Arbosobo cirza-hanga coxl cirdae a eilleix ci a lei, zeixleixr lei arseir xiu teixl lei a dder mia nr xie ca ar ddei leil mia xie lol a bbejjiur nr goxr.

<sup>33</sup> Ca eil ddei Arbosobo dax lei nr nga a mel, yar dder azo lei bei nr cexr.”

<sup>34</sup> Farlixsaexl su ca mel dder yar leil hie a bbeix: “Xiu teixl lei a qie dder zuixl yarzi neil ca eil ddei ni, halae ngua leil mul gger lei bel zzar?”

Yel yaa dder yar leil yaa ddei Arbosobo ddei sulzzaggie gga ggaxr teixl gger a.

### Yisu Leil Ddar-nr-zzi Su Mel Mia Nr Xie Su Lesel

<sup>35</sup> Yisu mel yaa yar leil Arbosobo ddei sulzzaggie gga ggaxr teixl gger bbejiur a; yel giedae Yisu yar leil zo wo a, yar leil bbeix: “Ni Ca Ddei Ssor ddei leil ddarzzi zzi?”

<sup>36</sup> Yar ddarkoxl a bbeix: “Seirpor, ni yar arseir a ngo leil bbeix gger la, yel ngo yar leil ddarzzi cexr.”

<sup>37</sup> Yisu bbeix: “Ni yar leil mia ho a; eilcar ni dax ddar biar dae ddei mel dder yar nga a.”

<sup>38</sup> Yar bbeix: “Seirpor, ngo ddarzzi!” Yel dder Yisu leil cizixl gger a, yar leil zi.

<sup>39</sup> Yisu bbeix: “Ngo middurbbor lei a mel dder ca mel leil ser lei arddeir a. Mia nr xie su ca mel leil nael mia xie lol, mia xie su ca mel leil nael mia nr xie lol.”

<sup>40</sup> Halmaex hher dae Farlixlsaexl su ca mel ddar eil mel bbejiur a dder bbeix: “Holbbaexl ni ngua leil lei mia nr xie su ca i mal gger a ngo?”

<sup>41</sup> Yisu bbeix: “Nia yarzi mia nr xie su ca hal mel nga arddeirnga a, nia dder zuixl nr zza a; nael nia mel bbeix: ‘Ngua mel mia xie su ca mel a,’ eine bbeix a, nia halae zuixl zza seir.”<sup>h</sup>

## 10

---

<sup>h</sup>**9:41** Mia nr xie su ca mel Yisu arseir a nr saexl. Mia xie su ca mel Yisu arseir a saexl. Yisu middurbbor lei a mel, yar leil nr saexl su ca mel yar leil saexl lol hherdder mia nr xie su ca mel leil mia xie lol. Farlixlsaexl su cirmelmel a zzir dae a yaa Yisu arseir a saexl ho a, yaa mia xie. Nael nga zzael Yisu arseir a nr saexl, yilsi mel dder mia nr xie.

## Ya Bbe Ddei Leil Bir Dae A Biar

<sup>1</sup> Yisu yaa leil bir dae a biar dae ar ddei biar gger a bbeix: “Ngo nia leil yarzi bbeix gger, ya bbe gga ddir a, alddur peixl gga ddir lei nr nga, kebal maex dil lei su ca hal mel mel zzaexpor ar nga, zzaegu su su ar nga.

<sup>2</sup> Alddur peixl gga ddir lei su hal ddei saelnei yaloxlmo<sup>i</sup> a. <sup>3</sup> Alddur su su ddei dder yar leil alddur ggapu gger. Ya mel lei yar ddei qiurte ddei leil noni. Yar ya mel ddei mi ddei dax zox dae a armael ddei ya mel leil ae a, hier teixl lei. <sup>4</sup> Yar ya maelmaerjia leil hier teixl lei ho a dder, xilmeir bbaer ssi dae a. Yar ddei ya mel yar qiurte ddei leil noni teixl lei xi a, yar giedae mae dae. <sup>5</sup> Nael ya mel piar nr saexl su ca mel ddei qiurte ddei leil noni teixl lei nr xie, yel yaa piar nr saexl su ca mel dax nr mae ssi lei, doxgoxleixr pa du si lalnga.” <sup>6</sup> Yisu yaa leil bir dae a bbeix dae eil ddei biar gger ho a; nael yaa mel azo yilsi a nr saexl.

<sup>7</sup> Yel Yisu yoxl yaa leil bbeix: “Ngo nia leil yarzi bbeix gger, ngo mel dder ya bbe ddei alddur peixl nga a. <sup>8</sup> Ha ngo xilmeir leil lei su mel dder zzaexpor ar nga, zzaegu su su ar nga. Ya mel yaa ddei qiurte ddei leil no-nr-ni. <sup>9</sup> Ngo mel dder alddur peixl nga a; ha ngo dax eilmaex ddir lei su mel leil dder jiuxl wo nia. Yaa mel ddirddir-dduxddux lei silbbar zzor wo nia. <sup>10</sup> Zzaexpor lei a mel dder ker lei, bei zil gger lei nei bei xiaxr gger lei lalnga; nael ngo lei a mel yaa leil olga li wo lol, halae zzeilixl-zzeilor li wo lol nia.

<sup>11</sup> Ngo mel yaloxlmo seirseir ddei nga a. Ngo ya mel leil weix a olga pixl.

<sup>12</sup> Nael wormusu ddei mel yaloxlmo nr nga; ya mel lei yar ddei nr nga. Yel yaa veimar lei ggie mia a dder ya mel leil piar dol dae a pa du si. Veimar mel dder ya mel leil ssu gex dae a, halae ya cir leil lei ggaxr bbeir

---

<sup>i</sup>**10:2** *yaloxlmo* Yaloxlmo mel dder Yisu nga a. Ya mel dder yar leil ddarzzi su mel nga a. Zzaexpor mel dder Yisu leil dir su mel nga a.

jjia gger. <sup>13</sup> Wormusu hal ddei pa du si a mel, yar wormusu lar nga, yel yar ya mel leil per-nr-niar a nga arddeir a.

<sup>14</sup> Ngo mel yaloxlmo seirseir ddei nga a; ngo ngo ddei ya mel leil saexl, ngo ddei ya mel lei ngo leil saexl. <sup>15</sup> Hherdder Ngabbor ngo leil saexl, ngo lei yar leil saexl mel sael a nga. Ngo ya mel leil weix a olga pixl. <sup>16</sup> Ngo halae kebal ya ar mel zza seir, nael ya hal mel mel bbe eil ddei gga nr hher dae. Ngo yaa leil hier si lei nia. Yaa mel ngo ddei qiurte ddei leil noni. Yel ngo ya maelmaerjjia leil cir cir a loxr lol, yaloxlmo cir ddei ddei a loxr lol nia.

<sup>17</sup> Ngo, ngo ddei olga ddei pixl a mel, zeixleixr li xixl wo lol niazzir a nga arddeir a; yel Ngabbor ngo leil perniar. <sup>18</sup> Arseir lei ngo ddei olga ddei vei si nr cexr, ngo ddei ngo olga pixl arnar a. Ngo olga pixl quexrlxl lei zza; ngo zeixleixr olga ddei li xixl lei quexrlxl lei zza. Eil ddei mel hherdder Ngabbor ngo leil miardal a bei lol ddei nga a,” eine bbeix a.

<sup>19</sup> Yoxrtaexl su ca mel yoxl ddar eil mel leil weix a zzi dax zex du lei a.

<sup>20</sup> Yaa ca mel gga cirke a bbeix: “Yar leil neir xiex a, yar tae ho a. Yar biar ggie noni a azo bei bbeixleir?” <sup>21</sup> Yoxl cirmelmel a nael bbeix: “Ddar eil mel mel neir xiex dae ca mel bbeix teixl lei nr nga. Neir mel arsae mia nr xie su ca mel leil mia xie lol var bbeixleir?”

### **Yoxrtaexl Su Ca Mel Yisu Leil Ddar-nr-zzi**

<sup>22</sup> Halleix Arbosobo ddei xi zzir leil visor a Arbosobo leil gger box jiax eine ar ddei zza. Bbecir-bbekoxl zzixzi ci a, Yoxrtaexl su mel Yiluxlsaler zzi gga jiax eil ddei goxr. <sup>23</sup> Halcar a Yisu mel Arbosobo ddei xi zzaexggu dax, Sorloxmexr ae gieyi ddei leil ssi dae. <sup>24</sup> Yel Yoxrtaexl su ca mel dder yar leil weixr gex du lei a bbeix: “Ni arddolcar saelnei ngua leil ni arseir a saexl lol niazzir dae? Ni mel Zidu nga nga? Ni ngua leil zzalzzar a bbeix gger la!”

<sup>25</sup> Yisu ddarkoxl a bbeix: “Ngo nia leil bbeix gger goxr ho a; nael nia

ddar-nr-zzi. Nia ngo cirza-hanga bei dae eil mel leil i a dder ngo arseir a saexl ddo. Ngo eil mel bei a mel Ngabbor leil koxl dae a bei arddeir a.

<sup>26</sup> Nael nia mel ngo ddei ya nr nga, yel nia ngo leil ddar-nr-zzi. <sup>27</sup> Ngo ddei ya mel mel ngo ddei qiurte ddei leil noni; ngo yaa leil saexl, yaa lei ngo dax mae lei. <sup>28</sup> Ngo mel yaa leil cirse-cirsil lei olga zza lol a, yaa cirse-cirsil lei dixlyuxl gga ssi nr var; arseir lei ngo leixrga gga yaa leil su si nr cexr. <sup>29</sup> Ngabbor mel ya mel ngo leil gger a. Yar cirza-hanga leil lei vaer leixl, yel arseir lei Ngabbor leixrga gga yaa leil su si nr cexr.

<sup>30</sup> Ngabbor nei ngo mel dder ciryoxr a nga.”

<sup>31</sup> Yoxrtaexl su ca mel yoxl legelbbe ggux du lei a Yisu leil zax niazzir dae a. <sup>32</sup> Yisu dder yaa leil bbeix: “Ngabbor ngo leil yarzi seir hal mel hormo bei lol a nia leil i lol a. Nia arddol jji leil weix a ngo leil legelbbe zax arddeir a leir?”

<sup>33</sup> Yaa ddarkoxl a bbeix: “Nguua ni bei dae mel leil weix a ni leil legelbbe zax nr nga, ni Arbosobo leil bbeix no a, zax arddeir a. Ni mel ca lar cir ddei a; nael ni halae armael leil Arbosobo i mal gger.”

<sup>34</sup> Yisu bbeix: “Moxrxi ddei Lixlfaxr leil doxl vaexr dae a bbeix: ‘Ngo bbeix goxr a; nia lei arbosobo leisel,<sup>j</sup> eine vaexr dae zzarmar?’”

<sup>35</sup> Arbosobo Ddei Sul ber leil vaexr dae ddar mel gierbox nixixl nr zza. Arbosobo yar ddei sul ber leil bbejjiur su mel leil “arbosobo leisel” bbeix.

<sup>36</sup> Halmel, ngo leil giel Ngabbor tiur teixl lei a, middurbbor miardal si lei arddeir a. Eine nga a, ngo, ngo mel Arbosobo ddei Ssor a bbeix a, nia arsaenga a ngo Arbosobo leil bbeix no a bbeix neil? <sup>37</sup> Ngo Ngabbor ddei miar mel nr bei arddeirnga a, nia dder ngo leil ddarzzi nr ssa. <sup>38</sup> Nael ngo bei dae arddeirnga a, nia ngo leil ddar-nr-zzi zzorbbeixlei, ngo bei dae mel leil ddarzzi nia. Eine nga a mel nia dder saexl a; Ngabbor ngo dax hher ji dae, ngo lei Ngabbor dax hher ji dae. <sup>39</sup> Yel yaa yoxl Yisu leil

---

<sup>j</sup>**10:34** Sipi Sul 82:6 leil vaexr dae.

ssu du lei niazzir, nael yar pa pixl wo a.

<sup>40</sup> Yisu yoxl Yuedaxl lazzarmo deixgoxr jjixr a, Yuehal ca leil sexlsir gger goxr ggie halmaex ssi ci a dder halmaex hher dae a. <sup>41</sup> Ca seirseil ar ke a dder yar leil zo lei a, yaa bbeix: “Yuehal mel ddoddomo hal mel cir jji lei bei nr goxr, nael Yuehal ca eil ddei leil biar dae mel mel yarzi a.”

<sup>42</sup> Yel halmaex gga ca seirseil ar ke a lei Yisu leil ddarzzi a.

## 11

### Lasaluxl Si

<sup>1</sup> No su capor ar ddei zza, yar leil Lasaluxl mi. Yar mel yardaxl Mardaxl nei Marlixlyal yaa dax cirgo a Boxrdaxlnixr kax gga hher dae.

<sup>2</sup> Marlixlyal eil ddei mel hherdder nerxiuxiumo ssuvi hal mel sser a Seirpor Yisu qihher leil dox deix gger, halae yar olce ddei sser a six hie gger su ddei nga a. <sup>k</sup> <sup>3</sup> Mardaxl nei Marlixlyal yaa nr hieni mel ca leil miardal a Yisu dax ssi lol a bbeix: “Seirpor, ni perniar ca hal ddei no,” eine bbeix lol.

<sup>4</sup> Yisu ddar eil mel bbejjiur ho a dder bbeix: “Lasaluxl ddei no eil ddei mel si nr var. Yar no a mel Arbosobo leil middux lol, halae Arbosobo ddei Ssor leil middux lol arnar a.” <sup>5</sup> Yisu mel yaa so hieni leil perniar. <sup>6</sup> Nael yar Lasaluxl no bbejjiur ho a lei halae zeixleixr yar hher ggie halmaex nr ni hher a. <sup>7</sup> Yel yar dax mae dae ca mel leil bbeix: “Niul zeixleixr Yoxrtaexl mermi jjixr.”

<sup>8</sup> Yar dax mae dae ca mel ddarkoxl a bbeix: “Labir, hal nr ni sael Yoxrtaexl su ca mel legelbbe vei a ni leil zax zil gger niazzir dae lei, ni zeixleixr jjixr a ngo?”

<sup>9</sup> Yisu bbeix: “Eilnirggu mel 12 goxl xiarsixr zza zzarmar? Ca mel

---

<sup>k</sup>11:2 Yuehal Sul 12:3 leil biar dae.



eilninggu jjiumo ssi a mel bbelele ddei<sup>l</sup> leil mia ddo, yel de ze i nr var;

<sup>10</sup> nael eilmerxixl jjiumo ssi a mel bbelele ddei leil mia nr ddo, yel de ze i var.” <sup>11</sup> Yisu ddar eil mel bbeix ho a yoxl bbeix: “Niul ddei gaxggor

carbeix Lasaluxl mel yixrmeixljjiu dae a, ngo yar leil ae zucur ssi nia.”

<sup>12</sup> Yar dax mae dae ca mel bbeix: “Seirpor, yar yixrmeixljjiu dae arddeirnga a, yar kor du lei var.” <sup>13</sup> Nael Yisu ddei yiksi mel Lasaluxl si ho

a bbeix arddeir a. Yar dax mae dae ca mel zzael Lasaluxl yarzi

yixrmeixljjiu dae lalnga eine zzir dae. <sup>14</sup> Yisu dder yaa leil zzalzzar a biar

gger a bbeix: “Lasaluxl mel si ho a. <sup>15</sup> Yar si halcar a ngo yar dax

halmaex nr hher dae a mel nia leil yarzi seir. Eine nga a mel nia leil ngo

leil ddarzzi dax lol var. Eilcar a niul yar leil i ssi.”

<sup>16</sup> Domar yar dax cirgo a Yisu dax mae dae ca mel leil bbeix: “Niul lei sulmulsu dax cirgo a ssi a, si ssi a!” Domar leil mel Dirturmar lei mi.

<sup>17</sup> Yisu Boxrdaxlnixr kax dax lei ci ho a dder, Lasaluxl leil lixrbbaex

doxzi gga dol ji li ni loxr ho a saexl a. <sup>18</sup> Boxrdaxlnixr kax ddei mel

Yiluxlsaler zzi ddei dax hormo ardoxr nr giex dae.<sup>m</sup> <sup>19</sup> Mardaxl nei

Marlixlyal yaa nimar si a, Yoxrtaexl su ca cirke a yaa leil i lei, yaa leil

quex lei. <sup>20</sup> Mardaxl mel Yisu lei a bbejjiur a dder ddux a yar leil zi ssi.

Marlixlyal nael halae ake cux dae. <sup>21</sup> Mardaxl Yisu leil bbeix: “Seirpor, ni

neixrneixr dder eilmaex hher dae arddeirnga a, ngo nimar dder si nr var

a. <sup>22</sup> Nael ngo saexl, eilcar ci a lei, ni Arbosobo dax azo qiuxr mel,

Arbosobo dder arsaebeilei ni leil gger var.”

<sup>23</sup> Yisu yar leil bbeix: “Ni nimar gol du xixl lei var.”

<sup>24</sup> Mardaxl ddarkoxl a bbeix: “Ngo saexl, nixixl maelele ci a si ho ca mel gol du xixl lei car a, yar lei gol du xixl lei var.”

---

<sup>l</sup>**11:9** *bbelele ddei* Bbelele ddei mel dder Yisu nga a.

<sup>m</sup>**11:18** Boxrdaxlnixr kax ddei mel Yiluxlsaler zzi ddei dax sa golir lei nr giex dae.

<sup>25</sup> Yisu bbeix: “Ngo mel dder ca leil gol du xixl lei lol su ddei nga a; ca leil cirse-cirsil olga zza lol su ddei nga a. Ngo leil ddarzzi su ca mel si ho a bbeixarnar, gol du xixl lei nia. <sup>26</sup> Gol dae seir car a dder ngo leil ddarzzi su ca mel cirse-cirsil lei si nr var. Ni ddar eil mel leil ddarzzizzi?”

<sup>27</sup> Mardaxl bbeix: “Seirpor ngo ddarzzi, ni mel dder merlabbor cirdae a middurbbor zei lei Zidu ddei nga a; Arbosobo ddei Ssor ddei nga a.”

<sup>28</sup> Mardaxl ddar eil mel bbeix ho a dder ake jjixr a, arjjiuljjiu a yar nimo Marlixlyal leil bbeix: “Sulmulsu ddei lei a; yar ni leil ae dae.” <sup>29</sup> Marlixlyal ddar eil mel noni ho a qie dder nialngasael ha du lei a Yisu dax ssi.

<sup>30</sup> Halcar a mel Yisu mel kax gga ddir nr ci seir; yar halae Mardaxl yar leil zi ssi ggie halmaex hher dae seir. <sup>31</sup> Yaa leil quex lei su Yoxrtaexl su ca mel, yar jjurjiur-maemae ake ddux si a mia a dder, yar dax mae dae. Yaa zzael yar lixrbbaex doxli dax nge ssi zzir dae. <sup>32</sup> Marlixlyal Yisu dax lei ci a, yar leil mia a qie dder yar qihher ddei dax puxr gex dae a bbeix: “Seirpor, ni neixrneixr dder eilmaex hher dae arddeirnga a, ngo nimar dder si nr var a.”

<sup>33</sup> Yisu mel Marlixlyal nge dae mia nei yar dax cirgo a lei Yoxrtaexl su ca mel lei nge dae mia a, yar xiu ddei dder yarzi zzasol. <sup>34</sup> Yel dder bbeix: “Nia yar leil arddolmaex dol ji dae?”

Yaa ddarkoxl a bbeix: “Seirpor, ni i lei lar!” <sup>35</sup> Yisu dder nge dae a. <sup>36</sup> Yoxrtaexl su ca cirmemel a dder bbeix: “Nia arleixr i, yar ca eil ddei leil einezeixl perniar!” <sup>37</sup> Yoxl cirmemel a bbeix: “Yar mia nr xie su ca leil lei mia xie lol var mel, yar Lasaluxl leil nr si lol bei nr var zzar?”

### **Yisu Lasaluxl Leil Gol Du Xixl Lei Lol**

<sup>38</sup> Yisu nixmox zzar yoxl yarzi zzasol. Yar dder Lasaluxl ddei lixrbbaex doxli ddei dax lei ci a. Ddir ggie halmaex nael legelbbe vaervaermo ar taex guir gex dae. <sup>39</sup> Yisu ca leil miardal a bbeix: “Nia legelbbe taex va

kae ssi.” Lasaluxl yardaxl Mardaxl bbeix: “Seirpor, yar si ho li ni nga a; ggecir ddei lei bbeirne dae a.”

<sup>40</sup> Yisu bbeix: “Ngo ni leil bbeix gger goxr a zzarmar? Ni ddarzzi a mel dder Arbosobo ddoddomo bei ggie mia ddo.” <sup>41</sup> Yel ca mel dder legelbbe taex va kae gger a. Yisu dder merlabbor i dae a Arbosobo dax ddar biar a bbeix: “Arbbor, ngo ni dax ddar biar goxr mel ni noni ho a, yel ngo ni leil nawo a! <sup>42</sup> Ngo saexl, ni arddolcar lei ngo ni dax ddar biar dae mel leil noni dae, nael ngo ddar eil mel bbeix a mel zaza-lili ngier dae ca mel leil, ni ngo leil miardal si lei a ddarzzi lol niazzir a bbeix arddeir a.”

<sup>43</sup> Ddar eil mel bbeix teixl ho a, yar dder worcixl-worni ae dae a bbeix: “Lasaluxl, ddux lei!” <sup>44</sup> Yel Lasaluxl dder ddux lei a; yar qihher leixrhher nei qiaxrmeix leil lei mae ba gex dae.<sup>n</sup> Yel Yisu dder ca mel leil miardal a bbeix: “Yar leil pe kae gger a yar leil ssi lol!”

### Yisu Leil Arsae Seixl Zil Gger Nia Zzibbe

<sup>45</sup> Marlixlyal leil i lei su Yoxrtaexl su ca cirke a mel Yisu bei dae eil mel leil mia a dder yar leil ddarzzi a. <sup>46</sup> Nael cirmelmel a Farlixlsaexl su ca mel dax ssi a, Yisu bei dae mel yaa leil biar gger. <sup>47</sup> Yel Arbosobo leil zi su vaervaerpor mel nei Farlixlsaexl su ca mel dder maelmaerjjia cirgo a hher dae a arsae bei nia zzibbe. Yaa bbeix: “Ca eil ddei mel ddoddomo cirke bei a; niul arsae bei nia? <sup>48</sup> Yar eil mel sael a bei zei si arddeirnga a mel, ca maelmaerjjia lei yar leil ddarzzi var. Eine nga a mel, Loxrmar su ca mel dder niul dax mermi su lei var nei niul ddei cassor-worssor mel leil ssu si var.”<sup>o</sup>

---

<sup>n</sup>**11:44** Yoxrtaexl su mel ca si ho a cingge-circir lei mae ba gex du lei a lixrbbaex doxli gga dol ji eine bei zza wo.

<sup>o</sup>**11:48** Halleix Loxrmar goxrjia su ca mel Yirsaexllixl goxrjia su ca mel leil guaxr dae, yel Yirsaexllixl su vaervaerpor mel Loxrmar goxrjia su

<sup>49</sup> Yaa ca mel gga mel Gieyalfar mi ar ddei zza. Yar mel hal cir koxl Arbosobo leil zi su vaerzzirpor ddei nga a. Yar bbeix: “Nia mel azo lei nr saexl! <sup>50</sup> Ca eil ddei leil niul ca eil cuxr leil weix a si ssi lol nia. Nr nga a niul circuxr-lorbba mier leilei. Holbbaexl eine bei a mel huaxrzoxr nia i nr teixl lei a ngo?”

<sup>51</sup> Ddar eil mel mel yar armael bbeix teixl lei nr nga. Yar mel hal cir koxl Arbosobo leil zi su vaerzzirpor ddei nga a, Arbosobo yar leil Yisu mel Yoxrtaexl su ca mel leil weix a si nia bbeix har zaxr lol arddeir a. <sup>52</sup> Yisu mel Yoxrtaexl su mel leil weix a lar si nr nga, yar halae zzarvul-zzarmae hher dae Arbosobo ddei cassor-worssor mel leil weix a si a, yar maelmaerjia leil cirgo a ae pex xixl lei a.

<sup>53</sup> Hal cir ni cirdae mel, Yoxrtaexl su ca ddei vaervaerpor mel dder arsae Yisu leil bei zil gger nia zzubbe dae a. <sup>54</sup> Yel Yisu mel daxmeix Yoxrtaexl su ca mel dax nr ssi dae a. Yar mipaerbbae dax naer ggie Yirfarlixr kax hal ddei gga ssi a, yar dax mae dae ca mel dax cirgo a halmaex hher dae.

<sup>55</sup> Yoxrtaexl su ca ddei Yuelyuel jiax ddei mel ci ddo jiur a, yel ca cirke a mel yaa hher ggie cirdae a Yiluxlsaler zzi gga ssi ci a, leiddur ddei bei zaxr dae, hherdder ggecir nei nixmox seibeix lol.<sup>p</sup> <sup>56</sup> Yaa mel zzarvul-zzarmae Yisu leil zo, yaa cirgo a Arbosobo ddei xi zzaexggu gga hher dae car a, zzicarzzi dax bbeix: “Nia arsae zzir dae? Holbbaexl yar jiax nr goxr lei a ngo?” <sup>57</sup> Arbosobo leil zi su vaervaerpor mel nei

---

mel yaa leil faxr leilei a gexr.

<sup>p</sup>**11:55** *leiddur ddei bei zaxr dae, hherdder ggecir nei nixmox seibeix lol* Arbosobo yaa leil miardal a armael leil seibeix lol a saelnei Yuelyuel jiax goxr ddo. Yel yaa ggecir cir, pia cir, halae Arbosobo leil zzeir seixl zi. Cirdaedae a yaa sir ni saelnei eil mel bei har jjia ddo. Lixldaexljil Sul Vaexr Maele Ber 30:17-19 leil nei Mixrsuxljil Sul 9:6-12 leil biar dae.

Farlixsaexl su ca mel miardal goxr a bbeix: “Arseir Yisu arddolmaex hher dae saexl a mel dder yaa leil bbeix gger lei nia, yel yaa dder yar leil ssu ssi cexr.”

## 12

### Yisu Leil Nerxiuxiumo Ssuvi Hal Mel Dox Deix Gger

<sup>1</sup> Yuelyuel jiax xilmeir qiuxl ni, Yisu yoxl Boxrdaxlnixr kax ddei gga lei ci a; hherdder halleix Lasaluxl si a, Yisu yar leil gol du xixl lei lol ggie halmaex nga a. <sup>2</sup> Halmaex gga ca mel Yisu leil zzo qie; Mardaxl lei halmaex gga beijjiu dae, Lasaluxl nei kebal seivi mel nael Yisu dax cirgo a zzor dae. <sup>3</sup> Halcar a malmal Marlixlyal mel yarzi ner xiu yarzi naxrcixl ssuvi ar bbie vei si lei a Yisu qihher leil dox deix gger, halae yar ddei olce mel sser a six hie gger, yel xi giex lorbba lei yarzi ner xiu. Yarzi ner xiu ssuvi hal bbie mel baxlji sael zza.

<sup>4</sup> Nael Yisu dax mae dae ca, hherdder giedae ci a yar leil vurllelsu, Jialuxl mermi su ca Yoxrdaxl ddei mel bbeix: <sup>5</sup> “Yarzi ner xiu ssuvi eil mel mel ca ar ddei ddei cir koxl meirne worper nga a. Ni arsaenga a vur pixl a casolssor mel leil bei nr jjiu leir?” <sup>6</sup> Yoxrdaxl ddar eil mel bbeix a mel, yar yarzi casolssor mel leil perniar a bbeix nr nga; yar mel zzaexpor ar ddei a. Yar Yisu dax mae dae ca mel ddei zzirbae jilabox ddei guaxr dae a, zoxlzoxl a yaa ddei zzirbae mel ker sser.

<sup>7</sup> Yisu bbeix: “Yar leil tor nr hie! Yar yarzi ner xiu ssuvi eil mel eilleix dol ci a mel, ngo leil giexlhex du a bei har zaxr arddeir a.” <sup>8</sup> Casolssor mel arddolcar lei nia dax cirgo a hher dax dae, nael ngo mel nia dax hher dax doxr dae nr var.”

---

<sup>9</sup>**12:7** Yoxrtaexl su bei zza wo ddei mel ca si ho a ggecir ddei leil nerxiuxiu mel mei nia.

<sup>9</sup>Yoxrtaexl su ca cirke a mel Yisu Boxrdaxlnixr kax gga hher dae bbejjiur a dder yar dax ssi a yar leil i ssi. Yaa mel Yisu leil lar i ssi nr nga a nei, si ho a Yisu yoxl yar leil gol du xixl lei lol Lasaluxl ddei leil lei i ssi. <sup>10-11</sup>Lasaluxl si a Yisu yar leil gol du xixl lei lol a, Yoxrtaexl su ca cirke a mel Yisu leil ddarzzi a, zeixleixr lei Arbosobo leil zi su vaervaerpor mel dax bei nr mae a; yel Arbosobo leil zi su vaervaerpor eil mel dder Lasaluxl leil jiujiu seixl zil gger nia zzubbe.

### Yisu Yiluxlsaler Zzi Gga Ddir

<sup>12</sup>Giedae cir ni ci a, Yiluxlsaler zzi gga jiax goxr lei su ca seirseil ar ke a mel, Yisu zzi ddei gga ddir lei du a bbejjiur a.

<sup>13</sup>Yaa jji peixl leisel ar mel vei dae a Yisu leil zi lei, worcixl-worni ae dae a bbeix:

“Hexrsaxlnaxl!<sup>s</sup> Arbosobo leil bbeix zae gger nia!

Seirpor yar miardal si lei su hal ddei leil seir lol nia!<sup>t</sup>

Arbosobo leil Yirsaexllixl su ca ddei zzirmar ddei leil seir lol nia!”<sup>u</sup>

<sup>14</sup>Yisu mel tarlodaexssor ar ddei zo wo a dder zzaer dae a; hherdder Arbosobo Ddei Sul ber leil vaexr dae mel sael a nga, bbeix:

<sup>15</sup>“Xi'a zzi gga ddei ssormaer,<sup>v</sup> ni gexr nr ssa,

---

<sup>s</sup>**12:13** *Hexrsaxlnaxl!* Hexrsaxlnaxl Xiboxrlaexr ddar ddei yilsi mel dder ngua leil jiuxl la.

<sup>t</sup>**12:13** *Seirpor yar miardal si lei su hal ddei leil seir lol nia!* Miardal si lei su hal ddei mel dder ca leil jiuxlsu. Yar lei Zidu nei Mirsaexlyal bbeix. Yar mel dder Seirpor mi ddei leil koxl dae a lei su ddei nga a.

<sup>u</sup>**12:13** Sipi Sul 118:25-26 nei Xifayar Sul 3:15 leil vaexr dae.

<sup>v</sup>**12:15** *Xi'a zzi gga ddei ssormaer* Xi'a zzi mel Yiluxlsaler zzi lei bbeix.

I ddo a. Ni ddei zzirmar ddei tarlodaexssor ar ddei zzaer dae a lei  
a.”<sup>w</sup>

<sup>16</sup> Halcar a mel Yisu dax mae dae ca mel, cirza-hanga bei dae eil mel Yisu leil bbeix dae arddeir a nr saexl. Giedae Arbosobo Yisu leil middux lol ho a saelnei yaa saexl. Halcar a ca mel Yisu leil bei dae hal mel, hherdder Arbosobo Ddei Sul ber leil vaexr dae mel dax zox dae a bei arddeir a saexl a.

<sup>17</sup> Yisu Lasaluxl leil gol du xixl lei lol a lixrbbaex doxli gga ssi teixl lei lol car a mia su mel yaa mia mel biar doxr dae. <sup>18</sup> Yisu ddoddomo bei eil jji leil bbejjur su ca cirke a dder ddux lei a yar leil zi ssi. <sup>19</sup> Farlixlsaexl su ca mel dder zzicarzzi dax bbeix: “Niul bei dae mel Yisu leil dir a lei baexr dir lalnga. Nia ardae i! Ca maelmaerjjia lei yar dax mae ssi jixr ho a.”

### Yisu Armael Arsae Si Nia Ddei Leil Biar Zaxr

<sup>20</sup> Jiax goxr dae car a, Yiluxlsaler zzi gga lei a Arbosobo leil zi lei su ca mel gga mel Xilaxl su ca lei ar mel ca dae. <sup>21</sup> Yaa mel Jialixllixl mermi Boxrsaexldaxl zzi gga su ca Feilixl dax lei a, yar leil qiuxr a bbeix: “Ggocar, ngua Yisu leil i ssi niazzir.” <sup>22</sup> Feilixl dder Adaexrlixl leil bbeix gger ssi a; yel yaa nnel dder cirgo a Yisu leil bbeix gger ssi.

<sup>23</sup> Yisu bbeix: “Arbosobo Ca Ddei Ssor ddei leil middux lol zi ci ho a. <sup>24</sup> Ngo nia leil yarzi bbeix gger, so ar taex a mi gga xiu nr ji arddeirnga a mel, yar dder zoxl a cir taex a nga. Nael mi gga xiu ji ho a si arddeirnga

---

Ssormaer mel cassor-worssor mel leil bbeix. Yel “Xi'a ddei ssormaer”  
ddar eil qier ddei yilsu mel dder Yiluxlsaler zzi ddei cassor-worssor.

<sup>w</sup>**12:15** Sarjialixlyal Sul 9:9 nei Yirsaexlyal Sul 62:11 leil vaexr dae.

a mel, yar dder yarsaer cirke niar teixl lei var.<sup>x 25</sup> Armael leil weix a gol dae su ca mel olga ddei pixl var, nael armael leil weix a gol dae nr nga, Arbosobo leil weix a gol dae su ca mel cirse-cirsil lei olga zza var.

<sup>26</sup> Arseir ngo leil visser a mel dder ngo dax mae lei nia; ngo arddolmaex hher dae mel ngo leil visser su ddei lei halmaex hher dae nia; ngo leil visser su ddei mel Ngabbor dder yar leil i du nia.”

<sup>27</sup> “Eilcar a ngo nixmox zzar yarzi zzasol, ngo arsae bbeix nia neil? ‘Arbbor, ngo leil yarzi goxr sol eil mel gga jiuxl teixl la!’ ngo eine bbeix nr ddo. Ngo hherdder yarzi goxr sol eil mel goxr lei arddeir a. <sup>28</sup> Arbbor, ni leil middux lol nia.”

Halcar a malmal merlabbor qiurte ar ddei zei lei a bbeix: “Ngo armael leil middux lol ho a; halae zeixleixr middux lol nia seir.” <sup>29</sup> Halbbaer ngier dae ca cirke a bbejjiur a cirmelmel a bbeix: “Almer er a.” Yoxl cirmelmel a bbeix: “Tisir yar dax ddar biar dae a.”

<sup>30</sup> Yisu yaa leil bbeix: “Qiurte eil ddei mel ngo leil weix a bbeix nr nga, nia leil weix a bbeix dae arddeir a. <sup>31</sup> Eilcar a mel middurbbor ca mel leil serpaxl lei du a; middurbbor ddei zzirmar<sup>y</sup> ddei leil mel ggaxr teixl gger du a. <sup>32</sup> Ca mel ngo leil jur du lei ho a,<sup>z</sup> ngo ngo ddei cassor-worssor maelmaerjia leil ngo leil ddarzzi lol nia.” <sup>33</sup> Yisu ddar eil mel bbeix a mel yar armael arsae si ddei leil biar dae arddeir a.

---

<sup>x</sup>**12:24** Yilsi mel dder yarnix ddei nael zzae teixl lei a ner du lei a; yargel ddei nael si ho a.

<sup>y</sup>**12:31** *middurbbor ddei zzirmar* Middurbbor ddei zzirmar mel dder neir zzirmar Sardaxl te nga a.

<sup>z</sup>**12:32** *Ca mel ngo leil jur du lei ho a* Ca mel ngo leil jur du lei yilsi mel dder ca mel ngo leil sixrxixljiaxl leil diexr ngexl gger. Kebal yilsi mel dder Arbosobo yar leil merlabbor ddeix lol a, ca mel leil Yisu yarzi middux saexl lol.



<sup>34</sup> Ca cirke a ddarkoxl a bbeix: “Lixlfaxr leil vaexr dae a bbeix Zidu mel cirse-cirsil lei gol dae var, nael ni arsaenga a Ca Ddei Ssor ddei leil mel jur du lei nia, eine bbeix leir? Ni bbeix dae Ca Ddei Ssor ddei mel arseir a?”

<sup>35</sup> Yisu yaa leil ddarkoxl a bbeix: “Ngo mel dder middurbbor ca mel ddei bbelele ddei nga a; ngo cirleixr dder ssi du a; nia dder bbelele ddei leil mia nr ddo a. Yel nia bbelele ddei leil mia ddo seir car leil jiux dae a, nia ssilabox jjiumo mel ssi nia. Nr nga a neixmar a mel, nia dder jjiumo ddei leil mia nr ddo a. Arseir neixmar ggie ssi dae a mel, yar arddolmaex ssi lei nr saexl. <sup>36</sup> Nia mel bbelele ddei nia dax hher dae seir car dder bbelele ddei leil ddarzzi nia. Eine nga a mel, nia dder bbelele ddei leisel.”<sup>a</sup>

Yisu ddar eil mel bbeix ho a dder ca mel dax nr hher, pahher du lei a.

### **Yoxrtaexl Su Ca Mel Yisu Leil Ddar-nr-zzi**

<sup>37</sup> Yisu ca mel meixsaer qier leil Arbosobo lar bei var ddoddomo cirke bei a lei, yaa mel halae yar leil ddar-nr-zzi. <sup>38</sup> Yaa eine nga a mel, hherdder xiezi Yirsaexlyal bbeix goxr ddar mel yarzi loxr a; yar bbeix:

“Seirpor, ngua ca leil biar gger dae mel arseir ddarzzi?

Seirpor ddoddomo bei dae mel arseir leil i lol?”<sup>b</sup>

<sup>39</sup> Eine nga a yaa ddar-nr-zzi, hherdder xiezi Yirsaexlyal bbeix har zaxr goxr sael a nga, yar bbeix:

<sup>40</sup> “Arbosobo mel yaa leil mia nr xie lol,

---

<sup>a</sup>**12:36** Tisarloxrnixrjia Sul Vaexr Beil Ber 5:4-8 leil nei Yirfuxrsor Sul 5:8-9 leil nei Martaexl Sul 5:14 leil biar dae.

<sup>b</sup>**12:38** Yirsaexlyal Sul 53:1 leil vaexr dae.

yaa ddei nixmox taex gex lol,  
nr nga a yaa mia xie,  
nixmox zzar Arbosobo leil saexl a mel,  
yaa dder huixrsoxr a  
ngo dder yaa leil ggukor gger a.”<sup>c</sup>

<sup>41</sup> Yirsaexlyal ddar eil mel bbeix a mel, yar Yisu yarzi ddo mia goxr a Yisu leil bbeix arddeir a.

<sup>42</sup> Eine nga bbeixarnar, Yoxrtaexl su ca ddei vaervaerpor cirke a mel Yisu leil ddarzzi a; nael yaa mel Farlixlsaexl su ca mel yaa leil Arbosobo ddei sulzzaggie gga ggaxr teixl gger lei a gexr a, yaa daxmeix Yisu leil ddarzzi cexrssexl nr bel. <sup>43</sup> Yaa eine nga a mel Arbosobo leil yaa leil hanol kuar gger lol meixr nr nga a nei, ca mel leil yaa leil hanol kuar gger lol meixr a nga arddeir a.

<sup>44</sup> Giedae Yisu worcixl-worni ae dae a bbeix: “Ngo leil ddarzzi su ca mel, ngo leil lar ddarzzi nr nga a nei, ngo leil miardal si lei su hal ddei leil lei ddarzzi a. <sup>45</sup> Ca mel ngo leil mia a mel dder ngo leil miardal si lei su hal ddei leil mia a. <sup>46</sup> Ngo mel middurbbor ca mel ddei bbelele ddei nga a. Yel ngo middurbbor lei a mel dder, ngo leil ddarzzi su ca mel leil zeixleixr neixmar ggie nr hher dae lol. <sup>47</sup> Ngo middurbbor lei a mel ca leil serpaxl lei nr nga a nei, ca leil olga jiuxl lei. Yel ca mel ngo ddei ddar mel leil bbejjiur a bei nr mae dae a lei, ngo yaa leil ser-nr-paxl. <sup>48-49</sup> Ngo biar dae ddar mel ngo armael dax zox dae a biar nr nga a nei, ngo leil miardal si lei su Ngabbor ngo leil miardal a azo biar lol a mel ngo dder azo biar. Yel ngo leil ddarzzi nr yuex su ca nei ngo biar dae ddar mel leil noni dil nr ddo su ca mel, yaa leil serpaxl su zza. Nixixl ddei maelele ci a mel, ngo biar dae ddar mel mel yaa leil serpaxl. <sup>50</sup> Ngo saexl, Ngabbor miardal

---

<sup>c</sup>12:40 Yirsaexlyal Sul 6:10 leil vaexr dae.

dae ddar mel ca mel leil cirse-cirsil lei olga zza lol, yel ngo biar dae mel hherdder Ngabbor ngo leil biar lol mel nga a.”

## 13

### Yisu Yar Dax Mae Dae Ca Mel Leil Qihher Cir Gger

<sup>1</sup> Yisu Yuelyuel jiax xilmeir leil dder, yar middurbbor nr hher, Arbbor dax halmaex jjixr zi ci jiur a saexl ho a. Yisu middurbbor yar armael ddei ca mel leil perniar, halae yar si zi ci a lei yaa leil perniar doxr dae.

<sup>2</sup> Yisu nei yar dax mae dae ca mel cirgo a almeixr zzor dae car, neir zzirmar te Yoxrdaxl leil nixmox zzar Yisu leil vur lel nia eine xiar ji dae lol ho a. Yoxrdaxl mel Jialuxl mermi su Ximexr ddei ssor a. <sup>3</sup> Yisu saexl, Arbbor Arbosobo mel cirza-hanga quexrlxl maelmaerjia lei yar leil jia gger ho a. Yar lei saexl, yar Arbosobo dax halmaex lei, yoxl Arbosobo dax halmaex jjixr nia. <sup>4</sup> Yel yar dder almeixr zzor ggie ngier du lei a, teixlsibbor veixr dae pia xiux lixr teixl a, zzoxrbbeix leil mae ar co neixl gex dae a. <sup>5</sup> Yoxl larggu gga ajjix dox ji a yar dax mae dae ca mel leil qihher cir gger, halae yar zzoxrbbeix leil neixl gex dae mae co sser a six hie gger.

<sup>6</sup> Yisu Ximexr Birdaexr dax lei ci a, Birdaexr bbeix: “Seirpor, holbbaexl ni ngo leil qihher cir gger a ngo?”

<sup>7</sup> Yisu ddarkoxl a bbeix: “Eilcar a ngo arsaenga a eine bei ni nr saexl, nael arddolcar a ni saexl var.”

<sup>8</sup> Birdaexr bbeix: “Ngo arsaebeilei ni leil ngo leil qihher cir nr gger lol.”

Yisu bbeix: “Ngo ni leil qihher cir nr gger arddeirnga a, ni dder ngo dax cirdoxr lei guaxr-nr-zoxr.”

<sup>9</sup> Ximexr Birdaexr bbeix: “Seirpor, eine nga a, ni ngo leil qihher lar cir gger nr nga a nei, leixrhher nei oldde lei cir gger ddo a.”

<sup>10</sup> Yisu bbeix: “Ggecir cir goxr su ca mel qihher cir a dder, cingge-circir

lei seibeix a. Nia mel seibeix ho a; nael cirddeir-hanga lei seibeix nr nga.”<sup>11</sup> Yisu mel arseir yar leil vur lel var saexl ho a, yel yar dder “Nael nia cirddeir-hanga lei seibeix nr nga,” eine bbeix arddeir a.

<sup>12</sup> Yisu yar dax mae dae ca mel leil qihher cir gger teixl ho a, teixlsibbor pia xiux veixr gex xixl dae a, yoxl cux zei xixl a. Yar yar dax mae dae ca mel leil biex a bbeix: “Ngo arsaenga a nia leil eine bei gger, nia saexl saexl?”<sup>d</sup> <sup>13</sup> Ngo mel nia ddei Seirpor, nia ddei sulmulsu a; yel nia ngo leil ‘Seirpor, sulmulsu’ ae a mel hoxr. <sup>14</sup> Nael ngo nia ddei Seirpor, nia ddei sulmulsu halae nia leil qihher cir gger a mel, nia lei zzicarzzi leil qihher cir gger nia. <sup>15</sup> Ngo nia leil eine bei gger a mel, nia leil ngo bei dae mel dax zox dae a bei ssi lol arddeir a. <sup>16</sup> Ngo nia leil yarzi bbeix gger, zebol ddei mel yar ddei seirpor leil vaer nr leixl, miardal teixl lei a azo lerler bei ssi su ca ddei mel yar leil miardal su ddei leil vaer nr leixl. <sup>17</sup> Nia mel eil mel leil saexl ho a, yel nia eil mel dax bei mae dae arddeirnga a, Arbosobo dder nia leil seir lol var.”

### Yisu Yoxrdaxl Yar Leil Vur Lel Nia Bbeix Har Zaxr

<sup>18</sup> “Ngo eilcar ddar bbeix a mel, nia ca maelmaerjjia leil bbeix nr nga; ngo tiur har dae ca mel leil mel ngo saexl. Nael Arbosobo Ddei Sul ber leil vaexr dae a bbeix: ‘Ngo dax cirgo a aba zzor su ddei qihher sser a ngo leil tiex.’<sup>e</sup> Eilboxl ddar eil mel yarzi loxr du a. <sup>19</sup> Nael eil mel halae yarzi nr loxr seir dder ngo nia leil bbeix gger zaxr. Eine nga a yarzi loxr halcar a nia dder ngo mel dder Arbosobo miardal si lei hal ddei<sup>f</sup> nga a ddarzzi var. <sup>20</sup> Ngo nia leil yarzi bbeix gger, ha arseir ngo miardal teixl

---

<sup>d</sup>**13:12** Yar mel yaa lei zzicarzzi leil visser nia mul gger.

<sup>e</sup>**13:18** Sipi Sul 4:19 leil vaexr dae.

<sup>f</sup>**13:19** *Arbosobo miardal si lei hal ddei* Xilaxl ddar mel: “Ngo mel dder ngo a,” eine bbeix.

lei ca mel leil hexl a mel dder ngo leil hexl; ngo leil hexl su ca mel dder ngo leil miardal si lei su hal ddei leil hexl a.”

<sup>21</sup> Yisu ddar eil mel bbeix ho a dder yar ddei xiu ddei yarzi cix, yel yar dder yaa leil bbeix gger a bbeix: “Ngo nia leil yarzi bbeix gger, nia ca mel gga ngo leil vurllelsu ar ddei zza.”

<sup>22</sup> Yar dax mae dae ca mel dder zzicarzzi leil i dae a, yaa lei Yisu arseir leil bbeix arddeir a nr saexl. <sup>23</sup> Yisu dax mae dae ca mel gga mel, Yisu yarzi perniar ar ddei zza. Yar mel Yisu dax cirgo a cux naer dae,

<sup>24</sup> Ximexr Birdaexr dder yar leil meixcix meixcix arleixr bei gger a, yar leil Yisu leil ca hal ddei arseir a arleixr biex lol. <sup>25</sup> Yar dder Yisu dax naelnaer sael koxl mal a, yar leil biex a bbeix: “Seirpor, ni leil vurllelsu ddei arseir a?”

<sup>26</sup> Yisu ddarkoxl a bbeix: “Ngo aba ddei niuxl lel labox ddei gga niuxl ho a arseir leil gger a mel, hherdder arseir nga a.” Yel Yisu dder aba vei du lei a, niuxl lel labox ddei gga arleixr niuxl a Jialuxl mermi su Yoxrdaxl leil zzi gger a. <sup>27</sup> Yoxrdaxl aba ddei zzi gel lei a zzor a qie, Sardaxl te dder yar leil xiex dae ho a. Yisu yar leil bbeix: “Ni azo bei niazzir dae mel nialngasael bei ssi ddo a.” <sup>28</sup> Yisu dax cirgo a zzo zzor su ca mel lei arsaenga a Yisu yar leil eine bbeix nr saexl. <sup>29</sup> Yoxrdaxl mel zzirbae guaxr su a; yel yaa mel Yisu Yoxrdaxl leil miardal a, yar leil jiax goxr a sserlabox zzaegu vae ssi lol, bbeixsael casolssor leil beijjiu ssi lol eine zzir dae. <sup>30</sup> Yoxrdaxl aba ddei zzor ho a qie, ddux si a. Yar ddux halcar a mel eilmerxixl nga a.

### **Yisu Birdaexr Yar Leil Nr Ssexl Bbeix Har Zaxr**

<sup>31</sup> Yoxrdaxl ddux ho a, Yisu bbeix: “Eilcar Arbosobo Ca Ddei Ssor leil middux lol, Ca Ddei Ssor lei Arbosobo leil middux lol. <sup>32</sup> Ca Ddei Ssor Arbosobo leil middux lol a mel, Arbosobo cirleixr dder Ssor leil middux lol du a. <sup>33</sup> Albor, ngo nia dax hormo arleixr nr hher a. Nia ngo leil zo var,

nael ngo kebal Yoxrtaexl su ca mel leil bbeix gger goxr mel sael a nia leil bbeix gger nia, ngo ssi ggie halmaex mel nia ssi nr cexr. <sup>34</sup> Eilcar ngo nia leil halleix miardal nr goxr yarsixl ar ddei miardal: nia zzicarzzi leil perniar nia. Ngo nia leil arsae perniar mel, nia lei zzicarzzi leil arsae perniar nia. <sup>35</sup> Nia zzicarzzi leil perniar arddeirnga a mel, middurbbor hher dae ca mel dder nia mel ngo dax mae dae su ca a saexl a.”

<sup>36</sup> Ximexr Birdaexr Yisu leil biex a bbeix: “Seirpor, ni arddolmaex gga ssi?”

Yisu ddarkoxl a bbeix: “Ngo ssi ggie eilcar ni halae ngo dax cirgo a ssi nr cexr seir, nael eilni arggeni ni ssi nia.”

<sup>37</sup> Birdaexr bbeix: “Seirpor, arsaenga a ngo eilcar ni dax cirgo a ssi nr cexr? Ngo ni leil weix a olga lei pixl yuex.”

<sup>38</sup> Yisu bbeix: “Ni yarzi ngo leil weix a olga pixl yuex a ngo? Ngo ni leil yarzi bbeix gger: yixpe bbe xilmeir leil ni ngo leil nr ssexl so boxl bei var.”

## 14

### Yisu Mel Dder Jjiumo, Ddarzi, Olga

<sup>1</sup> Yisu yoxl yaa leil bbeix: “Nia nixmox zzar cix nr ssa, nia Arbosobo leil ddarzzi nia, ngo leil lei ddarzzi nia. <sup>2</sup> Ngabbor ake gga mel hher ggie cirke zza; ngo ssi a mel nia leil hher ggie bei har zaxr gger ssi arddeir a. Ngo nia leil bei har zaxr nr gger arddeirnga a mel, ngo dder eine bbeix nr var. <sup>3</sup> Ngo nia leil hher ggie bei har zaxr gger ho a dder nia leil zi jjixr lei a ngo dax halmaex ssi lol; yel ngo arddolmaex hher dae mel, nia leil lei arddolmaex hher dae lol. <sup>4</sup> Ngo ssi ggie halmaex jjiumo zex leil mel nia saexl.”

<sup>5</sup> Domar yar leil bbeix: “Seirpor, ni arddol ssi lei ngua nr saexl mel, jjiumo hal zex leil ngua arsae saexl var bbeixleir?”

<sup>6</sup> Yisu bbeix: “Ngo mel dder jjiimo zex nga a; ngo mel dder ddarzi nga a; ngo mel dder olga ddei nga a. Ngo leil nr koxl dae a mel arseir lei Arbbor dax halmaex ssi nr cexr. <sup>7</sup> Nia ngo leil saexl arddeirnga a mel dder Ngabbor leil saexl var. Eilni cirdae mel nia dder yar leil saexl ho a; halae yar leil mia ho a.”

<sup>8</sup> Feilixl Yisu leil bbeix: “Seirpor, ni ngua leil Arbbor leil arleixr mia lol la, ngua dder nixmox lodda a.”

<sup>9</sup> Yisu yar leil bbeix: “Feilixl, ngo nia dax einezeixl argielggur hher ho a lei ni ngo leil nr saexl a ngo? Ca mel ngo leil mia a mel dder Arbbor leil mia a. Ni arsaenga a halae ‘Ngua leil Arbbor leil arleixr mia lol la’ eine bbeix leir? <sup>10</sup> Ngo Ngabbor dax hher ji dae, Ngabbor lei ngo dax hher ji dae, nia ddarzzizzi? Ngo nia leil bbeix gger dae ddar mel mel, ngo armael dax zox dae a bbeix dae nr nga; Ngabbor bbeix dae arddeir a. Yar mel ngo dax hher ji dae a ngo leil yar ddei miar mel bei lol. <sup>11</sup> Nia ngo leil ddarzzi nia: ngo Ngabbor dax hher ji dae, Ngabbor lei ngo dax hher ji dae. Nia ngo bbeix dae ddar eil mel leil ddar-nr-zzi arddeirnga a lei, ngo bei dae mel leil mia a mel ngo leil ddarzzi nia.

<sup>12</sup> Ngo nia leil yarzi bbeix gger: ngo Ngabbor dax halmaex ssi du a; yel ngo leil ddarzzi su ca mel ngo bei dae mel yaa lei bei var, halae bir eil mel leil vaer lei bei var. <sup>13</sup> Nia ngo leil koxl dae a azo qiuxr zzorbbeixlei, nia arsae qiuxr dder ngo arsae nga lol. Eine bei a mel Ssor ddei Arbbor leil middux lol. <sup>14</sup> Yel nia ngo leil koxl dae a azo qiuxr zzorbbeixlei, ngo nia qiuxr dae mel sael a nga lol.”

### **Yisu Arbbor Leil Qiuxr A, Yar Ddei Xiu Ddei Leil Lei Lol**

<sup>15</sup> Yisu yoxl yar dax mae dae ca mel leil bbeix: “Nia ngo leil perniar arddeirnga a, nia dder ngo nia leil miardal dae mel dax bei mae dae nia.

<sup>16</sup> Ngo Ngabbor leil qiuxr nia, yar dder kebal nia leil beijjiu su<sup>9</sup> ar ddei miardal gger si lei var, halae yar leil cirse-cirsil lei nia dax cirgo a hher dae lol. <sup>17</sup> Yar mel dder ddarzi mel ca leil saexl lol su Arbosobo ddei Xiu ddei nga a. Middurbbor ca mel mel yar leil mia nr xie, yar leil nr saexl, yel yaa yar leil nr li. Nael yar mel nia dax cirgo a hher dae, yar halae nia dax hher ji dae nia, yel nia mel yar leil saexl. <sup>18</sup> Ngo nia leil piar dol dae a, aniuxcir loxr lol nr var. Ngo halae nia dax eilmaex jjixr lei nia seir.

<sup>19</sup> Hormo arleixr nr nga mel, middurbbor ca mel dder ngo leil mia nr xie a; nael nia mel ngo leil mia xie. Ngo gol dae, yel nia lei gol dae nia. <sup>20</sup> Hal cir ni ci a,<sup>h</sup> nia dder saexl, ngo mel Ngabbor dax hher ji dae, nia mel ngo dax hher ji dae, ngo lei nia dax hher ji dae. <sup>21</sup> Ha ngo miardal dae mel leil noni a dder bei mae dae su ca ddei mel, hherdder ngo leil perniar su ca ddei nga a. Ngo leil perniar su ca ddei mel, Ngabbor dder yar leil perniar, ngo lei yar leil perniar, ngo halae yar leil ngo leil saexl lol.”

<sup>22</sup> Yisu leil vurllesu nr nga Yoxrdaxl hal ddei Yisu leil biex a bbeix: “Seirpor, arsaenga a ngua leil lar saexl lol, nael middurbbor ca mel leil nr saexl lol leir?”

<sup>23</sup> Yisu yar leil ddarkoxl a bbeix: “Ngo leil perniar su ca ddei dder ngo ddei ddar mel dax bei mae dae nia. Ngabbor dder yar leil perniar nia, ngo nei Ngabbor halae yar dax halmaex ssi a, yar dax cirgo a hher nia.

<sup>24</sup> Nael ngo leil per-nr-niar su ddei dder ngo ddei ddar mel dax bei nr mae dae. Nia bbejjiur dae ddar eil mel mel ngo armael bbeix teixl lei nr nga, ngo leil miardal si lei su Ngabbor ngo leil bbeix lol arddeir a. <sup>25</sup> Ngo nia dax cirgo a hher dae seir car a dder ddar eil mel nia leil bbeix gger

---

<sup>9</sup>**14:16** *nia leil beijjiu su* Nia leil beijjiu su mel dder Arbosobo ddei Xiu ddei nga a. Yar mel ca mel leil nixmox dder vaer gger var.

<sup>h</sup>**14:20** *Hal cir ni ci a*, “Hal cir ni ci a” ddei yilsi mel dder Arbosobo ddei Xiu ddei lei hal cir ni bbeixsaexl Yisu jjixr lei hal cir ni.



ho a. <sup>26</sup> Nael Ngabbor mel yar ddei Xiu ddei leil miardal si lei nia, hherdder nia leil beijjiu su ddei nga a. Yar ngo ddei quexrlixl zza. Yar nia leil cirza-hanga eil mel mul gger var, halae nia leil ngo nia leil bbeix gger goxr ddar hazza leil holcir du lei lol var.

<sup>27</sup> Ngo nia leil nixmox zzar zzaso lol; nia nixmox zzar zzaso mel ngo nixmox zzar zzaso mel dax ciryoxr a nga lol. Ngo nia leil gger dae mel, middurbbor ca mel nia leil gger dae mel dax le-nr-sel. Nia nixmox zzar cix nr ssa, nia gexr nr ssa. <sup>28</sup> ‘Ngo ssi du a; halae nia dax jjixr lei nia seir,’ eil ddei mel nia bbejjiur ho a. Ngabbor bir ngo leil vaer leixl, yel nia ngo leil perniar arddeirnga a, ngo Ngabbor dax jjixr bbejjiur a, nia dder ggese nia. <sup>29</sup> Ngo bbeix dae cirza-hanga eil mel halae yarzi nr loxr seir dder ngo nia leil bbeix gger zaxr. Eine nga a mel yarzi loxr halcar ci a nia ngo leil ddarzzi var.

<sup>30</sup> Middurbbor ddei zzirmar Sardaxl te mel lei du a; yel ngo nia dax dozil arleixr biar nr cexr a. Yar mel arsaebeilei ngo leil bei leixl gger nr var, <sup>31</sup> nael ngo mel middurbbor ca mel leil ngo Ngabbor leil perniar saexl lol, halae Ngabbor ngo leil arsaе miardal mel ngo dder arsaе bei ssi saexl lol.

Nia ha du la a, niul ssi du a.”

## 15

### Yisu Mel Puxrto Zzei Yarzi Zzei Nga A

<sup>1</sup> Yisu yoxl bir dae a yar dax mae dae ca mel leil bbeix: “Ngo mel puxrto zzei yarzi zzei nga a; Ngabbor mel dder puxrto dae ggie guaxr su ddei nga a. <sup>2</sup> Ngo dax ggax teixl lei a saer niar nr var yarcaxlleixr mel Ngabbor dder maelmaer ddaex pixl gger. Saer niar var mel nael dder

yarcaxlleixr ssor mel xialxia ddaex pixl gger a saer hanol niar lol.<sup>i</sup> <sup>3</sup> Ngo nia leil ddar biar gger mel nia leil seibeix lol ho a. <sup>4</sup> Nia mel ngo dax hher ji dae nia, hherdder ngo nia dax hher ji dae sael a nga. Yarbaxlleixr mel puxrto zzei zzei dax niaxl nr gex dae a mel, yarbaxlleixr mel dder saer niar nr var; nia ngo dax hher nr ji a mel nia lei dder eil mel sael a nga.

<sup>5</sup> Ngo mel puxrto zzei zzei nga a; nia mel yarbaxlleixr mel nga a. Nia ngo dax hher nr ji a mel, nia dder azo lei bei nr var; yel ha arseir ngo dax hher ji dae, ngo lei yar dax hher ji dae, yar dder saer cirke niar var, hherdder seirseir cirke bei var. <sup>6</sup> Ca mel ngo dax hher nr ji dae a mel, yaa dder piar pixl dae yarbaxlleixr mel sael a hie zzu a; yel ca mel dder ggux si a adoxl gga piar ji a cu pixl gger a. <sup>7</sup> Nia ngo dax hher ji dae, ngo ddei ddar mel nia nixmox zzar hher ji dae arddeirnga a, ha nia li loxia dae mel qiuxr a mel dder nia leil gger nia. <sup>8</sup> Nia yarcaxlleixr mel sael a saer cirke niar teixl lei, hherdder seirseir cirke bei a mel, nia dder Ngabbor leil middux lol a; halae ca mel leil nia ngo dax mae dae su ca nga a saexl lol var.<sup>j</sup>

<sup>9</sup> Ngabbor ngo leil arsae perniar mel, ngo dder nia leil arsae perniar; yel nia ngo dax hher ji dae a mel, ngo nia leil perniar a nia lixrcixr nia.

<sup>10</sup> Nia, ngo nia leil miardal goxr ddei dax bei mae dae arddeirnga a, nia dder ngo dax hher ji dae, ngo nia leil perniar a nia lixrcixr a: hherdder ngo Ngabbor ngo leil miardal dae ddei dax bei mae dae a, ngo yar dax hher ji dae a yar ngo leil perniar a ngo lixrcixr sael a nga. <sup>11</sup> Ngo nia leil eil mel biar gger a mel, nia leil nixmox zzar ggese lol, ngo arsae ggese mel nia leil lei yarzisael ggese lol.

---

<sup>i</sup>**15:2** Saer niar nr var yarcaxlleixr hal mel hherdder Yisu leil ddar-nr-zzi su mel nga a. Saer niar var yarcaxlleixr hal mel hherdder Yisu leil ddarzzi su mel nga a.

<sup>j</sup>**15:8** Arddolyox saer niar mel Jialataexl Sul 5:22-23 leil biar dae.

<sup>12</sup> Nia zzicarzzi leil perniar nia, hherdder ngo nia leil perniar dae mel sael a perniar nia, eil ddei mel hherdder ngo nia leil miardal dae ddei nga a. <sup>13</sup> Ca mel gaxggor carbeix leil weix a olga lei nr li, arseir ca leil perniar a lei bir eil mel leil perniar leixl su nr zza a. <sup>14</sup> Nia, ngo nia leil miardal dae mel dax bei mae dae arddeirnga a mel, nia mel dder ngo ddei gaxggor carbeix nga a. <sup>15</sup> Zebol mel mel yaa ddei seirpor ddei bei niazzir dae mel leil nr saexl, nael ngo mel Ngabbor dax bbejjiur wo cirza-hanga lei nia leil biar gger ho a; yel ngo nia leil zebol nr ae, gaxggor carbeix ae. <sup>16</sup> Nia ngo leil tiur teixl lei nr nga a nei, ngo nia leil tiur teixl lei a; halae nia leil miardal teixl a xiaxr nr var saer hal mel niar ssi lol, hherdder seirseir mel bei lol. Eine nga a mel, nia ngo leil koxl dae a Arbbor dax azo qiuxr zzorbbeixlei, yar nia leil gger nia. <sup>17</sup> Nia zzicarzzi leil perniar nia, eil ddei mel hherdder ngo nia leil miardal dae ddei nga a.”

### **Middurbbor Ca Mel Yisu Nei Yar Dax Mae Dae Su Mel Leil Vuxryixr**

<sup>18</sup> “Middurbbor ca mel nia leil vuxryixr arddeirnga a nia saexl nia, yaa nia leil vuxr-nr-yixr seir dder ngo leil vuxryixr ho a. <sup>19</sup> Nia middurbbor ddei ca hherdder ngo leil ddar-nr-zzi su ca mel nga arddeirnga a, yaa dder nia leil perniar var; nael ngo nia leil middurbbor ca mel dax tiur teixl lei a, nia middurbbor ddei ca nr nga a; yel yaa dder nia leil vuxryixr. <sup>20</sup> Ngo nia leil bbeix gger goxr ddar mel nia holcir dae nia: ‘Zebol mel yar ddei seirpor ddei leil vaer leixl nr var.’ Yaa ngo leil kexiex goxr a mel, nia leil lei kexiex var; yaa ngo biar dae ddar mel leil noni dil arddeirnga a mel, nia biar dae ddar mel leil lei noni dil var. <sup>21</sup> Yaa mel ngo leil miardal si lei su hal ddei leil nr saexl; halae nia mel ngo dax bei mae dae su ca mel, yel yaa dder nia leil cirza-hanga eil mel bei arddeir a. <sup>22</sup> Ngo yaa leil cirza-hanga mul nr gger lei arddeirnga a, yaa leil dder zuixl dixl nr gger, nael eilboxl yaa nrbba nrbba zuixl bei a, yaa leil arsaebeilei zuixl dixl

gger a. <sup>23</sup> Ngo leil vuxryixr su ca mel mel, Ngabbor leil lei vuxryixr a.

<sup>24</sup> Ngo yaa ca mel gga ddoddomo hal mel bei nr goxr arddeirnga a, yaa leil dder zuixl dixl nr gger. Yaa mel ngo bei dae mel leil mia a; nael yaa halae ngo leil nei Ngabbor leil lei vuxryixr. <sup>25</sup> Nael yaa eine nga a mel, hherdder yaa ddei Lixlfaxr leil vaexr dae ddar mel yarzi loxr a. Lixlfaxr leil vaexr dae a bbeix: ‘Yaa mel nrbba nrbba ngo leil vuxryixr.’

<sup>26</sup> Ngo mel Ngabbor dax halmaex gga nia leil beijjiu su ddei leil nia leil miardal gger si lei du a. Yar mel hherdder ddarzi mel ca leil biar gger su Arbosobo ddei Xiu ddei nga a. Yar lei a ngo arseir a ca mel leil saexl lol.

<sup>27</sup> Ciryoxr a nga, nia mel ngo ca mel leil mul gger beil car a dder ngo dax cirgo a hher dae ho a; yel nia lei ngo arseir a ca mel leil saexl lol nia.”

## 16

<sup>1</sup> Yisu yoxl yar dax mae dae ca mel leil bbeix: “Ngo nia leil eil mel bbeix gger a mel, nia leil ngo leil ddarzzi zei si lol. <sup>2</sup> Ca mel dder nia leil Arbosobo ddei sulzzaggie gga ggaxr teixl gger var. Hormo arleixr nr nga mel nia leil bei zil gger var. Yaa zzir dae a eine bei a mel dder Arbosobo leil visser a. <sup>3</sup> Yaa mel Arbbor leil nr saexl, halae ngo leil lei nr saexl a nga arddeir a. <sup>4</sup> Ngo nia leil hoba eil mel biar gger zaxr a mel, hane ci a nia leil holcir dae lol. Ngo ca leil mul gger beil cirdae a eilleix ci a lei ngo nia dax cirgo a hher dae, yel ngo dder eil mel nia leil bbeix gger nr seix arddeir a.”

### Arbosobo Ddei Xiu Ddei Miar Bei

<sup>5</sup> “Eilcar ngo mel ngo leil miardal si lei su hal ddei dax halmaex jjixr du a. Nia ca mel gga arseir lei ngo leil ‘Ni arddolmaex gga ssi?’ biex su nr zza a. <sup>6</sup> Nael ngo eil mel nia leil biar gger a, nia nixmox zzar dder yarzi cix. <sup>7</sup> Nael ngo nia leil yarzi bbeix gger, ngo jjixr a mel nia leil seir arddeir a. Ngo nr jjixr arddeirnga a mel, nia leil beijjiu su Arbosobo ddei

Xiu ddei dder lei nr var. Ngo jjixr a mel dder yar leil miardal si lei a.

<sup>8</sup> Arbosobo ddei Xiu ddei lei a mel, middurbbor ca mel leil armael zuixl zza saexl lol, ngo mel seirceix-seirmaer nr hoxr lei ardoxr nr zza saexl lol, Arbosobo middurbbor ca mel leil serpaxl nia saexl lol. <sup>9</sup> Middurbbor ca mel zuixl zza a mel, yaa ngo leil ddar-nr-zzi a nga arddeir a. <sup>10</sup> Ngo mel seirceix-seirmaer, nr hoxr lei ardoxr nr zza, yel ngo Arbbor Arbosobo dax jjixr a, nia zeixleixr lei ngo leil mia nr ddo a. <sup>11</sup> Serpaxl ddei leil bbeix ci a mel, Arbosobo mel middurbbor ddei zzirmar Sardaxl te leil serpaxl ho a, yel arddolcar a ca mel leil serpaxl nia. Eil mel mel Arbosobo ddei Xiu ddei middurbbor ddei ca mel leil lei saexl lol nia.”

<sup>12</sup> “Ngo halae nia leil ddar cirke biar gger nia seir, nael eilcar nia nixmox zzar cix teixl lei nr xie. <sup>13</sup> Arbosobo ddei Xiu ddei lei a, yar dder nia leil ddarzi mel leil saexl lol. Yar mel armael dax zox dae a biar nr nga, yar bbejjiur wo mel nia leil biar gger. Halae arddolcar a arsae lerler nga var nia leil biar gger. <sup>14</sup> Yar ngo dax bbejjiur wo hazza lei nia leil biar gger, yel ngo leil middux lol. <sup>15</sup> Ngabbor ddei hazza mel dder ngo ddei nga a; yel ngo dder bbeix, Arbosobo ddei Xiu ddei mel ngo dax bbejjiur wo hazza lei nia leil biar gger nia, eine bbeix arddeir a.”

### Cixddu Mel Ggeseddu Loxr

<sup>16</sup> “Hormo arleixr nr nga mel, nia dder ngo leil mia nr ddo a; nael zeixleixr hormo arleixr nr nga mel, nia yoxl ngo leil mia ddo seir.” <sup>17</sup> Yel yar dax mae dae ca cirmelmel a, zzicarzzi dax bbeix: “Yar niul leil bbeix gger a bbeix: ‘Hormo arleixr nr nga mel nia dder ngo leil mia nr ddo a; nael zeixleixr hormo arleixr nr nga mel nia yoxl ngo leil mia ddo seir’; yoxl bbeix: ‘Ngo mel Ngabbor dax halmaex gga ssi du a nga arddeir a,’ bbaexl eine bbeix a azo yilsi bbeix arddeir a leir?” <sup>18</sup> Yaa zzicarzzi leil biex a bbeix: “Yar bbeix: ‘Hormo arleixr nr nga’, bbaexl azo yilsi a leir? Niul yar bbeix dae mel leil noni wo nr xie.”

<sup>19</sup> Yisu mel yaa yar leil biex niazzir dae saexl a dder yaa leil bbeix: “Ngo nia leil ‘hormo arleixr nr nga mel nia dder ngo leil mia nr ddo a; nael zeixleixr hormo arleixr nr nga mel nia yoxl ngo leil mia ddo seir,’ bbeix a, nia ddar eil qier zzicarzzi leil biex a ngo? <sup>20</sup> Ngo nia leil yarzi bbeix gger, arddolcar a nia mel aenge var, nael middurbbor ca mel zzae yarzi sael ggese. Nia yarzi sael cix var bbeixarnar, nael nia cixddu mel mel ggeseddu loxr var. <sup>21</sup> Hherdder ssormaer mel anix xiu du a no halcar sael a nga. Nael anix ddox leil xiu teixl lei ho a mel, yar dder ggese a, yar no dae halcar leil hol-nr-cir a. <sup>22</sup> Nia lei dder eil mel sael a nga. Nia eilcar cix dae arnar, nael ngo zeixleixr nia leil mia a mel, nia nixmox zzar dder yarzi sael ggese. Nia ggese dae eil mel mel arseir lei nia dax su si nr cexr. <sup>23</sup> Hal cir ni ci a mel, nia ngo leil azo lei biex nr ssa. Ngo nia leil yarzi bbeix gger, hane ci a mel, nia ngo ddei mi ddei leil koxl dae a Ngabbor dax azo qiuxr zzorbbeixlei, yar nia leil gger var. <sup>24</sup> Eilleix ci a lei, nia ngo ddei mi ddei leil koxl dae a, ngabbor dax azo lei qiuxr nr goxr, nael eilboxl nia ngo ddei mi ddei leil koxl dae a qiuxr a mel dder nia leil gger, yel nia leil ggese gaxzi lol.”

<sup>25</sup> “Eilleix ngo mel bir dae a bbeix a nia leil biar gger, nael nixixl ddei ci a mel, ngo dder zeixleixr bir dae a bbeix a nia leil biar nr gger a. Ngabbor ddei cirza-hanga nia leil zzalzzar a biar gger nia.

<sup>26</sup> Nixixl hal cir ni ci a mel, nia dder ngo ddei mi ddei leil koxl dae a Ngabbor dax qiuxr cexr; ngo nia leil qiuxr gger nr ssa, nia ddei nia yar dax qiuxr. <sup>27</sup> Nia ngo leil perniar, halae ngo Ngabbor dax halmaex gga lei ddarzzi, yel Ngabbor lei nia leil perniar. <sup>28</sup> Ngo mel Ngabbor dax halmaex cirdae a middurbbor lei; nael eilboxl ngo middurbbor nr hher Ngabbor dax halmaex jjixr du a.”

<sup>29</sup> Yisu dax mae dae ca mel bbeix: “Eilcar ni zzalzzar a ngua leil biar gger a; bir dae a bbeix a biar nr nga a. <sup>30</sup> Ngua saexl: ni mel nr saexl lei

ar yoxr nr zza, ngua azo xiar dae lei ni saexl, arseir lei ni leil biex loci nr ssa, yel ngua ddarzzi, ni mel dder Arbosobo dax halmaex gga lei.”

<sup>31</sup> Yisu bbeix: “Eilcar nia yarzi ngo leil ddarzzi a ngo? <sup>32</sup> Nia i dae la ddo a; nixixl ddei ci ddo jiur a; hherdder eilcar nga a. Nia maelmaerjia lei pa du si a, armael mermi jjixr nia, ngo cirmuzil leil a hher dae lol; nael nga zzael Ngabbor ngo dax cirgo a hher dae, yel ngo cirmuzil a nr nga.

<sup>33</sup> Ngo nia leil eil mel biar gger a mel, nia leil ngo dax hher ji dae lol a nixmox zzar zzaso lol. Nia middurbbor hher dae car a goxr solsolmo pex dae var bbeixarnar, nael nia gexr nr ssa, ngo mel middurbbor ddei cirza-hanga leil lei bei leixl gger ho a.”

## 17

### Yisu Yar Dax Mae Dae Ca Mel Leil Arbosobo Dax Ddar Biar Gger

<sup>1</sup> Yisu ddar eil mel bbeix jjia ho a dder merlabbor i dae a Arbosobo dax ddar biar a bbeix:

“Arbbor, nixixl ddei ci ho a; ngo ni leil qiuxr, ni ni ddei Ssor ddei leil middux lol, eine nga a ni ddei Ssor, hherdder ngo lei ni leil middux lol cexr; <sup>2</sup> hherdder ni middurbbor ca maelmaerjia leil guaxr quexrlixl ddei ngo leil jia gger ho sael a, yel ni ngo leil jia gger goxr ca mel leil cirse-cirsil lei olga zza lol. <sup>3</sup> Yaa leil Arbosobo mel cir ddei lar zza saexl lol, yaa leil ni leil saexl lol, halae yaa leil ngo mel dder ni miardal si lei Yisu Zidu ddei nga a saexl lol, eine nga a cirse-cirsil lei olga zza a. <sup>4</sup> Ni ngo leil miar bei lol mel ngo bei jjia ho a; yel middurbbor ni leil middux lol ho a. <sup>5</sup> Arbbor, eilcar ngo leil ni dax cirgo a merhhexr gga middux lol la, hherdder azo lei nr coxl seir halleix ngo ni dax cirgo a middux mel sael a nga.

<sup>6</sup> Ni middurbbor ca mel gga tiur teixl lei a, ngo leil jia gger goxr ca hal mel, ngo yaa leil ni arseir a saexl lol ho a. Yaa mel ni ddei ca a;

ni yaa leil ngo leil jia ji gger a, yaa lei ni ddei ddar mel dax bei mae dae ho a. <sup>7-8</sup>Yaa eine nga a mel, ni ngo leil bbeix gger ddar mel ngo yaa leil biar gger a yaa noni dil a nga arddeir a. Eilcar a yaa saexl ho a; ni ngo leil gger hazza mel dder ni dax halmaex gga lei. Yel yaa dder ngo mel yarzi ni dax halmaex gga lei saexl a; yaa halae ni ngo leil miardal si lei ar ddei a ddarzzi.

<sup>9</sup>Ngo yaa leil weix a ni leil qiuxr, nael ngo middurbbor ni leil dir su ca mel leil weix a ni leil nr qiuxr, ni ngo leil jia gger goxr ca mel mel ni ddei ca a; yel ngo dder yaa leil weix a ni leil qiuxr. <sup>10</sup>Ngo ddei ca hazza mel dder ni ddei a; ni ddei ca hazza lei dder ngo ddei a. Ngo mel halae yaa bei dae mel leil ngol dae a middux ho a.

<sup>11</sup>Ngo mel middurbbor nr hher ni dax halmaex jjixr du a; nael yaa mel halae middurbbor hher dae seir. Yel seirceix-seirmaer Arbbor, ngo ni leil qiuxr, ni ddoddomo mi ddei leil koxl dae a, hherdder ni ngo leil gger mi ddei leil sser dae a yaa leil zabbar seirseir a guaxr dae, yel yaa leil cir piar a nga lol, hherdder niul cir piar a nga mel sael a nga. <sup>12</sup>Ngo yaa dax cirgo a hher dae car, ngo ni ngo leil ddoddomo bei lol mel leil koxl dae a yaa leil zabbar seirseir a guaxr dae a, yaa leil su dae. Arsaebeilei dixlyuxl gga ssi nia bbeix dae ca hal ddei leil cuxrteixl a mel, ngo cir ddei leil lei nr pixl lol, yel ni ddei sul ber leil bbeix har zaxr dae ddar mel yarzi loxr a.

<sup>13</sup>Eilcar ngo ni dax halmaex gga ssi du a; nael ngo middurbbor hher dae seir car a dder ddar eil mel yaa leil biar gger a mel, yaa leil ngo sael a ggese gaxzi lol. <sup>14</sup>Ngo ni ddei ddar mel yaa leil biar gger ho a. Yaa mel middurbbor ddei ca nr nga, hherdder ngo middurbbor ddei ca nr nga mel sael a nga; yel middurbbor ddei ca mel dder yaa leil vuxryixr. <sup>15</sup>Ngo ni leil yaa leil hier si a middurbbor nr hher lol nr qiuxr, nael ngo ni leil qiuxr, ni yaa leil



guaxr dae a nixmox neix su te yaa leil ke-nr-xiex lol. <sup>16</sup> Yaa mel middurbbor ddei ca nr nga, hherdder ngo middurbbor ddei ca nr nga mel sael a nga. <sup>17</sup> Ngo ni leil qiuxr, ni ddarzi mel sser a yaa leil tiur teixl la a ni ddei cassor-worssor bei lol. Ni ddei ddar mel dder ddarzi nga a. <sup>18</sup> Ni ngo leil miardal a middurbbor ca mel dax ssi lol mel sael a, ngo lei yaa leil miardal a middurbbor ca mel dax ssi lol ho a. <sup>19</sup> Ngo armael leil ni leil jia gger a, ni ddei ddar mel dax bei mae gaxzi a mel, hherdder yaa leil ni ddei ddarzi mel leil ddarzzi lol, ni ddei cassor-worssor bei lol.

<sup>20</sup> Ngo yaa leil weix a ni leil qiuxr lar nr nga a nei, halae kebal ngo leil ddarzzi su mel leil weix a ni leil qiuxr. Yaa mel hherdder ngo dax mae dae su mel biar dae ddar mel leil bbejjiur a, yel ngo leil ddarzzi su ca mel nga a. <sup>21</sup> Ngo ni leil qiuxr a mel, ni yaa maelmaerjia leil cir piar a nga lol. Hherdder Arbbor ni ngo dax hher ji dae, ngo lei ni dax hher ji dae mel sael a yaa leil niul dax hher ji dae lol. Yel middurbbor ddei ca mel leil ni ngo leil miardal si lei arddeir a ddarzzi lol. <sup>22</sup> Ni ngo leil quexrlixl gger ho a; ddoddomo bei lol ho a; ngo lei yaa leil gger ho a; yel yaa leil cir piar a nga lol, hherdder niul cir piar a nga mel sael a nga. <sup>23</sup> Ngo mel ngo ddei ca mel dax hher ji dae, ni mel ngo dax hher ji dae, yel yaa leil cir piar a nga gaxzi lol. Eine nga a mel middurbbor ca mel dder ni ngo leil miardal si lei a saexl, halae ni ngo leil perniar mel sael a ngo leil ddarzzi su mel leil perniar saexl.

<sup>24</sup> Arbbor, azo lei nr coxl seir dder ni ngo leil perniar a, yel ngo leil middux lol. Ngo arddolmaex hher dae mel, ni ngo leil jia gger goxr ca mel leil lei ngo dax cirgo a halmaex hher dae lol. Yaa leil ni ngo leil middux lol ggje mia lol.

<sup>25</sup> Arbbor, ni mel yarzi bbaehhex. Middurbbor ca mel ni leil nr

saexl bbeixarnar, nael ngo mel ni leil saexl. Ni ngo leil jia gger goxr ca mel lei ni ngo leil miardal si lei ar ddei a saexl. <sup>26</sup> Ngo mel yaa leil ni arseir a saexl lol ho a; ngo halae zeixleixr yaa leil saexl dax lol nia, yel ni ngo leil perniar mel sael a, yaa leil si leil perniar ssi lol, halae ngo leil yaa dax hher ji dae lol.”

## 18

### Yisu Leil Ssu Du Lei

<sup>1</sup> Yisu Arbosobo dax ddar biar teixl ho a, yar dder yar dax mae dae ca mel dax cirgo a ddux a, Jirluirxi lazzarmo zex dax gger a. Halmaex gga mel culugga ar ddei zza, yel yar dder yar dax mae dae ca mel dax cirgo a culugga ddei gga ddir a. <sup>2</sup> Yisu nei yar dax mae dae ca mel zoxlzoxl a halmaex gga cirgo a hher, yel Yisu leil vurlleisu Yoxrdaxl te lei halmaex leil saexl. <sup>3</sup> Yoxrdaxl te mel Loxrmar su ddei meixr ar cir hier dae halae Arbosobo ddei xi zzir leil su su mel leil hier dae a, de doxl dae, adoxl ze nei zzideil a sserlabox mel vei dae a, culugga gga ddir lei a. Ca eil mel mel Arbosobo leil zi su vaervaerpor nei Farlixlsaexl su ca mel miardal si lei arddeir a.

<sup>4</sup> Yisu mel yar armael arsae lerler nga du a saexl ho a, yel dder ddux lei a yaa leil biex a bbeix: “Nia arseir leil zo?”

<sup>5</sup> Yaa ddarkoxl a bbeix: “Naxrsalexl su ca, Yisu leil zo.”

Yisu bbeix: “Hherdder ngo nga a.” Halcar mel Yisu leil vurlleisu Yoxrdaxl te lei yaa dax cirgo a ngier dax dae. <sup>6</sup> Yisu “Ngo nga a” eine bbeix a qie, yaa mel tuixl xixl si a, middur ddei leil de zei dae a. <sup>7</sup> Yisu yoxl yaa leil zeixleixr ar boxl biex a bbeix: “Nia arseir leil zo?”

Yaa bbeix: “Naxrsalexl su ca, Yisu leil zo.”

<sup>8</sup> Yisu bbeix: “Ngo nia leil bbeix gger goxr ho a; hherdder ngo nga a. Nia ngo leil zo arddeirnga a, halmel, ngo dax mae dae su ca mel leil ssi

lol!”<sup>9</sup> Yisu ddar eil mel bbeix a mel, halleix yar bbeix goxr ddar mel yarzi loxr a. Yar Arbosobo leil bbeix: “Arbbor, ni ngo leil jia gger ca mel ngo cir ddei lei nr pixl lol,” eine bbeix goxr a.

<sup>10</sup> Ximexr Birdaexr mel altor ar baxr vei dae a, altor baxr die teixl lei a qie dder Marlexlgur mi hal ddei leil taexl ssi a yar leil nolba yo bbor taexl teixl gger a. Yar mel Arbosobo leil zi su vaer zzir ddei leil visser su a.

<sup>11</sup> Yel Yisu Birdaexr leil bbeix: “Altor baxr altorxi gga ji xixl dae. Holbbaexl, Ngabbor ngo leil goxr sol lol mel ngo nr goxr cexr a ngo?”

### **Yisu Yalnaxl Meixsaer Qier Leil Hher Dae**

<sup>12</sup> Loxrmar su ddei meixr cir nei yaa leil guaxr su ddei, halae Arbosobo ddei xi zzir leil su su cir mel Yisu leil ssu du lei a, yar leil neixl gex dae a,

<sup>13</sup> hoba Yalnaxl dax hier mal. Yalnaxl mel Gieyalfar ddei yoxrpor a.

Gieyalfar mel dder hal cir koxl Arbosobo leil zi su vaer zzir ddei nga a.

<sup>14</sup> Yar dder halleix Yoxrtaexl su ca mel leil quex a bbeix: “Ca eil ddei leil niul ca eil cuxr leil weix a si ssi lol nia. Holbbaexl eine bei a mel huaxrzoxr, nia i nr teixl lei a ngo?”<sup>k</sup> eine bbeix su ddei nga a.

### **Birdaexr Yisu Leil Nr Ssexl**

<sup>15-16</sup> Ximexr Birdaexr nei kebal Yisu dax mae dae su ca ar ddei a mel Yisu dax mae dae. Arbosobo leil zi su vaerzzirpor ddei mel Yisu dax mae dae su ca hal ddei leil saexl, yel ca hal ddei dder Yisu dax ssi mae dae a, Arbosobo leil zi su vaerzzirpor ddei zzaexggu gga ddir ci a. Birdaexr nael alddur ggucirmi hher dae. Yel Yisu dax mae dae su ca hal ddei mel ddux a, alddur su su ssormaer ddei dax ar qier bbeix a, Birdaexr leil hier dil lei a. <sup>17</sup> Alddur su su ssormaer ddei mel Birdaexr leil bbeix: “Ni lei ca hal ddei dax mae dae su ca a zzarmar?”

Birdaexr dder bbeix: “Ngo nr nga.”

---

<sup>k</sup>**18:14** Yuehal Sul 11:50 leil bbeix goxr.

<sup>18</sup> Halleix mel zzix, yel Arbosobo leil zi su vaerzzirpor ddei leil visser su mel nei Arbosobo ddei xi zzir leil su su mel adoxl zi a, cirgo a ngier dae a adoxl ga dae; Birdaexr lei yaa dax cirgo a ngier dae a adoxl ga dae.

### **Arbosobo Leil Zi Su Vaerzzirpor Ddei Yisu Leil Ddar Biex**

<sup>19</sup> Arbosobo leil zi su vaer zzir ddei dder Yisu leil yar dax mae dae su ca mel arsaer lerler nga biex nei yar arsaer lerler mul gger dae mel leil biex.

<sup>20</sup> Yisu yar leil ddarkoxl a bbeix: “Ngo ca dax ddar biar a mel daxmeix biar dae lalinga. Ngo mel zoxlzoxl a Yoxrtaexl su mel Arbosobo ddei sulzzaggie gga nei Arbosobo ddei xi gga ca mel leil mul gger, hherdder Yoxrtaexl su cirke a cirgo a hher ggie nga a. Ngo ca leil mul gger a zeixleixr lei arjjiuljjiu a mul gger nr goxr. <sup>21</sup> Ni arsaenga a ngo leil biex? Ni ngo ddar biar ggie bbejjiur su ca mel leil biex ssi ddo a. Ngo azo lerler biar goxr a mel yaa saexl mar.”

<sup>22</sup> Yisu ddar eil mel bbeix ho a, yar dax ngier dae Arbosobo ddei xi zzir leil su su ar ddei a yar leil ar bborji deil gger a bbeix: “Ni Arbosobo leil zi su vaerzzirpor ddei leil lei eine ddarkoxl bel leir?”

<sup>23</sup> Yisu bbeix: “Ngo bbeix cox arddeirnga a, ni ngo arddolmaex bbeix cox a bbeix teixl lei ddo; nael ngo bbeix nr cox arddeirnga a, ni arsaenga a ngo leil deil?”

<sup>24</sup> Yalnaxl yoxl ca leil miardal a Yisu leil Arbosobo leil zi su vaerzzirpor Gieyalfar dax halmaex hier mal lol. Halcar a mel Yisu leil halae neixl gex dae seir.

### **Birdaexr Yoxl Zeixleixr Yisu Leil Nr Ssexl**

<sup>25</sup> Halcar Ximexr Birdaexr mel ngier dae a adoxl ga dae, yel ca ar mel a yar leil bbeix: “Ni doxl yar dax mae dae su ca a zzarmar?”

Birdaexr dder cexr-nr-ssexl a bbeix: “Ngo nr nga.”

<sup>26</sup> Arbosobo leil zi su vaerzzirpor ddei leil visser su ar ddei a mel,

Birdaexr nolba ar bbor taexl teixl gger goxr ca hal ddei ddei cirssor a. Yar Birdaexr leil bbeix: “Ngo doxl nr nga ni leil yar dax cirgo a culugga gga hher ggje mia a zzarmar?”<sup>27</sup> Birdaexr mel yoxl cexr-nr-ssexl a bbeix: “Ngo nr nga.” Halcar a malmal dder yixpe bbe a.

### **Yisu Leil Birlado Dax Hier Mal**

<sup>28</sup> Giedae cirnehe merteir a, Yoxrtaexl su ca mel dder Yisu leil Gieyalfar ca hal ddei dax cirdae a Loxrmar su Birlado dax hherdder Yoxrtaexl mermi su ddei vaervaerpor dax halmaex hier mal. Halleix Yoxrtaexl su ddei leiddur mel dax zox dae a mel, yaa Yoxrtaexl su nr nga ca mel ddei hher ggje ddir a mel dder sei-nr-beix var. Nael yaa mel Yuelyuel jiax goxr a zzorlabox zzor niazzir, yel dder Birlado hher ggje nr ddir.

<sup>29</sup> Birlado vaervaerpor ddei dder ddux lei a yaa leil biex a bbeix: “Ca eil ddei azo bei cox a nia yar leil goxl?”

<sup>30</sup> Yaa ddarkoxl a bbeix: “Yar bei nr cox arddeirnga a, ngua dder yar leil ni dax eilmaex ssu mal lei nr var.”

<sup>31</sup> Birlado yaa leil bbeix: “Nia armael ddei armael yar leil hier si a, nia ddei Lixlfaxr mel dax zox dae a yar leil ser ssi ddo a!”

Yaa ddarkoxl a bbeix: “Nael ngua mel ca seixl quexrlixl nr zza.”<sup>32</sup> Eine nga a mel hherdder Yisu armael arsae si nia bbeix har zaxr goxr ddar qier yarzi loxr a.

<sup>33</sup> Birlado yoxl yar hher ggje ddir jjixr a, Yisu leil ae si lei a yar leil biex a bbeix: “Ni Yoxrtaexl su ca ddei zzirmar a ngo?”

<sup>34</sup> Yisu yar leil ddarkoxl a bbeix: “Ni ngo leil eine biex a mel ni armael ddei armael biex bbeixsael ni si ngo leil biar dae mel leil bbejjiur a biex neil?”

<sup>35</sup> Birlado bbeix: “Ngo Yoxrtaexl su ca a ngo? Nia Yoxrtaexl su ca mel nei Arbosobo leil zi su vaervaerpor mel ni leil ngo leil jia gger arddeir a. Ni azo bei a leir?”

<sup>36</sup> Yisu ddarkoxl a bbeix: “Ngo ca leil guaxr quexrlixl ddei mel middurbbor ca mel ngo leil gger nr nga. Middurbbor ca mel ngo leil gger arddeirnga a, ngo leil visser su mel dder ngo leil weix a zaxlddaexr var, hherdder yaa ngo leil Yoxrtaexl su ca mel leil jia gger nr var. Ngo ca leil guaxr quexrlixl ddei mel middurbbor ca mel ngo leil gger nr nga.”

<sup>37</sup> Birlado yar leil bbeix: “Halmel, ni zzirmar a ngo?”

Yisu ddarkoxl a bbeix: “Ngo zzirmar a mel ni bbeix arddeir a. Ngo ddei miar ddei mel dder ddarzi mel ca leil biar gger; hherdder eine nga a ngo leil xiu arddeir a. Ngo mel dder eil ddei leil weix a middurbbor lei arddeir a. Ha ddarzi mel dax bei mae dae su mel dder ngo ddei ddar no.”

<sup>38</sup> Birlado biex a bbeix: “Ddarzi mel arddolyox a leir?” Yar yoxl ddux lei a Yoxrtaexl su ca mel leil bbeix: “Ngo ca eil ddei azo bei cox a zo teixl lei nr xie.

<sup>39</sup> Nael nia mel eine ar ddei bei zza wo, Yuelyuel jiax ci a mel nia ngo leil nia leil ge ji dae ca ar ddei piur gger lol. Nia ngo leil nia leil Yoxrtaexl su ca ddei zzirmar ddei leil piur gger lol nga nga?”

<sup>40</sup> Yaa yoxl worcixl-worni ae dae a bbeix: “Ngua yar leil nr li, ngua Balaba leil li!” Balaba mi ca eil ddei mel halleix Loxrmarmar goxrjia leil dir a, yel yar leil ge ji dae.

## 19

### Yisu Leil Si Nia Zuixl Dixl Gger

<sup>1</sup> Birlado dder ca leil miardal a, Yisu leil hier si lol a lorddu sser a yar leil deil lol. <sup>2</sup> Meixr mel yoxl alcur sser a oldde leil ddexrlabox ar ddei bei a yar oldde taex leil ddexr gex gger, halae yar leil jjiussi yixrsaexr pia darsisi ar xiu veixr gex gger. Yaa eine bei a mel Yisu leil vaessi.<sup>1 3</sup> Yel yar

---

<sup>1</sup>19:2 Halleix zzirmar mel oldde ddei leil ddexrlabox ddexr dae, jjiussi

xilmeir lei a yar leil bbeix: “Yoxrtaexl su ddei zzirmar, ni leil olga si lol nia!” Bbeix ho a yoxl leixrkata ddei sser a yar leil deil.

<sup>4</sup> Birlado yoxl ddux a Yoxrtaexl su ca mel leil bbeix: “Nia noni dae, ngo Yisu leil nia dax hier teixl lei a, yel ngo yar azo bei cox a zo teixl lei nr xie, nia leil saexl lol.” <sup>5</sup> Yisu ddux lei car mel, oldde leil alcur bei teixl lei hal taex kox dae, halae jjiussi yixrsaexr pia darsisi xiu veixr dae. Birlado dder ca mel leil bbeix: “Nia ca eil ddei leil arleixr i.”

<sup>6</sup> Arbosobo leil zi su vaervaerpor mel nei Arbosobo ddei xi zzir leil su su ca mel Yisu leil mia a qie, worcixl-worni ae dae a bbeix: “Yar leil sixrzixljiaxl leil diexr zil gger! Yar leil sixrzixljiaxl leil diexr zil gger!”

Birlado yaa leil bbeix: “Nia ddei nia yar leil hier si a sixrzixljiaxl leil diexr ssi ddo a! Ngo yar azo bei cox a zo teixl lei nr xie.”

<sup>7</sup> Yoxrtaexl su ca mel ddarkoxl a bbeix: “Yar mel armael ddei armael Arbosobo ddei Ssor a bbeix, yel ngua ddei Lixlfaxr dax zox dae a, yar mel silabox ddei nga a.”

<sup>8</sup> Birlado yaa leil eine bbeix ggie bbejjiur a gielgiel gexr a. <sup>9</sup> Yel zeixleixr yar hher ggie ddir jjixr a Yisu leil biex a bbeix: “Ni yarzi arddolmaex gga lei?” Nael Yisu yar leil ddar-nr-koxl. <sup>10</sup> Birlado yar leil bbeix: “Ni ngo dax ddar nr bbeix a ngo? Ni leil piur bbeixsael ni leil sixrzixljiaxl leil diexr ngexl gger lei ngo lozza, ni nr saexl a ngo?”

<sup>11</sup> Yisu ddarkoxl a bbeix: “Arbosobo ni leil quexrlixl nr gger arddeirnga a, ni dder ngo leil ser quexrlixl nr zza, yel ngo leil ni leil jia gger su ca ddei gielgiel zuixl neixl.”

<sup>12</sup> Hane cirdae mel Birlado yoxl Yisu leil piur niazzir, nael Yoxrtaexl su ca mel ae doxr dae a bbeix: “Ni yar leil piur arddeirnga a, ni dder Loxrmar goxrjia ddei zzirmar Kaersaxl ddei gaxggor carbeix nr nga a.

---

yixrsaexr pia veixr dae. Yel yaa Yisu leil ddoddo-nrddo eil mel veixr gger a mel yar leil vaessi arddeir a.

Arseir armael mel zzirmar bbeix a mel yar dder Loxrmar zzirmar leil dir su ddei nga a.”

<sup>13</sup> Birlado yaa bbeix dae ddar eil mel leil noni ho a, ca leil ser ggie halmaex cux dae a, Yisu leil hier teixl lei a zeixleixr yar leil ser. Ser ggie halmaex mel hherdder “Legelbbe mel nal dae middur” ae; Xiboxrlaexr ddar nael “Gabadal” ae. <sup>14</sup> Hal cir ni mel Yuelyuel jiax goxr a cirza-hanga lei bei har zaxr nia hal ni nga a. Eilneixrnehe zzo cir zzor ji ho a Birlado ca mel leil bbeix: “I ddo a! Yar mel nia ddei zzirmar ddei nga a!”

<sup>15</sup> Yaa dder ae dae a bbeix: “Yar leil hier pixl ssi! Yar leil hier pixl ssi! Yar leil sixrzixljiaxl leil diexr ngexl gger ssi!”

Birlado yaa leil biex a bbeix: “Ngo nia ddei zzirmar ddei leil sixrzixljiaxl leil diexr ngexl gger ddo a ngo?”

Arbosobo leil zi su vaervaerpor mel ddarkoxl a bbeix: “Kaersaxl larnei ngua ddei zzirmar a.”

<sup>16</sup> Yel Birlado dder Yisu leil yaa leil jia gger a sixrzixljiaxl leil diexr zil ssi lol a.

### **Yisu Leil Sixrzixljiaxl Leil Diexr Ngexl Gger**

Yaa dder Yisu leil hier si a. <sup>17</sup> Yisu mel armael ddei sixrzixljiaxl ddei bber dae a, ddux lei a, Olggargex mi halmaex lei ci a. Olggargex middei ddei leil Xiboxrlaexr ddar nael Gexrgexrta bbeix. <sup>18</sup> Yaa dder Yisu leil halmaex gga sixrzixljiaxl leil diexr ngexl gger a. Kebal ca nnel leil lei Yisu dax sixrzixljiaxl leil diexr ngexl gger a. Yaa nnel leil nael cir piar a gga ar ddei diexr, Yisu leil nael agala gga diexr. <sup>19</sup> Birlado mel Yisu leil diexr gex dae sixrzixljiaxl ddei leil ollele barpir ar co diexr ngexl gger a. Barpir eil co leil nael “Yoxrtaexl Su Ddei Zzirmar, Naxrsalexl Su Ca Yisu” eine vaexr deix dae. <sup>20</sup> Yisu leil sixrzixljiaxl leil diexr ggie halmaex mel zzi dax naer dae, halae barpir co leil vaexr deix dae ddar mel mel,



Xiboxrlaexr ddar, Loxrmar su ddei ddar nei Xilaxl ddar sser a vaexr dae, yel ca cirke a lei barpir leil vaexr dae ddar mel i wo xie.

<sup>21</sup> Yel Arbosobo leil zi su vaervaerpor mel dder Birlado leil bbeix: “ ‘Yoxrtaexl su ddei zzirmar’ vaexr nr ddo, ‘Ca eil ddei armael ddei armael Yoxrtaexl su ddei zzirmar a bbeix’ eine vaexr nia.”

<sup>22</sup> Birlado ddarkoxl a bbeix: “Ngo vaexr lei vaexr ho a mel gier-nr-box a.”

<sup>23</sup> Meixr mel Yisu leil sixrxizljiaxl leil diexr ngexl gger ho a dder yar teixlsibbor veixr dae pia xiux vei si a, li fel bbe mal a cir ddei ar fel li. Yaa yoxl yar lavulzzar veixr dae pia xiux lei vei si. Nael eil xiux mel mae naexrxizlggie nr zza, durda a ddaexr teixl lei ar xiux a. <sup>24</sup> Yel meixr mel dder zzicarzzi dax zzibbe a bbeix: “Niul eil xiux caexr kae gger nr ddo, niul nijiu a arseir li wo bbe i.”

Eine nga a mel Arbosobo Ddei Sul ber leil vaexr dae ddar mel yarzi loxr a bbeix:

“Yaa mel ngo ddei teixlsibbor veixr dae pia xiux bbe, halae ngo lavulzzar veixr dae pia xiux leil nijiu.”<sup>m</sup>

Meixr mel yarzi eil mel sael a bei a.

<sup>25</sup> Yisu yarma, yarma-daellael, nei Gexrloxbaxl ddei maerssor Marlixlyal, halae Moxrdaxlla su Marlixlyal, yaa mel Yisu leil diexr ggie sixrxizljiaxl ddei dax ngier dax dae. <sup>26</sup> Yisu mel yarma nei yar dax mae dae yar yarzisael perniar dae hal ddei<sup>n</sup> yar dax ngier ggie mia a dder, yarma leil bbeix: “Ama, ni arleixr i. Yar mel ni ddei ssor sael a nga!”

---

<sup>m</sup>19:24 Sipi Sul 22:18 leil vaexr dae.

<sup>n</sup>19:26 *yar dax mae dae yar yarzisael perniar dae hal ddei* Ca eil ddei mel dder sul eil ber vaexr su Yuehal eil ddei nga a.

<sup>27</sup> Yoxl yar dax mae dae su ca hal ddei leil bbeix: “Ni arleixr i. Yar mel niama sael a nga!” Hane cirdae mel, Yisu dax mae dae ca hal ddei dder Yisu yarma leil yar ake zi si a, yar leil ba dae a.

### Yisu Si A

<sup>28</sup> Eine goxr ho a, Yisu mel cirza-hanga lei bei jjia ho a saexl a; yel yar mel Arbosobo Ddei Sul ber leil bbeix goxr ddar mel yarzi loxr lol a dder bbeix: “Ngo ajjix sixl a!” <sup>29</sup> Halmaex gga mel toxrfuxr ar taex zza dae. Toxrfuxr taex gga mel puxrto zzubbaer zeilzei bbilbbi ji dae, yel meixr mel dder hielmixr ar taex vei a puxrto zzubbaer zeilzei arleixr niuxl, yoxl silbbar lesel ar bo leil neixl gex a yar meir ddei dax ho mal gger. <sup>30</sup> Yisu mel ar jjiu dda a dder bbeix: “Ngo bei jjia ho a.” Yel olzzir dae a, seixl ceix a.

<sup>31</sup> Hal cir ni mel Yuelyuel jiax goxr a cirza-hanga lei bei har zaxr nia hal ni nga a; giedae cir ni nael dder yarzi zoxlyoxl wornol nixixl nga a; yel Yoxrtaexl su ca mel mel ca sima mel wornol nixixl hal cir ni sixrzixljiaxl leil zza doxr dae lol nia-nr-zzir. Yaa dder Birlado dax qiuxr ssi a, sixrzixljiaxl leil diexr gex dae ca mel leil qihher ddei deil te gger lol, yaa leil si yoxryixl lol, yel yaa ca sima ddei vei zei lei cexr. <sup>32</sup> Yel meixr mel dder Yisu dax cirgo a sixrzixljiaxl leil diexr ngexl dae ca hal nnel ddei qihher ddei deil te gger a. <sup>33</sup> Nael yaa Yisu dax lei ci a, Yisu si ho a mia a dder yar ddei qihher ddei deil te nr gger a. <sup>34</sup> Nael meixr ar ddei a mel zzargger darsisimo ar caex vei dae a, zzargger eil caex ollele mel teixvilvilmo altor niar dae. Yar zzargger eil caex sser a, Yisu nelggerci ddei dax zzir dil gger a, yel cirleixr dder ajjix nei sirnilni pe teixl lei a. <sup>35</sup> Eil mel leil malma mia su ca hal ddei ca mel leil eil mel biar gger a. Yar lei saexl, yar biar dae eil mel yarzi a. Yar eine biar a mel nia leil yar biar dae mel ddarzzi lol. <sup>36</sup> Eil mel eine nga a mel dder Arbosobo Ddei Sul ber leil bbeix goxr ddar mel yarzi loxr a. Arbosobo Ddei Sul ber leil bbeix:

“Yar ddei hherggar mel cir caex lei deil te gger nr var.”<sup>o 37</sup> Arbosobo Ddei Sul ber leil yoxl bbeix: “Yaa mel, yaa zzargger zzir goxr ca hal ddei leil mia nia.”<sup>p</sup>

### Yisu Leil Lixrbaex Doxzi Gga Dol Ji

<sup>38-39</sup> Eine goxr ho a, Yallixlmartaexl zzi gga su ca Yuesaexl mel Birlado leil qiuxr ssi a, Yisu ddei ggecir ddei piur zeil lei lol. Yuesaexl mel Yisu dax mae dae su ca a; nael yar Yoxrtaexl su ca ddei vaervaerpor mel leil gexr a, daxmeix cexrssexl nr bel. Birlado yar leil ddarkoxl a, yar nei Nirgedimur dder Yisu ddei ggecir ddei veil zeil lei a. Nixrgedimur mel halleix eilmerxixl Yisu leil i lei goxr hal ddei nga a. Yar moxlyoxl nei luxrhuixl cirgo a caxiux dae nerxiuxiu hal mel socei zi sael veil dae.<sup>40</sup> Yaa nnel dder Yisu ddei ggecir ddei piur zeil lei a, yel Yoxrtaexl su ca mel ca sima giexlhex leiddur ddei dax zox dae a, zzir naxrcixl bei teixl lei mae cir zex cir zex hal mel leil nerxiuxiu mel mei gex a, Yisu ggecir ddei leil ba gex du lei a.<sup>41</sup> Yisu leil sixrzixljiaxl leil diexr ggie halmaex gga mel culugga ar ddei zza. Culugga gga mel zeixleixr lei ca sima dol ji nr seix lixrbaex doxzi sixl ar ddei zza.<sup>42</sup> Hal cir ni mel jiajia Yoxrtaexl su ca mel Yuelyuel jiax goxr a cirza-hanga lei bei har zaxr nia hal ni nga a; halae lixrbaex hal ddei zzae yoxl Yisu sixrzixljiaxl leil diexr ggie halmaex dax naer dae, yel yaa dder Yisu leil halmaex gga dol ji gger a.

## 20

### Yisu Gol Du Xixl Lei

---

<sup>o</sup>**19:36** Cu'aezixr Sul 12:46, Mixrsuxljil Sul 9:12, nei Sipi Sul 34:20 leil vaexr dae.

<sup>p</sup>**19:37** Sarjialixlyal Sul 12:10 leil vaexr dae.

<sup>1</sup> Xiqiti cir ni<sup>9</sup> Moxrdaxlla su Marlixlyal mel mer lei mer-nr-teir seir dder lixrbaex doxli dax lei ci a. Yar mel lixrbaex doxli leil guir gex dae legelbbe taex va kae ho a mia a. <sup>2</sup> Yel yar dder Ximexr Birdaexr nei Yisu dax mae dae su ca Yisu yarzi sael perniar dae hal ddei dax beix xixl a, yaa leil bbeix gger a bbeix: “Arseir a nr saexl, Seirpor ddei ggecir ddei ba pixl gger a lixrbaex doxli gga nr dol dae a; yaa arddolmaex dol gger dae lei ngua nr saexl a mei.”

<sup>3</sup> Yel Ximexr Birdaexr nei ca hal ddei dder lixrbaex doxli dax ssi.

<sup>4</sup> Yaa nnel mel cirter a beix mal, nael ca hal ddei mel bir Ximexr Birdaexr leil beix jiax a, yar xilmeir lixrbaex doxli dax ssi ci a. <sup>5</sup> Yar dder golmer dae a lixrbaex doxli ddei gga i dil a, Yisu ggecir leil ba gex goxr zzir mae mel cir zex cir zex halae halmaex zza dae seir mia a. Nael yar mel nalzzar nr ddir. <sup>6</sup> Ximexr Birdaexr lei ggaxr mae ci a. Yar mel lixrbaex doxli ddei gga ssi dil a zzir mae mel halae halmaex gga zza dae seir mia a; <sup>7</sup> yoxl Yisu oldde leil ba gex goxr mae co mel ggecir leil ba gex goxr zzir mae mel dax cirgo a nr zza dae, jur gex du lei a yar ddei yar argo zza dae mia a. <sup>8</sup> Xilmeir lei ci ca hal ddei lei lixrbaex doxli gga ddir a. Yar mel eil mel leil mia a qie dder Yisu gol du xixl lei ho a ddarzzi a. <sup>9</sup> Arbosobo Ddei Sul ber leil mel Yisu si a arsaebilei gol du xixl lei nia bbeix goxr a; nael yaa mel halae ddar eil mel ddei yilsa nr saexl seir.

<sup>10</sup> Yel yaa nnel dder ake jjixr a.

### Yisu Moxrdaxlla Su Marlixlyal Leil Mia Lol

<sup>11</sup> Nael Marlixlyal mel halae lixrbaex doxli ddei malleil hher dae a

---

<sup>9</sup>**20:1** *Xiqiti cir ni* Yuehal Sul 20:1 nei 20:19 Yoxrtaexl su ddei wornol nixixl cir ni mel Xiqiluxr cir ni a. Yisu gol du xixl lei cir ni mel Xiqiti cir ni a. Yel Yisu gol du xixl lei ho cirdae mel Yisu leil ddarzzi su mel mel Xiqiti cir ni wornol nixixl goxr.

nge doxr dae. Yar mel ho nge ho golmer ze i a lixrbbaex doxlzi gga i dil,  
<sup>12</sup> yel dder pia piulpiu veixr dae tisir nnel mia a. Yaa mel halleix Yisu  
ddei ggecir ddei dol goxr ggie halmaex gga cux dae. Cir ddei a nael  
oldde piar a gga cux dae, cir ddei a nael qihher piar a gga cux dae.

<sup>13</sup> Tisir mel Marlixlyal leil biex a bbeix: “Allor, ni arsaenga a nge?”

Yar bbeix: “Arseir a nr saexl, ngo Seirpor ddei ggecir ddei ba pixl gger  
a, arddolmaex gga ba mal gger a lei ngo nr saexl a.”

<sup>14</sup> Yar ddar eil mel bbeix ho a, za xixl lei a qie, Yisu yar dax ngier dae  
mia a; nael yar ca hal ddei mel dder Yisu nga a nr saexl. <sup>15</sup> Yisu yar leil  
biex a bbeix: “Allor, ni arsaenga a nge? Ni arseir leil zo?”

Marlixlyal mel halae yar mel culugga guaxr su ddei nga a zzir dae a  
dder yar leil bbeix: “Ago, ni ngo Seirpor ddei ggecir ddei ba pixl gger  
arddeirnga a, ni yar leil arddolmaex gga ba mal gger a ngo leil bbeix  
gger la, yel ngo yar leil ba xixl lei.”

<sup>16</sup> Yisu yar leil “Marlixlyal!” bbaexl ae a, yar dder Yisu leil noni teixl a  
za xixl lei a, Xiboxrlaexr ddar sser a Yisu leil “Labonixr” ae. Labonixr  
ddei yilsi mel dder sulmulsu bbeix arddeir a. <sup>17</sup> Yisu yar leil bbeix: “Ngo  
mel halae Ngabbor dax halmaex gga ddeix nr ci seir, yel ni ngo leil tor  
ceir-nr-gex dae. Ni ngo ddei arzzi-nimar mel dax ssi a yaa leil bbeix gger  
ssi. Ngo mel merlabbor ddeix a Ngabbor Arbosobo leil i ssi, yar lei nia  
ddei Arbbor a; nia ddei Arbosobo a.”

<sup>18</sup> Yel Moxrdaxlla su Marlixlyal dder Yisu dax mae dae ca mel leil bbeix  
gger jjixr a bbeix: “Ngo Seirpor leil mia a.” Yar yoxl Seirpor yar leil bbeix  
gger ddar mel lei yaa leil bbeix gger a.

### **Yisu Yar Dax Mae Dae Ca Mel Leil Mia Lol**

<sup>19</sup> Xiqiti cir xixlmei Yisu dax mae dae ca mel cirgo a hher dae a. Yaa mel  
Yoxrtaexl su ca mel leil gexr a, alddur mel zilzir ggabil dae. Yisu yaa dax  
lei a neixleixrsael yaa agala gga ngier dae a bbeix: “Nia leil zzaso lol

nia!”<sup>20</sup> Yar ddar eil mel bbeix ho a, yoxl yar ddei leixrhher nei nelggerci leil yaa leil i lol. Yaa mel Seirpor leil mia a dder ggese zildu a.<sup>21</sup> Yisu yoxl yaa leil bbeix: “Nia leil zzaso lol nia! Ngo mel Ngabbor ngo leil miardal teixl lei sael a nia leil miardal teixl nia.”<sup>22</sup> Ddar eil mel bbeix ho a yar dder yaa leil seixl ar qier mex deix gger a bbeix: “Nia Arbosobo ddei Xiu ddei leil nia dax hher ji dae lol nia.”<sup>23</sup> Nia arseir ddei zuixl mel leil ssoxrsuxl a mel, arseir ddei zuixl mel leil dder ssoxrsuxl ho a; nia arseir ddei zuixl mel leil ssoxr-nr-suxl a mel, arseir ddei zuixl mel leil dder ssoxrsuxl nr var.”

### Yisu Nei Domar

<sup>24</sup> Yisu miardal dae ca ceinirmo gga mel Domar mi ar ddei zza. Yar leil mel Durturmar lei mi. Yisu yaa leil mia lol car mel Domar mel yaa dax cirgo a nr hher dae.<sup>25</sup> Yisu dax mae dae ca kebal hal mel dder yar leil bbeix gger a bbeix: “Ngu Seirpor leil mia ho a.”

Nael Domar zzael yaa leil ddarkoxl a bbeix: “Ngo yar hedi teixl goxr leixrhher zze leil malma nr mia arddeirnga a, ngo ddar-nr-zzi. Ngo leixrni ddei yar hedi teixl goxr ddur ddei leil mox nr dae, halae ngo leixrhher bbor yar nelggerci ddei dax mox nr dil arddeirnga a, ngo dder arsaebeilei ddar-nr-zzi.”

<sup>26</sup> Giedae heixl ni goxr ho a, Yisu dax mae dae ca mel yoxl cirgo a xi gga hher dae a, Domar lei yaa dax hher dax dae. Yaa alddur ggabil dae bbeixarnar, Yisu ddir lei a, yaa agala gga ngier dae a yaa leil bbeix: “Nia leil zzaso lol nia!”

<sup>27</sup> Yel Yisu Domar leil bbeix: “Ni ngo ddei leixrhher leil arleixr i. Ni ddei leixrni ddei ngo leixrhher ddei leil arleixr mox, ni ddei leixrhher bbor cei teixl la a ngo nelggerci ddei dax arleixr mox dil. Ni zeixleixr ddar-nr-zzi nr ddo, ddarzzi nia.”

<sup>28</sup> Domar bbeix: “Ngo ddei Seirpor! Ngo ddei Arbosobo!”

<sup>29</sup> Yisu yar leil bbeix: “Ni mel ngo leil mia ho a saelnei ddarzzi a ngo? Ngo leil nr mia lei ddarzzi su ca mel Arbosobo yaa leil seir lol a.”

### Yuehal Arsaenga A Sul Eil Ber Vaexr

<sup>30</sup> Yisu mel yar dax mae dae su ca mel meixsaer qier leil halae Arbosobo sael a ddoddomo cirke bei a lei sul eil ber leil vaexr nr deix dae. <sup>31</sup> Nael sul eil ber leil vaexr deix dae eil mel mel, nia leil Yisu mel dder Zidu, yar mel dder Arbosobo ddei Ssor ddei nga a ddarzzi lol. Halae nia yar leil ddarzzi a mel, nia dder yar bei dae mel leil koxl dae a cirse-cirsil lei olga li wo ddo.

## 21

### Yisu Yar Dax Mae Dae Su Sirlar Leil Mia Lol

<sup>1</sup> Eine goxr ho a, Yisu yoxl Tixrbirliryal neixvi qier leil zeixleixr yar dax mae dae ca mel leil ar boxl mia lol. Yar yaa leil arsae mia lol mel jiasibbor vaexr deix dae. <sup>2</sup> Halcar mel Yisu dax mae dae su ar mel a cirgo a hher dae. Yaa mel dder Ximexr Birdaexr, Domar, Naxrdaxlyixl nei Xibirtaexl ddei ssor nrnel, halae yoxl Yisu dax mae dae su kebal nrnel nga a. Domar leil mel Dirturmar lei mi. Naxrdaxlyixl mel Jialixllixl mermi Jianaxr su ca.

<sup>3</sup> Ximexr Birdaexr yaa leil bbeix: “Ngo ngol bel ssi.”

Yaa lei bbeix: “Nguua lei ni dax cirgo a ssi.” Yaa dder ddux a cuaxr ar jiaxl leil ddeix a ngol bel ssi a; nael yaa mel hal cir xixlmei cir xixl bel doxr a lei azo lei ar ddei bel nr wo.

<sup>4</sup> Hal cirnehe jiajia merteir car, Yisu mel ajjix qier leil hieltebbor ngier dae, nael yar dax mae dae ca mel yar mel dder Yisu nga a i nr teixl lei.

<sup>5</sup> Yisu yaa leil ae dae a bbeix: “Albor, nia ngol bel nr wo a ngo?”

Yaa ddarkoxl a bbeix: “Bel nr wo.”

<sup>6</sup> Yisu yaa leil bbeix: “Nia ngol bel ddei cuaxr jiaxl yo piar a gga ddar ji, halmaex gga ngol bel wo ddo.” Yel yaa dder ngol bel ddei ajjix gga ddar ji a, ngol seirseil a ar ke bel wo a, ngol bel ddei lei gga deix xixl lei nr xie a.

<sup>7</sup> Yisu dax mae dae ca mel gga Yisu yarzisael perniar hal ddei Ximexr Birdaexr dax bbeix: “Yar mel Seirpor a!” Halcar a Ximexr Birdaexr mel pia lei nr veixr dae, yel yar Seirpor a bbeix ggje bbejjiur a dder nialngasael teixlsibbor veixr dae pia xiux veixr ngexl xixl a ajjix gga tiuxl ji a Yisu dax halmaex vixluxtaer mal. <sup>8</sup> Yisu dax mae dae ca kebal hal mel lei yarqierbbaer hher naer dae, hormo ardoxr nr giex, yel yaa dder cuaxr jiaxl huaxr dae a yarqierbbaer huaxr mal, halae yaa ngol bel wo mel gga dax dae. <sup>9</sup> Yaa hieltebbor ddeix ci a qie adoxl ar bbeixr zi dol dae mia a; halae ngol kal deix dae, aba lei zza dae.

<sup>10</sup> Yisu yaa leil bbeix: “Nia jiajia bel wo ngol mel nnel sael vei si la.”

<sup>11</sup> Ximexr Birdaexr dder cuaxr leil ddeix a, ngol bel ddei hieltebbor gga deix lei. Ngol bel gga mel maelmaerjjia lei ngol vaervaer lillil a nga, maelmaerjjia a mel cirxiu ngorcei soler zza. Ngol einezeixl miur bbeixarnar, nael ngol bel ddei mel halae gga nr xiaxr.

<sup>12</sup> Yisu yaa leil bbeix: “Nia zzocir zzor lei ddo a.” Yisu dax mae dae ca mel yar mel dder Seirpor ddei nga a saexl ho a, yel arseir lei yar leil “Ni arseir a,” biex nr bel. <sup>13</sup> Yisu dder gger a, aba mel yaa leil vei gger a zzor lol. Ngol mel lei yaa leil zzor lol. <sup>14</sup> Eilboxl mel Yisu si a yoxl gol du xixl lei ho a, so boxl ddei yaa leil mia lol dae a.

### **Yisu Nei Birdaexr**

<sup>15</sup> Yaa zzor teixl ho a, Yisu Ximexr Birdaexr leil bbeix: “Yuehal ddei ssor Ximexr, ni ngo leil perniar a bir ca eil mel ngo leil perniar mel leil perniar leixl nga nga?”

Birdaexr ddarkoxl a bbeix: “Seirpor, nga a mar! Ngo ni leil perniar mel



ni saexl.”

Yisu yar leil bbeix: “Halmel, ni ngo ddei yassor<sup>s</sup> mel leil zzo zol dae nia.”

<sup>16</sup> Yisu nr boxl ddei yar leil bbeix: “Yuehal ddei ssor Ximexr, ni ngo leil perniar niar?”

Birdaexr ddarkoxl a bbeix: “Seirpor, perniar mar! Ngo ni leil perniar mel ni saexl.”

Yisu bbeix: “Halmel, ni ngo ddei ya mel leil guaxr dae nia.”

<sup>17</sup> Yisu so boxl ddei Birdaexr leil bbeix: “Yuehal ddei ssor Ximexr, ni ngo leil perniar niar?”

Birdaexr mel Yisu yar leil “Ni ngo leil perniar niar?” so boxl biex a dder nixmox zzar zzasol a Yisu leil bbeix: “Seirpor, ni azo nr saexl lei ar yoxr nr zza, ngo ni leil perniar mel ni saexl.”

Yisu bbeix: “Halmel, ni ngo ddei ya mel leil zzo zol dae nia.

<sup>18</sup> Ngo ni leil yarzi bbeix gger, ni leixl tor seir mel, ni armael ddei armael maelsael neixl a, ni arddol ssi niazzir mel dder arddol ssi; nael ni mar car a mel, ni leixrhher zze cei teixl lei a, ca mel ni leil maelsael neixl gger a, yel ni leil ni ssi nr yuex ggje halmaex hier mal.” <sup>19</sup> Yisu ddar eil mel bbeix a mel, arddolcar a Birdaexr arsae si a, Arbosobo leil middux lol ddei leil biar dae arddeir a. Yisu yoxl Birdaexr leil bbeix: “Ni ngo dax bei mae dae nia!”

### Yisu Nei Kebal Yar Dax Mae Dae Su Ca

<sup>20</sup> Birdaexr za xixl lei a, Yisu dax mae dae ca mel gga Yisu yarzisael perniar hal ddei giedaebbaer mae dae ggje mia a. Yar mel dder yaa Yuelyuel jiax goxr a zzovar zzor dae car a Yisu leil naelnaer a koxl gex

---

<sup>s</sup>**21:15** *ngo ddei yassor* Yassor mel dder Yisu leil ddarzzi su nga a. Yassor leil zzo zol yilsi mel dder Yisu leil ddarzzi su leil guaxr.

dae a Yisu leil “Seirpor, ni leil vurllesu ddei arseir a?” biex su ca hal ddei nga a.<sup>t 21</sup> Birdaexr mel yar leil mia a dder Yisu leil biex a bbeix: “Seirpor, arddolcar a ca eil ddei arsae sael nga var?”

<sup>22</sup> Yisu yar leil ddarkoxl a bbeix: “Ngo yar leil gol dae lol a, ngo jjixr lei zzeze gol ci lol arddeirnga zzorbbeixlei ni dax azo ar ddei guaxrxoxr bbeixleir? Ni ngo dax bei mae dae a mel dder ddo a!”<sup>23</sup> Yel giedae ddar eil mel dder Yisu leil ddarzzi su ca mel gga biar kae a. Yaa biar dae a bbeix, Yisu dax mae dae ca eil ddei mel si nr var; nael Yisu zzael yar si nr var bbeix nr nga. Yar bbeix: “Ngo yar leil gol dae lol a, ngo jjixr lei zzeze gol ci lol arddeirnga zzorbbeixlei ni dax azo ar ddei guaxrxoxr bbeixleir?” bbeix arddeir a.

<sup>24</sup> Yisu dax mae dae su ca eil ddei mel dder Yisu leil biar dae eil mel ca leil biar gger su ddei nga a. Yar halae eil mel vaexr zeil lei a. Niul lei saexl, yar biar dae eil mel mel yarzi a.

<sup>25</sup> Yisu mel halae kebal lei cirke bei a seir; maelmaerjjia vaexr zeil lei arddeirnga a, ngo zzir dae a sul mel middurbbor lei dol ggor nr ddei a.

---

<sup>t21:20</sup> *Yisu dax mae dae ca mel gga Yisu yarzisael perniar hal ddei giedaebbaer mae dae ggie mia a. Yar mel dder yaa Yuelyuel jiax goxr a zzovar zzor dae car a Yisu leil naelnaer a koxl gex dae a Yisu leil “Seirpor, ni leil vurllesu ddei arseir a?” biex su ca hal ddei nga a. Ca eil ddei mel dder sul eil ber vaexr su Yuehal eil ddei nga a.*